

LE  
SOLDAT FRANCOIS



La guerre est ma patrie,  
Mon harnois ma maison,  
Et en toute saison.  
Combatre cest ma Vie.

• • 1604 •

Case

F

39

.326

1604 L

THE NEWBERRY  
LIBRARY



# LE SOLDAT

**G**RAND Roy, l'Epitome & le recueil des plus braues Rois; Alexandre en effect, si iamaïs il en fut de nom, seul beau Parterre pour les lauriers, MON BRAVE ROY; Annibal sceut bien vaincre, non pas suiure sa victoire, il vainquit ses ennemis par armes, mais il fut vaincu par les vices.

Vous, MON PRINCE, l'image parlante, vous le tableau vif de ses vertus, ô les beaux argumens que vous aués pour tenir ses vices à gauche, & à l'ecart! loin, loin de vos perfections, saintes tutrices de vostre honneur, & qui ne permettrôt, iamaïs que les fautes d'Annibal de Carthage rebourjonnent en l'Annibal de la France.

ON dit que la fortune trainoit dans des filets les villes toutes prinſes au cheuet

A

du liēt de Demetrius; Qu'elle dās quinze iours porta comme sur des cheuaux de poste les armes victorieuses d'Æmylius par toute la Macedone: Que dans les deserts de Libye elle enuoya des corbeaux à Alexādre pour guides de sō armee: Que dansvne petite fregate secoüée du vent & de l'orage, elle affermit le cœur de Cæsar, & luy fit dire, *Ne crains point, Pilote, car tu meines Cæsar & sa fortune.* NON, MON PRINCE, ce n'est point ceste guide aveugle de la lousche Antiquité. Ce grand esprit par qui joüent tous les ressorts de l'vniuers, tousiours agissant, & tousiours en action pour sa gloire; Luy qui tient les elemens à solde, le bien & le mal pour morte-payes; Le despensier de nos honneurs; l'Astre du flux & reflux de nos affaires: C'est luy qui au plus loin de vos esperances, faisant donner le coup fourré à vos plus cruels ennemis, mettāt les autres en eschec, & changeant leur colere en phlegme; C'est luy MON PRINCE, qui vous à faict Roy de la fleur de Lis, & vous à mis sur la teste la premiere couronne des peuples baptisez en son nom, luy qui vous à donné les bras dacier pour vaincre, & les pieds de cerf à vos victoi-



res; luy duquel les Anges ont esté vos tuteurs, & comme sacrez depositaires de vostre vie.

Dv berceau, il vous mit entre ses bras, vous seura, & vous osta le laiçt : Vos premiers pas furent comme sous la caution de sa main ; Rien sous le toit ny à l'ôbre, tout au hale du soleil, parmy les armes & la poussiere, iusques à ne pouuoir arriuer au moindre point d'honneur, qu'à trauers des coups, parmi l'horreur du meurtre, & du sang, comme si la rose ne se pouuoit cueillir sans piqueure; Comme si la gloire ne pouuoit estre vostre qu'au prix de vostre sang, & comme si pour donner plus d'eclat à vos vertus, il les falloit faire approcher des afflictions, tout ainsi que les Iardiniers tiennent que l'odeur des roses & des violettes est plus gratieuse en les semant au près des Aux & Oignons.

Vous donc, MON PRINCE, croissant en aage, & le ciel en amour, il vous mit la cuirasse avec le pourpoint, & vous voulut voir aussi tost armé, que vestu: Il le falloit. Vos ennemis de qui les esperances estoient basties sur vostre tombeau, & qui n'auoient assiette assuree pour loger leur ambition, qu'en la mazure de vos af-

faïres. Eux voyans qu'on commençoit à adorer l'Oriât de vostre vertu, & que vostre front royal, qui ne fut iamais sans odeur, ou sans verdeur de laurier, leur estoit vn veritable Almanach, que vous vous rendiez digne de la Frâce, si la France ne se rendoit indigne de vous, eux ne vous pouuans regarder que comme le Comete de leur malheur, cherchoient à se mettre à couuert dessous vostre ruine, & à force ouuerte vous cueillir en verd, tellement que vous n'eustes pas si tost l'espée au costé pour la bien-seance, qu'il la salut mettre au poing pour le combat.

L'OEIL qui void, ce qu'il ne vit iamais, fait penser au cœur, ce que iamais il ne pensa; l'alarme & la crainte frappent rout d'un coup l'oreille & le cœur d'un soldat nouice; ses armes ne se cognoissent qu'apres longues armes, & rien en fin ne l'asseure, que ce qui l'estône du commencement: Mais vous en vne saison si tendre, hors de tout exemple que de vous à vous, aués braué tous les efforts de vos ennemis, & leur faisant abboyer la lune, & combattre les nuës, leur auez monsté que la vertu ne trouue iamais d'ecueils, que les secouffes lui sont vne escolle & vn ap-

5

prentissage d'honneur, & qu'il ne falloit rien craindre de vous, sinon que vous ne craindriez rien, ny rien desirer en vous, si non que vous fussiez plus haut d'oreilles pour les alarmes, & plus sobre pour les combats.

INNOCENT Arion, O que de douleur en tes chansons, & que de hazard en ta vie ! En ton art tu viuois hors de pair, en toy la nature sembloit debuoir du retour à l'art, & à peine le monde pouuoit il croire ce qu'il voyoit au monde: chargé d'honneur & de biens, tu t'embarquas en Italie pour retourner à Corinthe: l'enuie qui s'attache tousiours à la vertu, comme les Cantharides aux roses & aux plus belles fleurs, mit ta vie en butte à quelques mariniers: A leur visage tu iugeas de leur cœur, & voulant mourir avec quelque bien-seance, tu prins tes habits d'honneur pour te servir d'ornemens funeraux à ta mort, & tes melodieuses chansons, comme aux cignes, d'une lamentation auant ton trespas: M E S A M I S, dist tu, il me prend enuie sous la mercy des vagues & du vent de chanter vn hymne à Apollo Pithien pour le salut du nauire, & pour l'appeller à caution de nos vies. Et puis te dressant

A ij

en pieds sur la pouppe, & apres auoir son-  
 né quelque inuocation aux dieux marins,  
 tu chantas, O Dieu, & quel Catrique! Les  
 vents tous bouche sans oreilles, furent  
 tous oreilles sans bouche; La mer mutine  
 & seditieuse, mit ses ondes à l'esgal, sans  
 ride & sans mouuement; l'air fit faire lar-  
 gue aux nues, comme s'il vouloit que le  
 ciel print sa part de la melodie; Eux seuls  
 ces cœurs de bronze & d'acier ne se peu-  
 uent amolir, mais comme tygres, qui  
 ainsi qu'on dit, entrent en fureur au son  
 du tabour, eux seuls par la melodie re-  
 doublerent leur rage & te coururent sus.  
 Qu'eusses tu fait? Comme en ta vie les  
 elemēs auoient esté tes auditeurs, tu vou-  
 lus en ta mort auoir vn elemēt pour tom-  
 beau; Tu t'eslanças en la mer, l'onde t'en-  
 gloutist, Arion estoit noyé, l'innocent  
 Arion estoit perdu, quand au milieu d'un  
 nombre de Dauphins presque sans nom-  
 bre, môté sur le plus beau, le voicy paroi-  
 stre au milieu de la mer, tout degouttant  
 d'eau, sauf les yeux qui luy rient, d'un vi-  
 sage asseuré, comme celuy qui n'a iamais  
 veu la peur, & avec moindre crainte de  
 mourir, & moindre enuie de viure que  
 d'ambition d'arriuer à port, afin que le

monde cogneust qu'il estoit en la grace des dieux, & que la iustice du ciel n'a pas moindre iurisdiction sur la mer que sur la terre. Tout tire en troupe droict au promontoire de Tenare, Amphion au milieu de tous, & trestous doucement nageans terre à terre, le long de la coste, comme obligez à ce seruice personnel, ils le mettent doucement à bord, puis luy donnans vn muet, mais vn intelligible Adieu, ils s'en reuont de compagnie, sautans, & culbutans de ioye, & en partage esgal de l'honneur, d'auoir conduit Arion comme vn nauire entier à sauueté.

BENOISTE troupe d'esprits, officiers à tout faire pour le ciel, Anges bien-heureux: O que bonne cautiō doit auoir l'innocence, quand pour l'amour d'elle, on vous voit en masque au milieu des abysses, au profond de la mer, desguisez en Dauphins, les vns pour luy seruir de monture, les autres d'estrieu, ceux-cy pour guides, ceux-là pour gens volontaires, & dont l'escorte ne luy couste pas seulement le demāder, tant le ciel est officieux vers ceux qui portent sa liurée, & qui ne se plaisent de viure en terre sinon tant qu'il leur est defendu d'y mourir! Qui le



croiroit, sinon ceux qui sur le courant de nos fureurs civiles, & lors que l'Espagnol tenoit en France boutique ouuerte de meurtre, & de carnage, vous ont veus en habit de soldats, l'harquebuze en main, *crier qui viue*, mettre mesche en serpentine, coucher en jouë, tirer, tuer, faire ecart des ennemis de mon Roy, iusques à ne lui en pouuoir faire bien souuent recognoistre que le dos, comme si le ciel voulant entrer au partage de ses victoires, vouloit prendre le hazard de ses combats! Autrement avec qu'elles mains eust il empoigné ce pesant sceptre? Avec quel bras eust il leué de terre ceste Couronne tombée, & la placer sur sa teste, sans vous Anges bien-heureux, tous aises de mettre sa vie, son innocente vie, hors d'eschec, sans danger au milieu des dangers, & comme vne salemandre au milieu de la flamme? Tous glorieux de luy seruir de nuée & de feu, tantost dans le iour, tantost dans la nuict de sa fortune, de le faire voir asseuré à deux doigtz de la mort, trouuer les viues sources de l'esperance au plus fort du desespoir, vaincre le nombre par la valeur, emousser la force de ses ennemis par sa seule rencontre, & en fin d'affermir

deux couronnes sur vne teste, sans luy demander autre solde, sinon qu'il croye que l'innocence viura tousiours ferme & assurée souz la main du Dieu viuant.

V N combat, SIRE, vous seroit à moindre charge que le discours de vos cōbats; Le dire vous sembleroit oster la grace du faire, pour n'estre donné à la main des Muses de naïfvement peindre les coups de la main de Mars, non plus qu'aux peintres les eclairs & la roideur du foudre: Du moins faut-il que comme vrayment vous estre Laconien en courage, nous le soyons en paroles, & que ceux qui verront vostre tombeau, y voyent la grandeur de vos faicts grauez en peu de mots, & par forme d'un abbrege de vos victoires, LE VINS, LE VIS, LE VAINQVI.

A presēt que le ciel vostre tuteur apres vne lōgue trainée d'afflictions, donne plus de iour à vostre gloire, pour s'estēdre & s'ellargir, cōme on dit que la mer donne vn calme aux alcyons pour la couuee de leurs œufs; A present que vous estes au-dessus du vent, au couuert de l'orage, & que vostre pouuoir fraternise avec vostre volonté: Encore vn coup, GRAND

Av

R o y, a present que l'Amnœstie & la loy  
 d'oubly a mis partie a mort & au tom-  
 beau, partie au ban toutes les animosités  
 de vostre Royaume; Que vos ennemis  
 ny trouuent plus ou loger qu'ez four-  
 ches, es vêtres des loups & des corbeaux,  
 & les mieux fortunés aux Cimetieres;  
 Que vos peuples a la mode des Perses  
 vous portent l'eau & feu pour entiere o-  
 beissance, & qu'ils sont comme ces Isles  
 dont parle Pline, qui vont & viennent à  
 la moindre touche d'aurô, sans que rien  
 branle que par vous & touz vous, le pre-  
 mier mobile, & le seul ressort de tous nos  
 mouuemens; Aux iours nuptiaux de la  
 France qui a espousé sa fortune avec vo-  
 stre valeur, d'où comme du mariage de  
 Iuppiter & de la Deesse Pitarchie doit  
 naistre toute felicité: Au retour de ses af-  
 flictions, hors de la veuë des floz, & va-  
 gues ciuiles, toute seiche du naufrage  
 qu'elle a rescappé, releuée de l'accou-  
 chemēt des plus effroyables ruines qu'on  
 ait iamais veu, son corps beau & sain,  
 rempli de sang & d'espritz, ses muscles  
 releués, son cuir poli & sa couleur ver-  
 meille; Auourd'huy, M O N B R A V E  
 R o y, que le ciel vous roidit le bras, que

la terre vous arme, que l'occasion vous fait tant les doux yeux, nee vous souuiendrés vous pas de ce qu'on dit de ce genereux Capitaine Timotheus, qui tomba en la disgrâce des Dieux pour auoir mesprisé sa bonne fortune? Auiourd'huy plus que iamais ne presserés vous pas la vostre, ne la pousserés vous point de l'espaule, la criant, la tançant, si elle ne poursuit la pointe, sans iamais rebouscher, sans iamais reculer? Auiourd'huy qu'il vous importe tant de rabbatre la creance de vostre ennemy, l'honneur ceste viande delicate de la vertu, & son plus friand morceau, l'honneur l'esprit mouuant de toutes nos belles actions, se trouuera il en vous comme en vn estomac froid & crud, comme en vn corps fastantique & en vne Chimere? Le plus auguste Roy du monde, tousiours resolu en son courage, tousiours courageux en ses resolutions: Le Prince des peuples nés au mestier de Mars, nostre Alexandre iusques icy attaché au front de nos batailles, ne fera il point par necessité, ce que les autres font par ambition? Bourbon ceste race guerriere qui ne scait ou mourir que sur vn champ de bataille, Genereuse race qui

tant verdit en ses branches, se pourroit elle perdre par la racine?

LA reputation d'un Prince mise au rabais s'emousse, perd sa trempe, & fait auancer sur luy le mesprix de ses suiets & l'audace de ses ennemis : l'honneur qui l'animoit de hautes & viues conceptions ne reflue pas si tost que son auctorité ne face naufrage : Il luy doit donner de longues & profondes racines, tenir ses branches au large, & ne permettre que l'ombre s'en racourcisse : s'il est vaincu, aussi tost par terre, aussi tost sur pieds ; si victorieux, le voila aux flancs & a la gorge de son ennemy, comme Menelaus disoit des Troyens, & Annibal de Marcellus : Et si un sage Romain detestant les vices que la conuersation des Grecs leur auoit apporté, disoit, *Nous auons conquesté la Grece, ce, mais la Grece nous a conquestés* ; SIRE, si vous aués vaincu la France, ne vous gardérés vous pas que la France ne vous vainque?

MAIS non, vous aimés trop la Tantara des trompettes & le Colintampon des tabours pour permettre que le repos & loysuete triomphét sur les triumphes de vos trauaux & de vos rouges victoires ;



Vous estes trop braue, vous estes trop courageux pour vous laisser emporter tout entier à la culture de vostre repos sans mesnagerie de vostre reputatiō; vous estes trop fait à l'honneur, trop bon œconome de vostre gloire, pour bailler le plain & le plus beau de vostre aage a paistre aux delices & a la volupté: A cartier, a cartier de leurs charmes, loin & plus loin d'eux qu'Hypolite ne saluoit la deesse Venus, & encore plus loin que ne fit ce Roy d'Asie Antigonus, qui trouuant en Ephese la religieuse de Diane belle par excellence, sortit aussi tost de la ville de peur qu'il n'en fust touché d'amour.

SEULEMENT souuenés vous, que l'ambition d'un grand Prince doit tousiours estre a cheual, qu'il se rend indigne du bon heur que Dieu luy enuoye, s'il le quitte, & s'il le plōge son deuoir en son repos: que ses trophées luy doiuent esclancer des conceptions de plus longue halaine, & faire combattre en son esprit, l'esperance de l'aduenir avec la gloire du passé. Et si Demosthene disoit que la Galere sacrée de Paralos estoit indignement traitée, quād on s'en seruoit pour porter du bois a Midias; qui seroit ce d'une bel-

le ame, d'une ame guerriere, nourrie à l'honneur, parmy les armes, entre les coups & le sang, de la voir mener captiue entre les mains du repos, s'obliger à faire vn sabbath du reste de sa vie, toute molle, toute enervée, & comme si elle n'auoit fait iamais la guerre que pour ne pouuoir trouuer la paix? O le beau voir, qu'il faisoit Hercules au palais de la Roynie de Lydie, Omphale, vestu d'une cotte de damoiselle, se laissant peigner. & coeffer aux filles de la Roynie!

LES Romains à l'entrée de leurs banquets beuuoient du vin avec de l'absynte pour empescher que les viâdes trop douces ne leur corrompissent l'estomac: Et quel meilleur absynte contre la douceur de la volupté, que de faire comme le soleil qui commence à trauailler par la fin de son trauail, ioinde ouurage à ouurage mener vne action sans virgule & sans poinct, auoir vne ame de bonne haleine, a qui iamais les pieds ne faillent, & qui s'allôge autât que la terre a de longueur?

BEAUX & notables estoient ces enseignemens des Grecs, qui couronnans les vainqueurs aux ieux Olympiques, leur faisoient quand & quand boire de l'eau de

rue. Digne de remarque, ceste ceremonie  
 obseruée au sacre des Roys de Perse dans  
 le temple de Pasargades, ou les Prestres  
 leur faisoient manger vn torteau fait de  
 peu de figues, & de force teberinthe, &  
 boire d'un breuvage, ou il y auoit plus de  
 vinaigre quede lait: Mais non, & non pas  
 pour attriedir leurs courages, n'y pour les  
 mettre en sequestre, & les consigner en  
 tre les bras du repos & de l'oyseté, non  
 pas pour les faire plier les iâbes, souffler à  
 tout poulmon, & battre des flancs après  
 auoir passé vne carriere: Cela seulement  
 en mystere & pour les instruire à tempe-  
 rer leur ioye & esleuement d'esprit avec  
 vn peu d'amertume, & cōme en ce mon-  
 de les plaisirs d'ordinaire portent lesdou-  
 leurs en crouppe; Comme la prosperité  
 des hommes est vn esclair qui passe, vne  
 fleur d'un iour, vne rosée de matin. Com-  
 bien les reuers de fortune sont a craindre,  
 & combiendangereuse l'opinion des peu-  
 ples, qui n'ont iugemēt que dās les yeux,  
 & qui iugent des causes par les accidens,  
 desestiment par vn mauuais rencontre ce  
 qu'il auoient prins en admiration par vne  
 seule felicité.

Ce courageux Romain qui mit a la

renuerse & de pieds contremont la fortune d'Annibal, alla bien finir ces iours en vne sienne maison chapestre: Mais quand fut cette retraite? Peut estre en la verdeur de son aage, & aux ardeurs & bouillōs de son sãg! NON, MON PRINCE, nō, il auoit donnē le rond & le plein à sa gloire; Nature luy demandoit le peage de sa vie, & la vieillesse ceste chagrine fourriere de la mort auoit desia tiquettē son tombeau: Car tāt qu'il peut porter l'espēe au poing, il porta la hardiesse au cœur, & ses coups sur ses ennemis: Autrement estre assis sur vn boisseau, comme disoit Pythagore, des fais-neās, mettre la chādelle sous vn muy, & rēdre vn cœur genereux a la discretion des delices & du repos, n'est ce pas en diuerses paroles dire vne mesme chose?

Nous prisons toutes choses, pour la partie principale qui leur donner la force de leur estre: La vigne pour sa fertilité, le vin pour sa liqueur, le cerf pour sa vitesse, & vous, MON BRAVEROY, pour estre vaillant, iusqu'à la qu'il semble que la nature se fust trouuée foible pour vous faire Roy, si vostre vaillance n'eust aydē la nature: Qui la fera perdre en vous, il vous perdra, & pour la perte de tous deux, il ne

faut qu'une paix, qui faifans l'amour à vos sens piperà vostre corps par ses delices, & vostre ame par vostre corps; Paix, dangereuse paix, si vous n'en faites comme les Prestres Egyptiens de l'eau du Nil, on ils ne laissoient iamaïs boire leur Dieu Apis, afin qu'il ne s'engraïst, & n'engendrast trop de chair: O que sage devoit estre Cyrus quand pour punir ceux de Sardes, il leur commanda de passer leur tems en jeux, en dances, & en banquets.

D'AILLEURS, SIRE, puis que de causes contraires sortent diuers effects; quel serez vous en temps de paix, vous qui en temps de guerre avez esté vn diamant que le fer n'a peu rompre; vne palme que le faix des afflictions n'a peu courber; Vne rose qui a rendu vne souëfue odeur parmy les espines? Ce n'est pas tout; La vie d'un Prince est vn canal ou se distillent les affections dont le vulgaire s'abreuue; C'est vn feu qui transforme en sa nature tous ceux qui s'en approchent, son exemple coule en ses sujets, comme la defluxion du chef sur les membres, & ses meurs se trouuent peinctes au vif & au naturel sur le cœur de son peuple. Nous laissons inciser nos ames aux volontez de



nos roys, nous prenons leur teinture, nous parfumons à leurs odeurs; Et si Alexandre panchela teste, toute sa Court tord le col; si Denis à la veüe courte, ses courtisans choppent à chasque pas, tant l'exemple d'un Prince est contagieux! Fermerez vous donc les yeux SIRE? Tout le monde fera le gliron: Esloignerez vous tant soit peu le trauail? quand & quand tous vos subjects croizeront les bras, ils s'enyureront de luxe & de dissolutions, & se mollifieront dans vn profond repos. Et voila vn beau parc de femmes que la France, qui pourront bien tost enuoyer en Espagne changer leurs armes & leurs cheuaux en affiquets, & en vermeillon!

ON dict que les cheuaux qu'on nomme Lycospades, pour auoir esté mordus du loup estans encores poulains, en deuiennent meilleurs & plus courageux: Ce grand loup de Madril, mangé de vermine & de poux en sa vie, comme ce cruel & sanguinaire Sylla; Le facteur & l'Agent du Diable en l'Europe, propre à deschirer & mettre en pieces le plus entier Estat du monde; Le mallier & le portefaix des vices de tous les tyrans qui iamais furent; La puanteur & la lie des siecles passez, ia-

loux de son sang & de ses propres entrailles, & lequel proprement on pouuoit appeler espee, comme les Egiptiens en appelerent le Roy Ochus, pour auoir esté le plus cruel & le plus terrible Roy des Perses; Ce glouton d'Empires, auquel comme a ces anciens gourmâds de Mesetie on pouuoit demander, *Combien contient ton ventre? de quelle tenuë est ton ambition?* Ce loup affamé, affriandia deuorer les Royaumes depuis que la foudre du Pape Iules porta coup en Nauarre, a mis la dent sur vostre berceau, & demeurant tousiours à gueule ouuerte sur vostre fortune, il a cõme fondu le ciel & la terre pour remuer les antrailles de cet Estat: Il a mis vos suiets en desbauche, & leur faisant violer le sainct respect, qu'ils doiuent à la sacrée personne de leurs roys, Il a donné ouerture a nos cõfusions, poussé la rouë a vostre cheute, & fait vne boucherie de vostre France, Et que cela ne vous grossira point le cœur! & que vous ne deuiendrés point plus genereux par la morsure de ce loup! Comme s'il valoit mieux festoyer son corps des seruices de son ame, que d'employer la force de l'vn & la sagesse de l'autre a eslargir & esten-

dre sa renommée ! Gentiment repartit Pompée sur Lucullus qui le blasmoit de ce qu'en ses vieux ans il tenoit son ambition en verdure & sans poil blanc, Lucullus qui de grand Capitaine s'estoit fait la proye des delices & de la volupté, *Il vaut mieux, dit Pompée, commander aux armées, qu'estre commandé par ses vices.*

NON pas, SIRE, qu'il soit incompatible de mettre la vertu avec la recreation. Car ne fut-ce pas Alexandre qui entrelassa parmy les sieges des villes, parmy les exploitz des armes, les joyeusetez bacchanales, les nopces & les chansons nuptiales d'Hymenee ? Mais pour dire que quoy que les Stoïciens tiennent que: *Tout acte que faict le sage, il le faict par toute vertu ensemble :* Que toutesfois en chasque action il y a vne vertu eminente par dessus toutes les autres: Aussi voit on que la vaillance d'Alexandre est humaine, son humanité vaillante; sa liberalité mesnagere, sa colere facile à appaiser, ses amours temperces; ses passetemps non oyseux; ses travaux non sans addoucissement.

ET ALLONS nos faits au iour comme le paon ses belles plumes; faisons gloire d'un quartier, & non du Croissant ny

du plain de nos actions. Contentós nous d'auoir fait iour à nostre reputation par l'ecart de quelques nuages, mis nostre fortune sur pieds, fait jonchée de quelques ennemis, & par l'amortissemēt d'vne fureur ciuile establi le repos de nostre Estat; secoüons la poussiere de nos armes, mettons nous à l'ombre, fermons les yeux au ciel, seul ouurier & tisserand de nostre honneur; Et comme si nostre fortune auoit acheué sa fusée, ne luy mettós plus de besongne à la main; Aimer, Est-ce là doncques aimer la vertu pour la vertu? Est-ce estendre & prouigner sa reputatió, & respirer en ces actions vne pleine & entiere majesté, vne eminente & comme superlatiue vertu? Est-ce vouloir redoubler le destroit de Gibaltar, & en se figurant comme le jeune Alexandre, le monde tout conquesté, chercher vn autre monde pour le conquerir? Et si l'ambition ne meurt iamais en l'homme, si la memoire d'auoir bien fait, nous est autant qu'vne centaine d'obligations pour faire mieux, Et si, comme disoit Homere, la vertu est vne felicité qui chemine de l'vne à l'autre, Nos premiers pas seront ils nos derniers? La goutte fera elle deshonneur à nos pre-

mieres courses ? Et la verité d'estre vail-  
lant , ne sera elle pas plus honorable que  
la vanité de l'auoir esté ? Tout courage  
porté à l'honneur s'auance tousiours sur  
l'auenir ; Il ne va point à reculons n'y en  
ecreuissè ; Iamais il ne dit qu'il a fait , mais  
qu'il veut faire. Autrement que seroit ce ,  
que comme le chien d'Egypte *qui boit &  
aussi tost s'enfuit* ?

GENEREVSE fut la priere qu'Alexan-  
dre fit aux Dieux sur le bord de la grand'  
Mer Oceance , *que iamais Capitaine ne pouf-  
sast ses conquestes plus auant que les siennes* ;  
Encore n'auoit il la victoire qu'au bout  
des doigts ; du moins ses armes auoient à  
faire d'autres armes , & ses prieres se jet-  
toient plus sur l'aduenir , qu'elles ne re-  
culoient sur le passé. Ce n'estoit donc pas  
pour prendre le sommeil des Dieux d'E-  
picure , pour se laisser siller la paupiere  
au repos , ny pour viure à la mercy des  
delices ; Cestoit pour seruir de guide aux  
Princes de semblable humeur à la sienne ,  
pour les tenir en halaine , & leur dire  
que pour bien faire , il ne faut iamais  
perdre cœur que par faute d'ennemis ou  
d'occasion . Aussi dict on de ce grand  
Capitaine Philopœmen que la paix ne



luy estoit qu'une meditation pour la guerre.

L'HOMME est vn arbre dont le fruit n'est meur qu'en l'arriere saison sa nature ne le cognoit point en grene : Il en faut voir la fleur & le fruit ; souuent ses premieres actions portét le masque, d'abord il parle en enigme, & tel entre en renard qui sort en chien : Tel pour vn temps plastre & desguise si bien ses actions, que les vices & les creuasses de son ame ne paroissent point. Neron arriue à l'Empire : O pour cinq ans le bon Neron ! & que de rares vertus en ce Prince pour porter ombre aux meilleurs Princes ? Mais tout à coup les delices l'amolissent & luy d'estrempent le cœur, l'aise l'engourdit, & ses premieres actiōs se noircissēt au hasle de ses crimes : Tel au contraire au feu de sa jeunesse, est eschauffé au feu de ses cupiditez, qui puis apres s'appriuoise si biē à la raison, qu'on voit toutes les passions applanies, & la vertu regente si bien ses affections, que rien ne se desborde en son ame, rien ny branle hors du deuoir : Ta folle jeunesse. Themistocles, toute diffamée d'excez & de desbauches, mit en branle ton hōneur, & le fit periller ; Hon-

me fait, la Grece n'eut autre bouclier n'y autre espee; Homme vieux & retiré en Perse, Xerxes en rend graces à son Dieu Arimanius, & est tellement rai de ta vertu, que la nuit mesmes en songeant, au plus fort de son sommeil, il crie par trois fois *l'ay Themistocles l'Athenien.*

LE lion appriuoisé peut retourner à son naturel, & la terre de nos ames qui portoit le bon froment de pieté & de vertu, peut à faute de culture produire les espines & les chardons de vices & d'enormitez. Aussi le plus fort de la besongne, disoit l'Imager Polycletus, *c'est quād la terre est venue jusques à l'ongle.* Il vouloit dire, q la courōne de l'ouurier gist en la fin de l'ouvrage; Qui dōc se voudra tenir sur la poincte de sa reputatiō? Qui se contentera d'auoir tracé quelque marque de prosperité & de valeur sur le dos de ses ennemis? Qui fera vn estē pour vne arondelle, vne reigle pour vn exēple? Qui iugera d'vne chanson par vne note, d'vne Comedie par vne scene? Non certes ce courageux Roy Massanissa: Non ce braue Phocion qui ayans roulé toute leur vie parmy les armes, se trouuent en l'aage de quatre vingts ans à la teste de deux puissantes armées;

armées; Aussi tout le priuilege des beaux commencemens, c'est d'estre tenus pour la moitié de l'œuvre: Aussi la vertu ressembble a ceste tant fameuse Penelopé qui n'acheuoit iamais sa toile; sa principale action est de n'estre iamais sans action, se nettoyer & purifier, a l'exemple des ruisseaux & des riuieres, qui sont d'autant plus claires & plus nettes que leur mouvement est frequent; Elle tire tousiours outre, tousiours en auant, sans barriere, sans closture, & comme si sa fortune n'estoit iamais hors de page, elle donne la main de sa premiere action a la seconde, de la seconde a la tierce, entretenant ainsi sa reputation, comme vne vigne avec des eschallats nouueaux, comme vne flamme en y mettant de la matiere, comme le Galion Deliaque en y subrogeant tousiours vne piece neufue à vne vielle; bref c'est vn signe qui chante iusqu'à sa mort, & vne abeille qui ne peut deuenir freslon.

Nous chasserons, nous bastirons, Veneurs, macons, cheuaux, truelle, chiens & mortier tout pesse-mesle pour ne nous reposer pas mesmes au milieu du repos. Helas que de forests espaisles, que de bestes sauuages en nos maisons! Que de

bresches, que de ruines en nos ames ! Et  
ô la belle chasse si la Iustice estoit grand  
Veneur ! O les beaux bastimens si la vertu  
manioit la truelle !

A v cerf ; Tresbien fait & en bons Ca-  
pitaines , si c'est pour faire voir aux lai-  
ches de cœur, que la mort est sur le talon  
des fuyars , & pour enuoyer toutes les  
cornes aux Deliens pour leur autel Cera-  
ton tout basti de cornes.

V N E Galerie ; fort a propos & en bons  
Geometres, si nous la faisons aussi longue  
& a mesme niueau que nos desirs.

A v sanglier ; Chrestiennement & en  
gens reformés , si c'est pour faire sortir  
tous les pourceaux de bauge, & leur faire  
prier Dieu, comme le laboureur d'Hesio-  
de, qui fait ses vœus à Iuppiter & à Ceres  
ayant la main sur le manche de la char-  
rue. Aussi la principale fin de l'homme,  
consiste en deux choses contraires, mou-  
uement & repos , action & contempla-  
tion ; Et quand Theseus fit battre de la  
monnoye avec la figure d'un bœuf , pour  
inciter ses citoyens au labourage ; Quand  
on faisoit porter liurée aux bourgeois de  
Rome , pour cognoistre quel mestier ils  
faisoient , c'estoit bien pour monstrier

qu'on ne vouloit point de guespes dans les ruches à miel.

VNE cheminée: Prudemment, & en bons politiques, si telle, quelle puisse euaporer la fumée des cerueaux françois, d'un million, qui ne scauent ou porter la main que sur la poignée de leurs espées, le pied que sur vne bresche, l'œil que sur vn champ de bataille.

AVX loups; Necessairement & en bons Pasteurs, si c'est pour les faire sortir de la Nauarre nostre bergerie, & leur arracher de la gueule tant de bons suiets, nos innocentes brebis.

VN Pauillon, En gens courageux, si sur les monts Pyrenées pour contempler Madril & par la veüe aiguïser nostre appetit, par vn pourmener iusqu'à la digerer nostre iuste colere, & redoublant les beaux coups de Scipion, porter le tison & le flambeau loing, loing de nous, & empescher que l'Ambitiō de Castille ne batte plus sur la misere de la France. O qu'il tarde aux gēs de biē, de vous voir au plus haut de ces montagnes, cōme au sommet de gloire, paroistre à l'Espaigne, qui toute entrouble, toute en confusion, dira, voila, le voyla le grand Roy de la fleur de Lis:

Bij



Ce Roy au visage long, au nez aquilin, appelé par les propheties à la seigneurie du monde : Le voyla ce grand Prince imployable à toutes secouffes, & à qui la moindre pluye est plus fascheuse que la gresle des coups de Canon : A laide. O Dieule voicy ! ce foudre de guerre, soufflant vn roide vent d'indignation, & grondant en tonnerre de vengeance : LE VOICY à la teste de ses legions, comme vn Comete brillant, comme vn Mars foudroyant : LE VOICY, l'espée au poing, couuert d'armes toutes brillantes de feu, & esclattantes iusques dans les nuës, A L'AIDE, O DIEU !

Novs chasserons, à ce comte, ô Faunes heureux, bien-heureux Satyres, estrangers des villes, domestiques des bois, & qui viuez plus à la ruine des bestes, qu'à u bien & commoditez des hommes.

Novs bastirons, Coquin Diogne avec ton tonneau ! Chestif Prestre-Ian, Misérable Negus avec tes cinquantes Roys, qui hors-mis ta forteresse du mont Anga n'as qu'un paillon pour tout palais ! Pauvres Tartares en Scythie, pauvres Arabes en Afrique qui le plus souuent n'aués que le ciel pour couverture, & la campagne

pour repos ! Mais aſauoir mon , ſi Charlemaigne eſtoit mieux logé que nous , & non plus auantageuſement apennagez , & mieux en fortune que Charlemaigne ? Quoy qu'il en ſoit , nous baſtirons : Mais en qu'elle forme ? La lune vn iour pria ſa mere de luy faire vn petit ſurcot , qui luy ioigniſt bien au corps : Et comment eſt il poſſible , reſpondit la mere , veu que tu es tantost pleine , tantost en croiſſant , autrefois en decours ? Et nous qui de iour en iour allons au change d'affections , & de volonte , qui n'auons rien de conſtant que nos inconſtances , nous voulons baſtir ? Et en quelle forme ? O que belle , ſi nous imitons le chien d'Eſope : Il ſe propoſa de baſtir vne maiſon , de grandeur proportionnee a la ſienne ; en hyuer frappé du froid , il ſe reſſerre & ſe plie en rond , l'Eſté au contraire il ſ'eſtend & ſ'allonge aux rayons du ſoleil , de ſorte que trouuant ſon deſſein trop grand pour l'hyuer , & trop petit pour l'eſté , tout ſon baſtiment fut de ne baſtir point : Et nous vrais Polypes , vrais Cameleons qui prenons nouuelles figures a nouueaux obiects , nous voulons baſtir ? Et en quelle forme ? Comme ſi nous voulions menacer le ciel

du sourcil de nos bastimens, faire honte à la nature par l'art; fouiller & mettre sans dessus dessous toute la terre, pour parer le dehors par la despouille du dedans, & arracher les antrailles d'un corps pour embellir la peau: Ou plustost comme le monde, grand Louure de la nature: comme si le ciel son toit précieux; comme si l'Orient, l'Occident, le Midy & le Septentrion ses magnifiques pavillons; comme si le Soleil son beau miroir; comme si la lune & les estoiles, les clairs flambeaux; comme si l'air sa voiliere; comme si la mer son viuier; comme si la terre, son parc; comme si les animaux, ses meubles ordinaires; comme si les herbes & les fleurs, sa riche tapisserie; comme si les arbres, son riche buffet, du moins comme si toute la terre estoit estroite à loger des vers de terre, bastir tousiours, & tousiours bastir sur terre sans fin de peine ny de despence!

Nous chasserons; Ouy, mais que ce soit comme l'araigne dont parle Aristote, qui tout ensemble ourdit & chasse si accortement, qu'on ne peut dire si elle travaille en chassant, ou si elle chasse en travaillant: Et mieux encore si nos chasses sont braues & guerrieres, comme cel-

les de Cyrus, qui menant son armée contre le Roy d'Armenie, disoit a ses gens, que ce n'estoit qu'une de leurs chasses ordinaires: Ou comme celles d'Alexandre qui pour raualler le deuil qu'il auoit de la mort d'Ephæstion s'en alla a la guerre contre les Cossæiens, comme à la chasse d'hommes.

Nous bastirons; A la bonne heure, si comme les enfans d'Israël qui rebatiffans leur Temple manioient l'esped'vne main, & la truelle de l'autre: Et non pas ainsi qu'un ancien disoit des Romains, qu'ils bastissoient comme immortels, & mangeoient cōme s'ils ne doiuent viure qu'un iour. A la bonne heure, si la France est le corps de logis, & que la Nauarre l'Aragon, Milan & Flandres soient les paillons, Mais ô le beau, trois & quatre fois plus beau bastiment, s'il nous souuient que proprement nos maisons consistent en nos femmes, & nos enfans, en nos seruiteurs, & que par nostre sage exemple, nous pouuons rendre nostre maison heureuse & belle, fust-ce un nid d'oyseau, fust-ce une fourmilliere! Et si nostre prosperité est faite de verres, & qu'elle doie se ruine au premier heurt, si

les fortunes vont & viennent, si elles sont  
sujettes à changement à flux, & à reflux à  
vne agitation vagabonde ; Ou voulons  
nous voir nos enfans mieux logez, mieux  
à couuert , qu'à l'ombre de leurs vertus,  
filles & rejettons des nostres ?

Nous ne sommes icy que comme des  
arbres renuersez : Nostre racine est au  
ciel , & comme plantes genereuses nous  
deuons estendre nos pensées comme nos  
branches, esleuer nos mouuemens com-  
me nos fleurs , estaller nos parolles com-  
me nos fueilles, produire de bonnes œu-  
res comme nos fruiçts, tousiours & tou-  
sious les yeux tendus au ciel pour nous  
en rendre dignes, & en tirer nostre croif-  
sance & maturité: La terre n'est que com-  
me l'air, ou les branches de nos affections  
se remuent, & ou voltigét les nuës de nos  
plaisirs : Bastir donc sur la terre, qu'est-ce  
que bastir en l'air, figurer des Centaures  
& des Chimeres, nous rendre girouëttes  
du vent, & hommes liges de l'inconstance ?

L'A y autresfois leu , (& pleut à Dieu  
qu'en songe) qu'un grand Roy de The-  
bes fit bastir vn Obelisque ou d'ordinaire  
vingt mil hommes estoient au trauail; sur  
le poinçt qu'il fut de le faire dresser , il



eut peur que les machines & les instruments fussent foibles pour soustenir vne masse de pierre si prodigieuse, Pour redoubler donc la crainte des Ouuriers par la sienne, il fit attacher son fils au haut de l'Obelisque, afin qu'ils eussent plus de soin a sauuer la pierre pour sauuer l'enfant: O vanité si les prodiges sont vains ! mais plustost, ô prodigieuse cruauté ! Vn pere hazarde son fils pour mettre ses pierres hors de hazard; il veut que la crainte commande l'art, & que l'art donne loy, sinon a la nature, du moins a vn pere de nature digne que l'Obelisque vist sa ruine, & le fils celle de l'Obelisque: En fin aussi la fin de l'ouurage a esté la honte de l'auteur, & plus se trouueroit il de tesmoins de sa folie, que de pierres de son bastiment.

Quand vous lisez, comme ces grands Roys d'Egipte batissoiét leur renommée sur leurs bastimens, & tels a la verité, que la terre sembloit foible pour leur pesanteur, le ciel trop bas pour leur hauteur, & le monde plustost en eux, que non pas eux au monde; Et cependant qu'au iourd'huy on ne les recognoist point parmi la poussiere, & que les moindres œuures de nature, les orties, les chardons, foulent cō-

me aux pieds l'orgueil de ces grands Chef  
d'œuvres de l'art. GRAND ROY, qu'en  
jugés vous? Si du dessain par louurage:  
Qu'est ce que poussiere? si par l'ouurage  
du dessain: Qu'est ce que folie? si de ces  
roys par le dessain & par l'ouurage, Que  
sont ce que de grands Colosses de chair,  
qui n'ont voulu auoir autres tesmoins de  
leur vertu que des Colosses de pierre?

V R A Y E M E N T le monde  
doit sa ruine au tems, les Empires  
au monde, les villes aux Empires  
& nos maisons aux villes; Ainsi  
pour bastir en l'air, il faut bastir en terres:  
pour bien achepter le tems, il en faut  
abuser; pour n'estre guere au monde, il  
faut estre tout du monde: le corps ne  
peut pas seulement estre plastré, si nous  
voulons reparer les bresches de l'ame: Et  
a peine auons nous vn clin d'œil pour la  
terre, si nous voulons bien contempler le  
ciel. Batisse doncques qui voudra mettre  
son argent en pierres, & ses pierres en vn  
rien, Batisse qui voudra plustost le ma-  
çon avec la truelle & le mortier, que non  
pas la fortune avec des villes toutes faites  
a la main; Batisse qui voudra mieux le  
desir que la chose desirée, mieux l'em-

bryon en la matrice, que l'enfant au berceau, mieux vne galerie en sable & en mortier que Pampelonne en la large ceinture de ses murs, en la force de sa citadelle, en la richesse de ses Temples, en la beauté de ses maisons.

PAROLES d'angoisse soyés vous, non pas d'oracle n'y de prophetic: Vous pitoyables paroles, non moins ameres de fiel que trempées de douleur, (& quelles autres en pouuoit auoir vne pource & desolée Princesse au iour des funeraillies de só bôheur, & de la natiuité de sa misere) *Rey Dñ Iuan, Rey Don Iuan, Iuan de Labrit fuistes, & Iuan de Labrit sereys, porque vos ny vuestros sucesores nunca mas gozaran del Reyno de Navarra: Que si vos fuerades Reyna, y yo Rey, nunca se perdiera Navarra: Graüces soyés vous, genereuses paroles, sur le tombeau des successeurs de Catherine ceste noble Roine, qui n'ayans moins de force pour regagner sa courrône, qu'elle de foiblesse pour la perdre, armeront leur front contre la honte, & se laisseront choir la vaillance du cœur, côme elle fit ses larmes des yeux. Et vous aussi les larmes, vous ses tristes souspirs, non plus souspirs ny larmes, mais vens, & torrens puiffiés vous estre, pour*

renuerser la tyrannie du throsne royal,  
où elle ne sert que d'argument à l'impie-  
té, pour conclurre que le ciel est vn trop  
lent iusticier, & ne marche a la vengean-  
ce qu'à pieds de plomb.

PATIENCE, fille du ciel; vertu di-  
gne des Anges, Patience, & qu'elle pati-  
ence contre vn tyran qui ne peut rien  
compatir? Don Iean d'Albret Roy de Na-  
uarre, bon mesnager du repos de son peu-  
ple, cultiuoit soigneusement l'amitié de  
ses voisins, le respect & la fidelité deüe a  
la fleur de Lis, luy demeurant toute en-  
tiere en l'ame: Ferdinand de Castille, plus  
propres a procurer qu'à desfinir vne gran-  
de guerre, s'en fantasie vne contre Loys  
12. Roy de France, Vne onde contre vn  
rocher, vne corneille contre vn Aigle, en  
bon escrimeur pour faire coup, il fait vne  
feinte: Il en veut, dit il, au Roy de Frâce, &  
luy tarde plus d'en voir le corps que l'ô-  
bre, C'estoit vne chandelle: Papillon, Ou  
voulois tu aller? Aussi n'estoit ce pas son  
dessein: la Nauarre luy sèbloit vn bastion  
qui batoit droit sur la Castille & vn bou-  
leuart pour la canonner, C'estoit vne por-  
te ouuerte pour allumer les charbons &  
les braziers par toute l'Espagne: Nauarre

l'effueil de sa porte, le premier rencontre de ses yeux, l'Égypte, la Beaulle & le grenier de la Castille, Nauarre le iardin des Pheaces descrit par Homere, ou tousiours boutonnent & fleurissent les delices du Printemps, Il en voyoit la beauté, il en recognoissoit la fertilité. Pour donc reculer tout danger, & se preualoir du voisinage, il faillloit faire de nostre voisin, vn voisin nostre, & le remettre a la mesme plainte de ce citoyé Romain qui proscriit sous la tyrannie de Sylla, sous pretexte qu'il estoit partisan de Marius, s'escria douloureusement, *Helas, mal-heureux que ie suis ! ma maison d'Albe ma fait perdre.* Ferdinand doncques mande au Roy Dom Iean, & a la Royne Catherine sa femme, qu'il est tout resolu a la guerre contre Loys, & luy en porter le flambeau sur son Estat: A ces fins, qu'ils luy donnent passage par la Nauarre, & pour son asseurance les chasteaux d'Estelle, de Maia, & de S. Iean de pied-de port, Et en cas de refus leur denonce qu'en vertu de la sentence du Pape Iules, il leur otera non pas seulement la Nauarre, mais tout ce qu'ils possèdent en Frâce. Leurs Maiestés quoy que mises en apprehension pour les me-



naces, se souuiennent de l'hommage par elles rendu aux Roys de France pour plusieurs terres & seigneuries, & comme leur foy en estoit l'ostage ; Elles se tournent du costé du deuoir, & se resoluent au refus, & à la perte de leur estat, plustost que de leur felicité. Ferdinand qui prend ce iuste esconduit a vn rigoureux point d'honneur, manie dextrement la perfidie de Loys de Beaumont Conte de Lerin & Connestable de Nauarre, mutin effronté, vray artisan de rebellion, & qui faisoit vertu de faire le cheual eschappé contre son Prince : Par ses artifices Ferdinand met la plus part de la noblesse de Nauarre en desbauche, & la tourne de son parti; puis tout a coup prennant l'occasion au poil, il y iette vne forte armée souz la charge de Frederic de Tolède Duc d'Alue ; Don Iean assure sa vie au deça des Pyrenées, nul ne pare aux coups, la victoire triomphe & porte pour deuise, *Perdida es Nauarra.*

Ainsi doncques Dieu ne maintiendra plus le droit, voire tout nud, contre l'iniure armée ! Ainsi les Royaumes seront les legitimes heritages de la violence, & le partage des brigands ! Ainsi

se voleront les sceptres, les diademes & les manteaux de pourpre ! Vn bruit courut qu'Eumenes auoit esté surprins & tué par Perseus ; la loy du Royaume appelloit Attalus son frere à la succession. Il print le diademe Royal, mais auerti qu'il fut que tout estoit faux, il s'en alla au deuant du Roy, avec les gardes du corps, portant vne iaueline en la main comme les autres ; Eumenes l'ayant humainement receu, luy dit tout bas en l'oreille, *Vne autrefois ne te haste pas tant que tu ne m'ayes veü mort* : Vn frere donnera reprimende à son frere, seulement pour s'estre vn peu auancé a recueillir vne succession ; Et qu'on n'osera sonner mot a vn tyran ! qui pour mieux bazaner l'honneur d'un Roy de Nauarre aux yeux de l'Europe, tient sa tyrannie debout, sur son plein, tout establie, toute formee ; Qui donne liurée & qui fait porter l'escharpe a son crime ? Au lieu que les Prestres des Bacchanales en leurs ceremonies ordes & sales, forceans les filles, & faisans d'autres abominations, sonnoient des cors & des tabourins, de peur d'estre ouys : Au lieu que plusieurs en la honte de leurs fautes, donnent instruction aux autres de ne fail-

lit point, comme Hypocrates ce grand Medecin, publia luy mesmes ses erreurs sur les coustures de la teste de l'homme en l'anatomie, afin que les autres ne tombassent en semblable erreur.

Je seray homme lige de la France, iauray cautionné ma fidelité avec le gage de ma foy, & par droit de vasselage, ma vie, mes moyens & ma personne luy seront consacrés; Je seray engagé a suiure pied à pied sa fortune, iusqu'au certain hazard de ma vie; L'hommage que ie luy dois, me fera mesmes renôcer la nature, renier mon sang, & tousiours l'amour de mon seigneur me sera inuiolable & plus sacré, que celui de mes freres, de mes enfans, voire de mon propre pere, Et cependant qu'un autre a la qualité duquel ie ne dois aucun retour, & qui vit avec moy a l'egal & au pair, qu'il me fera donner passage a ses iniustes affections? Qu'il m'obligera au pariure, & a faire vne girouette de ma foy? Qu'il me cōtraindra au sacrilege & a violer ce saint respect que ie doi a moy Roy? Comme si l'honneur, le deuoir & la nature auoient moindre pouuoir sur moy, qu'une ambition insolente & forte en bouche! Comme si ie deuois me faire

sergeant des passion d'un tyran, qui en-  
 rant qu'il peut, naure profondement, &  
 blece iusqu'aux parties plus nobles la so-  
 cieté des hommes! Comme si ie deuois  
 faire espaule aux iniques desseins d'un  
 Roy de Castille, & laisser le mien, le Roy  
 de la fleur de Lys deuers le vent, luy tour-  
 ner le dos au besoin, prendre le large en  
 la plus grande presse de ses afflictions, &  
 faire place vuide à mon deuoir!

Et si ce doit estre vn coup auanturier,  
 coup de hazard, quand les paroles des  
 Princes se trouuent assises sur du sable  
 mouuant, & leurs promesses steriles &  
 sans effect; si leur foy doit estre stable &  
 non fugitiue, comme les images de Dæ-  
 dalus dans Platon, si c'est le pastel & le  
 premier reinct ou toutes leurs actions  
 doiuent estre trempées, la foy d'un Roy  
 de Nauarre ne deuoit elle pas tousiours  
 estre hors de brâsse, tousiours vierge sans  
 tache ny macule, tousiours sur le *Nom*, ou  
 trouper nouueaux dieux & nouueaux au-  
 diteurs, comme *Æschines* disoit des par-  
 jures?

Ainsi donc parfois Dieu semble fai-  
 re party avec la violence, pour secoüer  
 & porter la iustice par terre, mais tou-

siours en fin il tournera ses actions & les nostres à leur vray poinct, & tousiours demeurera veritable ce beau dire de Carton, *que le droit est souvent malade, mais qu'il ne meurt iamais.*

C E P E N D A N T si, comme on dit, les miserables tirent quelque allegement du mutuel rapport de leurs miseres, Vous deuriez Roys de Nauarre & de Portugal, pauures Princes, secoüés & battus du vent de Castille, en commune affliction, vous deuriez auoir larmes communes, soupirs & regrets communs, mettre vos tristesses ensemble, & tascher d'en tirer quelque consolation, comme la Theriaque se tire du venin des viperes.

H E L A S, mais hélas ! N'est-ce point encore pour chauffer à plus de poincts la maiesté d'Espaigne, & luy faire mener par le monde deux grands Roys en triomphe ? Et qui donna plus declat au nom de Pompée que ce Roy d'Armenie Tigra-nes, qui luy posa son diademe aux pieds, Et le Roy de Bithynie Nicomedes qui s'estant faißt raire la teste, & mettant vn chapeau-dessus, se declara serf affranchi du peuple Romain ?

V E R T U du ciel ! Vn Roy de France,



banni de son plus ancien heritage, tiré par le collet de sa maison, culbuté du haut du throne royal de ses ancestres ! Qui le croiroit ? A le voir en son Parismonde, dans son Louure, tout flamboyant des rayons d'une haute Maïesté, environné comme au ciel le soleil, d'un million de luisantes estoilles, Roy puissant, Roy redouté, Qui le croiroit ? Le voilà hors de la presse des afflictions, & à un haut période de felicité ; Il le cognoit, les yeux luy en rient, & le cœur luy en tressaut de ioye, Qui le croiroit ? Il est pourtāt banni, banni, banni, quoy qu'injustement banni, & nous sommes bien loing d'aller passer nos hyuers en Pampelonne contre le poignantes froidures de Paris, & d'arriuer à ce bon-heur des Roys de Perse, qui passoient la plus douce partie du printemps en Suse, leur esté en la Medie, & leur hyuer en Babilone.

LEst vray, Themistocles banni d'Athenes, disoit à ses enfans *qu'ils estoient perdus s'ils n'eussent esté perdus* : Mais comment parles-tu, Themistocles ? si comme bon citoyen d'Athenes, comment es-tu relegué en Perse ? si comme banni, Comment peux-tu parler en citoyen ? Et si tu

més citoyen, qui croira vn estranger, & vn banni, pire parfois qu'un estranger? Aussi certes le bannissement, la perte de nos biens & de nos honneurs iette d'extremes impatiences en nos ames, & poignent nos sentimens iusques au sang.

SCANDERBEG, Scanderbeg, fleur de toute cheualerie, n'a garde que pour estre Roy de France, tu eusses laissé la Nauarre entre les mains de ton ennemy, ny contemplé ton honneur en moindre estenduë que celle de la liberté de tous tes suiets: il ne te falloit rien en la Court du turc, que d'estre le grand Turc, ses belles resolutions sembloient toutes commander des nerfs & des arteres de ta sagesse, ses guerrieres executions des efforts de ta vaillance, & les peuples se mouuoient au seul vent de sa voix, animée par l'esprit de tes conseils; Aussi ne sembloit il auoir rien que pour toy, comme tu monstrois auoir tout pour luy, & ses affections se remuoient au bransle de ton desir. Les honneurs t'arriuoient en troupe, bien sur bien, & tu n'auois faute de plaisirs que par deffaut de volonté. Vn seul coup d'œil que tu iettes sur l'Albanie siege anciende tes predecesseurs, vne seu-

le œillade sur les subjets que le Roy Iean  
 ton pere t'auoit laissez en heritage, desia  
 douteux & branlant souz l'ambition du  
 Turc; Vn feul coup d'œil te remplist les  
 yeux de l'armes, & le cœur de compas-  
 sion: Tu vis les peuples que nature t'auoit  
 donné en protection, tu les vis soubz la  
 main d'Amurath, qui souspirans apres  
 leur liberté ne respiroient qu'apres leur  
 Prince naturel, crioient & criailloient a-  
 pres luy, comme les poussins apres la me-  
 re qu'ils ont perduë: Il n'y eut plus que  
 tenir, il fallut noyer ta bonne fortune aux  
 larmes de ton peuple, rachepter sa liberté  
 aux prix de tō sang, & laisser le repos pour  
 prendre le deuoir: Tu quittes Amurath,  
 & non tant en haine de son ingratitude,  
 que pour l'amour de tes subjets: car en bon  
 Roi, tu ne pouuois supporter la tyrannie.  
 Peu de gens en nombre, mais vn million  
 en courage, vous voyla sur les murs de  
 Croye, & aussi tost sur vous l'armée d'A-  
 murath, inuincible si vne armée le peut  
 estre par le nombre: Toute ta vie ne fut  
 plus qu'un combat ordinaire, l'Albanie  
 qu'un champ de bataille; Ialousie en toy,  
 ialousie en tes subjets, rage & fureur en ton  
 ennemy; Le Roy veut mourir pour son

peuple, le peuple pour son Roy, Et le tyran tressue de peine, pour noyer la liberté du peuple dans le sang de son Roy, & pour ne faire qu'un triomphe de l'amour de l'un & de la fidelité de l'autre: feu & flamme, batailles & trahisons, coups & playes firent ton conuoy & te conduirent au tombeau.

**P**LEURS & regrets suiues moy, & toy mon ame ne prends plus autre object de vertu que la vertu de Prince-Ange, Charitable Pelican, qui se blece pour ses petits, & qui pensant mourir retourne sa vie en sa mort: Et vous tous mes sens, recueillez vous pour ramasser son eclatante & non jamais perissable reputation, qui comme les beaux rayons du soleil s'est espandue par tous les coings du monde. Mais non, retenez vos l'armes, ne pleurez pas encore mes yeux, regardez moy ce grad guerrier Pópée qui passé en Afrique contre Domitius, gaigne sur luy vne grosse bataille; Voyez-le sur le chap l'espée au poing & tout rouge du sang de ses ennemis; Voyez à troupes le soldats qui arriuent autour de luy, & qui le veulent saluer Empereur; Voyez & pecez son refus, *Non, dit-il, le ne receuray point*

*cet honneur, tant que le rampart des ennemis sera debout : Que veut il dire ? Sur vn champ de bataille ou il estoit pour disputer de l'honneur, il refuse l'honneur ! Que veut il dire ? Certes qu'il ne faut point cha-  
 touiller la premiere aduventure, ny mettre son honneur au iour, iusqu'à tant qu'on voye ses ennemis rompus à platte cousture, sans espoir de ressource, rien de leurs force sur pieds, rien du nostre entre leurs mains nous aux franches coudées, & nostre honneur libre de tout danger : Belle instruction aux Princes pour leur monstrier comme il faut mesnager leur seureté par leurs forces, & leur honneur par leur seureté.*

*SIRE, si vostre France est assurée, & comme on dit, dans les murs de Semiramis, si elle est au dessus du vent, & au couuert de l'ambition d'Espaigne, qui ne seroit pas mesme contente des mondes innombrables d'Epicure, vous le iugerez au cheminer à droit & à gauche, en auant & en arriere; car d'une part rencontrant la franche Conté & de l'autre Naples & Milan, Voyant l'Espaigne en teste, & la Flandre à dos, ne direz vous pas vous-mesmes, Et quelle seureté?*



DITES seulement que la France est le moyen & le centre de la terre, aussi tost l'Espagne s'en dira la coque & la circonference; faites-en vn monde de merueilles, l'Espagne en fera le ciel; Si vn parc de lions, & l'Espagne ses murailles; Si vn temple de pieté & de deuotion, l'Espagne son cloestre: bref la France ne sera que le milieu des Espagnes, tousiours, tousiours enuironnée de ses ennemis qui luy serrent les flancs comme estroittes ceintures, *Et qu'elle seureté?*

LE propre à esloigner tout danger, c'est d'esloigner son ennemy, car s'il s'approche il vous pousse: s'il vous pousse, vo' voilà par terre. Carthage estoit bien loin de Rome, si fallut-il la voir de pieds en l'air: Et Pericles crioit tousiours aux Athéniens, qu'ils ostassét l'Isle d'Ægine, comme vne maille & vne chassie qui estoit en leur port de Pyrée: Icy tout au rebours, la Nauarre qui estoit jadis frontiere de la France à l'Espagne, l'est auioùrd'huy de l'Espagne à la France, *Et qu'elle seureté?*

LES qualitez actiues, disent les Philosophes, sont meilleures que les passives, & l'ambition qui s'accroist mesmes en la decroissance de nos iours, estant familiere &

liere & domestique aux Roys d'Espaigne les intellects agent des mal-heurs de la France, qui croira qu'ils ne soient plus portez au gain qu'à la perte, à pousser leur fortune en auant, plustost que la reculer, & a glorieusement triompher la victoire à la main, que non pas estre honteusement trainez apres la victoire? Et quelle seureté?

M A I S l'Espagnol, dit on, à contribué fa ioye, & au mariage du Roy, & en la naissance de son Dauphin, comme s'il auoit distillé son cœur aux nostres, ou qu'il fust parsonnier au bon-heur de la France.

H O M M E S trestous ie vous coniure, sommes nous hommes ou bestes brutes? Et qui ne scait que les courtoisies de la plus part des Princes sont leurs coutsteaux tranchans; l'amertume & le fiel de leurs cœurs vne transformation au miel de leur bouche? Conte de Prouence, si l'Ediguieres ce braue guerrier ne t'eust tant de fois donné le fouet; Nouveau seigneur de Genéue par escalade, si on n'eust estranglé tes soldats, & fait descendre par la corde bon nombre de tes Capitaines; Roy d'Italie, si la Royauté

consistoit en Chimeres; Prince des Gouë-  
strés, bossu Sauoyard, qu'estoit-ce ton  
arriuée en la Cour de mon Roy, qu'une  
mine contre sa personne & son Estat? Tes  
submissions que desloyautez? Tes pro-  
messes, que perfidies & trahisons horri-  
bles, & trop pour les Canibales, trop  
pour faire trouuer les Carthaginois no-  
uices en matiere de trahisons? Vermis-  
seau de nature, Pygmée de puissance, en-  
fançon en fait d'Estat, tousiours voudras  
tu estre semblable à ce tant renommé af-  
fronteur Antolycus, qui au plus grand  
effort de ses vices, sacrifiant à Mercure  
luy faisoit tout bas ceste priere, *Fay ô Dieu*  
*que mes larcins semblent charité, & mes*  
*pariures foy & bonne conscience?* Grand  
Negus de fantosmes, Soudan de vanitez,  
Empereur de foles imaginations, Prince  
Chimerique, Et iamais ne feras-tu ton  
profit, ny de ton pere, que les Roys de  
France ont mis en chemise, ny d'Amadee  
l'un de tes predecesseurs, qui sous Charles  
VII. durant les plus grandes incerti-  
tudes des affaires de France, auoit esté en  
sentinelle pour faire son profit de la con-  
fusion; Mais qui en fin s'auisant que la sa-  
ge prouidence de Dieu conduisoit l'œu-

ure de la restauration de cet Estat, & qu'il ne pouuoit faire ripaille sur les desordres, se retira a petit train à Ripaille, où il y auoit vne Abbaye des moynes de saint Maurice, & print dit l'histoire, grise robbe, long mantel, chapperon gris, courte cornette, & vn bonnet vermeil par dessus le Chapperon.

Ouy certes, l'Espagnol eut fait, s'il eust peu, comme en Euripide la forcierre Medee, ialouse que Glaucæ fille de Creon espousoit son amy Iason, luy enuoya vne couronne d'or le iour de ses nopces, & soudain qu'elle l'eut mise sur la teste la flamme y print, & Glaucæ mourut aussi tost: Ouy, de meilleur cœur, si pour crouffier nostre ieune Prince dans le berceau, il eust eu les monstres que Iunon employoit à la ruine d'Hercules: Ou des Contes de Monte-cucullo pour luy faire donner semblable morceau de Lombard que traistrement, & malheureusement en l'an 1536. Charles V. son ayeul fit mettre en la bouche du Dauphin de Viennois fils aîné du grand François. I.: Ouy, si la mine de ces tant horribles & monstureuses trahisons n'eust n'aguere prins vent, & que l'armee qu'on feignoit vou-



loir faire fondre en Argel, & les armes portées de Castille en Barcelonne eussent peu faire leur jeu sur la Prouence.

A v temps qui court, le cœur & la parole se tournent le dos, & celuy semble indigne de porter couronne, qui ne scait porter masque: La dissimulation est au iourd'huy le vray sceptre de la Royauté, & parler du fonds de l'estomac, comme Homere dit que parloit Vlysses, c'est aller hors de cadence, & grossierement donner vn sens litteral pour le mystique. Nain bazané; petit more d'Afrique, Cōbien proprement tu scais desiacoudre la peau du Renard ou celle du Lion ne peut atteindre! Que naïfvement tu imites le boucher qui gratte quand il veut tuer! l'Hyene qui doucement contrefait la voix des pasteurs pour les deuorer! Le Crocodil, qui pleure quand il veut faire son coup! Tu nous presentes la main & le baiser, tu sembles faire vn grand tresor de nostre amitié, & auoir le cœur touché de compassion de nos miseres passées: Et pourquoy? Non certes non pour vuider tes mains de l'honneur de la France, ny pour rafraischir comme d'vne sainte rosée les racines de la fleur de Lis, puis que



l'exhibition de l'œuvre est la preuue de l'amour : Non pour desmentir tes perfides & desloyales actions encore toutes fraiches , & faire trouuer veritable ce dire de Caton : *Que ceux qui font les grands maux , sont ceux qui les peuuent r'habiller.*

Mais comme tu vois la France non paisible, mais endormie, & qu'il te souuient de ce que disent les mariniers , que ces grands calmes sont volontiers presages de grandes tempestes ; Comme tu sçais que ton pere à mis l'huile & le bois pour entretenir l'embrasement de nos seditions , & que les François n'ont bronché qu'à mesure qu'il les pouffoit, voire que depuis le berceau de nostre Roy, il a esté empesché à bescher son sepulchre, & a ne luy laisser le front sans sueur, ny sa maison sans trouble, iusques à vouloir rendre la France comme ces Isles des Sirenes, ou l'on voyoit de loing les riuages rous couuerts de carnages, & blanchis d'ossements de morts : Comme tu crains le Demon de ce grand Roy de la fleur de Lys, & que tu te sens interessé avec luy de tant de vieilles querelles , & que sous les cendres de son iuste courroux, tousiours chaudes & viues pour la detention iniuste de la

Navarre, il peut trouuer des estincelles  
 d'un grand embrasement, & te faire cre-  
 uer sur le nez les apostumes que si lon-  
 guement ton pere à nourries sur le cœur  
 de la France: Comme tu recognois ta for-  
 tune mal riuée, & ton estat tout decou-  
 su: Comme tu vois ceste monarchie, qui  
 ayant eu ses symptomes & ses iours noirs  
 à aujourd'huy ses iours de banquet, quel-  
 le est en sa gaillardise, en son en bon  
 poinct, quelle va a bonds & cabriolles, le  
 pied en l'air, prest a tout mouuement, ses  
 bras portés à la guerre, & en humeur de  
 te dire, *grondes-tu Castillan?* Comme tu  
 recognois que l'inclination de nature à  
 la diuersité & au changement, paroist al-  
 sés aux diuers visages qu'elle donne à ses  
 actions, insqu'à ne trouuer rien aggre-  
 able sans opposition, non pas les beaux  
 rayons du soleil sans Eclipse, non les Co-  
 metes sans contraires mouuemens, non  
 la mer sans flux, & reflux, non l'air sans  
 girouëtter, tantost en vent, tantost en  
 nuées, autrefois en pluyes; Non la terre  
 sans la secouer par ie ne scay qu'els Es-  
 prits occultes, & ie ne scay quels se-  
 crets mouuemens; Tu ne crains que le  
 ciel changeant sa route & son influence

la France n'entre en quartier, & que les orages qui l'ont si long temps secouée ne fondent sur ta Castille; Ouy tu fais mise & despence de tout pour remedier à l'inconstance de fortune, & sembles parfois contrefaire le loup dont parle Ælian, qui estant saoul n'est plus loup, & passe à tra- uers vn troupeau sans l'offencer.

FRANÇOIS, trop aueugles François, Voila la mine de l'Espagnol, Voicy son jeu: Qu'on fouille tous les secrets de la Nature, on ne trouuera point de contraires plus pressans, plus vigoureux ny qui plus rudement s'entredonnent des coups à leur ruine, que ces deux Elemens ordinaires, *eau & feu*: Qu'on jette les yeux sur l'histoire, qu'on mette les actions de la Frâce & de l'Espagne en peincture & sur le papier; On verra que la Nature en son eau & en son feu n'a voulu donner qu'un type & vn patron de ses deux Monarchies naturellement, & par fatalité cōtraires & ennemies. Et que iamais, pauvre France! que tu ne recognoistras iamais, qu'un de tes malheurs viseraux, & qui te serre plus estroit le cœur & l'esprit, consiste à ne cognoistre point ceste contrarieté? Que iamais tu ne iugeras comme l'Espagnol,

mieux stylé que toy aux affaires du monde, te voyant sur pieds, ne peut voir le plain ny le rond de sa fortune, & comme là dessus il prend fort à propos sa leçon de la nature, de choses insensibles, du chaud & du froid, du sec & de l'humide, qui ne sont que trop sensibles & toujours portez à la ruine de leurs cōtraires? Comme il recueille ses forces, comme il roidit tous ses nerfs à la dissipation de toy son ennemie, l'eau de son feu, & les tenebres de sa lumiere? Chetive France, que bien tost tu serois portée par terre, & de pieds contremont, si le destin du ciel & l'ambition d'Espaigne te poufloïent d'un mesme coup! Mais quoy? seroit-ce doncques des Empires comme des eclairs, des tonnerres, & des furieuses bourrasques qui s'esvanouissent tout à coup? Cōme de certains animaux du Royaume de Pont, qui naissent & meurent en mesme iour? comme des potirons aussi tost venus aussi tost perdus? Non certes, si ce ne sont des Empires bastis sur des fondemens tumultuaires, qui chéent en decadence precipitée, & dont la vigueur se dissipe en un moment, comme Daniel appelle l'Empire des Macedoniens, Eclair: Mais vne

✽

grande Monarchie comme la France, qui peu à peu, de degré en degré, à ces accroissemens sans haste, plantée meurement par longs interualles, elle ne se renuerse point d'une boutade, ny d'une simple course; Le ciel en est le protecteur; l'ambition des tyrans y fait bris: elle tient fort contre l'iniure & la furie des siecles, & meisme le temps imperieux fait eschine à la necessité du destin. Ieu-ne Marrane, tu le recognois, & prenant en mystere ceste fable des Poëtes qui disent que Hercules fut engendré en une longue nuit, le iour ayant esté reculé contre l'ordre de nature, tu iuges tres-bien que les grands affaires ne se font pas tout a coup, & qu'un puissant Empire tel que la France, a les iambes trop agiles, les bras nerueux, les reins roides & forts contre ton fault de Breton. C'est pourquoy tu achemines tes desseins a longues haleines, & recognoissant en l'anatomie que ton pere a fait de la France, plusieurs mains rédues iusqu'aux bourses de Castille, & une inclination au mouuement & à la nouveauté, tu les dores afin qu'elles ne t'enferrent, & pour vider ceste Monarchie de vigueur & de force,



tu employes les richesses du Peru, comme vne forte medecine; si contagieux que tu ressembles au chien qui imprime sa rage en mordant, & que ton or à la mesme vertu que certaines pierres de Lybie, dont parle Plin, qui attachées à vn corps le corrompent & le gastent: Autrement ne nous heurterois tu point à viue force? ne ferois tu pas le braue & le vaillant à tour de bras, & ne viendrois tu point à nous ou de bond & de volée; sinon que ne pouuant écheller ny prendre ceste Monarchie d'assaut, il te faut aider de sappe & de mine, & faire comme les Argonautes, qui apres auoir delaislé Hercules, eurent recours aux sorcelleries & enchantemens de Medée?

PORTE-boëtes de Pandore, pierres affiloirs de desobeyssance, fuzils de sedition, portecols & originaux de routes les trahisons ourdies contre la sacrée personne de mon Roy, hoyaux pour sapper ceste Monarchie, furets d'Espagne, courratiers de son ambition, & qui comme ces femmes que Plutarque appelle Climacides, qui se courboient à quatre pieds pour seruir d'estrien aux femmes des Princes & des Roys, valetés par la

monde pour mettre l'Espagnol au dessus de monde, Agens & facteurs de l'Enfer, furies transfigurées en hommes, Iesuites en vn mot, Pourquoi semés vous insensiblement les passions de nos ennemis parmy les entrailles de la France? Pourquoi y preschés vous l'espée & le feu? Pourquoi y exhalés vous toutes les mauuaises & dangereuses vapeurs qui obscurcissent & offusquent l'obeissance & le respect des François vers leurs Prince vers leur Roy? Pourquoi faictes vous girouëtter, & pourquoy mettre leur fidelité en desbauche, sinon pour ne pouuoir de tyre & d'vne halaine porter le pied sur la gorge de cet Estat, & qu'il en va de la France, comme d'vn certain rocher pres de Harpasa ville d'Asie, tousiours ferme & sur son plain, si on le pousse de tout le corps, mais mobile a le toucher d'vn seul doigt? Cela doncques, estce la vouloir mettre son cœur en vnisson & en concordat avec la France? Est ce luy donner vn doux baiser d'amitié? Ceste trainée, ceste longue enfileure de perfidies, ne nous fera elle par en fin leuer la teste vn doigt haut de l'oreiller? d'ormirons nous tousiours sur ces affronts, sous ces four-

des iniures d'Espagne, & iamais ny aura il faison de vengeance pour la France?

SIRE, depuis que vos affaires se sont addoucies entre les mignardises du repos, ie ne scay par qu'elle humeur contraire a vostre naturel, vous tenés pour maxime, ( l'Espagnol le scait ) & ie le tien d'un des plus braues seigneurs de vostre Royaume, & des mieux cimentés à vostre seruice, Que par la paix vous gaignés cet auantage sur vos suiets, que necessairement ils apportent leur volonté & leur consentement à vostre obeissance; Au lieu que de la guerre ils vont à la licence, de la licence au mespris, & du mespris, à la rebellion. Mais, s'il vous plaist, iugés si cela peut estre vray en vn peuple guerrier & martial, qui n'a repos que lors qu'il a moins de repos, & qui pour mille & mille occasions & circonstances que la plume ne scauroit exprimer, ne peut seiourner avec la paix, qu'autant de temps qu'il luy faut a prendre haleine pour retourner a la guerre. SIRE, s'il vous plaist, recognoissés si la perfidie est allée si temerairement a vous, lors que sur le front de vos armées vous vous rendiés redoutable aux ennemis de la Fran-

ce, ou lors que la paix vous a fait croiser les bras, & sequestré vostre courage entre les douceurs du repos. Ha ! Maxime, que peu s'en a fallu, que tu n'ayes serui de plâche à l'Espagnol & au Sauoyard pour passer sur le ventre de cet Estat ! Maxime, funeste maxime, à combien pres tu nous as menés du bord de nostre ruine ! à combien pres des funerailles & de l'enterrement de nostre repos ? Repos, aille se vueille le repos, pourueu que le sang precieux de mon Prince demeure en ses veines, & que sa vie soit hors d'eschec, & hors du marché de ces malheureux courra-tiers de Madril & de Turin. Cruelles apprehensions ne me herissés plus le poil ; Horreurs, effroyables horreurs ne secoués plus mon ame, laissez mon cœur au large, mettés ma langue en liberté, afin que ie puisse dire à mon Roy, au grand Roy de la fleur de Lis, que la matiere pour remuer vn estat consiste aux moyens, & la forme en la volonté. Si donc vos suiets, SIRE, vo<sup>s</sup> sont suiets fidelles, & pourquoy remuer en temps de guerre ? Si traistres, & desloyaux, & pourquoy non en temps de paix ? Si foible, & comment remuer ? Si fortz & puissans, qui les empeschera ?

Tout Prince qui tient ses sujets capables de mettre son Estat en mouuement & en trouble, il raualle & rend son auctorité pietonne. S'il craint que les seigneurs de son Royaume ayent chacun vn dessein particulier, & non le general de son seruice, il leur donne sujet de se roidir, audace de s'enorgueillir, bride pour courir à l'abandon, dresser l'enseigne à toute licence & frayer le chemin à vne effrenée rebellion. Au contraire, il faut que son œil soit comme vn'horloge, qui regle toutes les actions de ses sujets, & qu'il se souuienne qu'il est Roy, Lieutenant de Dieu, arbitre de la vie & de la mort, le nerf qui donne mouuement à la Republique, le cœur & le chef qui la fait viure, & l'esprit vital qui l'anime. Il faut que tousiours sa Maiesté soit comme vne tour haut esleuée, d'où il se vange du mespris & de la rebellion, & que sa fureur rende les hommes sages, comme disoit le Roy de Thrace Cottys: Il faut que se tenant dans sa force, il monstre qu'il peut d'vn seul regard faire baisser les plus hauts fourcils, enuoyer cent pieds sous terre les plus crestez, & étouffer tous leurs desseins dans le berceau, luy comme vne



muraille hors d'escalade, de fappe & de batterie. Mais plus que tout, il faut qu'il ne soit pas seulement Roy, mais bon Roy, pere de son peuple, prudent œconome de leur bien, arc-boutant de leur liberté, tuteur, caution & depositaire de leurs vies. Car pour lors Dieu fera vne infusion & distillation du cœur de ses sujets au sien: Il ne viuront qu'en luy & pour luy: Ils ne respireront & n'aspireront qu'à son contentement, & tousiours au besoin ils auront la main prompte & les espées bien trechantes pour son seruice.

D'AILLEURS, SIRE, il ne faut pas reduire disent les sages, le gouuernement politique soubz des reigles generales, & en faire vne science vniuerselle. Car par fois appliquant les reigles où il faut appliquer les exceptions, on peruertit le iugement de toutes choses. La paix est bonne, Ouy vne paix qui ait tousiours l'honneur à main droite, qui marche à front leué, à yeux gais & rians, & qui a laissé son ennemy à mains vuides d'armes, le front tout blesme de peur, & l'ame secouée d'apprehensions. Mais vne paix honteuse, qui n'ose leuer les yeux deuant gens d'honneur, comme obligée à vne

amende honoraire & a perpetuelle en-  
femie, appelez vous cela paix? Ouy plu-  
stost vne sanglante guerre; Ouy feu &  
flamme, Ouy gehenne & bourreau en vne  
ame genereuse.

LE viel Appius entendant que le Se-  
nat de Rome apres vne grosse bataille  
que Pyrrhus auoit gaignee, entroit en  
pour parler de paix, ne la pouuant sup-  
porter, ayant perdu la veue, se fit porter  
a trauers la place iusques dans la sale du  
Senat, & entré qu'il fut, les gendres & ses  
enfans le tenans par dessous les bras au  
milieu des senateurs, il leur dit, Qu'au-  
parauant il auoit eu regret d'estre priué  
des yeux, mais que lors il souhaitteroit  
mesmes de ne rien ouyr, afin qu'il n'en-  
tendist point les vilains conseils qu'ils  
prenoient. Et apres, partie en les re-  
prennant aigrement, partie en leur re-  
monstrant & les excitant, il fit en sorte  
qu'il leur persuade de remettre prompte-  
ment les mains aux armes, pour com-  
battre Pyrrhus, & de luy faire ceste res-  
ponse, *que si Pyrrhus desiroit l'amitié &  
l'alliance des Romains, il faillait qu'il sor-  
tist premierement de l'Italie, & puis qu'alors  
il les enuoyast rechercher de Paix; Mais tant*

qu'il seroit dans l'Italie, les Romains luy feroient la guerre de toute leur puissance, quand bien il auroit battu & deffait dix mil tels Capitaines que *Levinus*.

BRAVE & genereuse resolution; Brauade de victorieux, & non pas submission de vaincus; responses d'hommes qui ont plus de courage que de force; belles & fieres paroles, que vous deuriez bien poindre au cœur, que viüement vous deuriez frapper l'ame à vn Roy de France, pour faire sonner retraitte à l'Espagnol, & luy faire dire Adieu, vn pour iamais Adieu à la Nauarre, tournant le dos, fuyant à course, à toute course vers l'Escorial, fuyant & tremblant sous la fureur de ses paroles, comme sous vn tonnerre grondant & grommelant dans la nuë, De quel droit, *Vertu S. Gris*, de quelle aucttorité fais tu fouche en la terre de mes maiens? Qui ta mis mon sceptre à la main? Qui t'a mis ma couronne sur la teste? Sur quelle loy bastis tu ton usurpation? Quel iuste tiltre as-tu sur mes sujets? Ne seras tu iamais pleine, *Cue des Danaïdes*? Feras tu tousiours pied sur le fonds d'autrui. O ambition, & l'histoire grossira elle tousiours de *Tragædies* que tu excites? Insatiable Tentale à quoy penses tu?

VOIRE mais, direz vous, la possession de l'Espagnol qui semble auoir entiere-ment prins son ferme sur vne longue suite d'annees, & peu s'en faut sur l'autorité d'un siecle, rend aujourd'huy sa cause specieuse, & luy donne assez de couleur pour l'obliger à la defendre.

Ouy, si les espées de la France n'auoient souuent faict iour, & entrouuert ceste iniuste possession; Ouy, si le droit des Princes estoit hommager du temps, & que la violence eust aucune faculté de prescrire; Ouy si par le traitté de paix faict à Noyon en l'an 1516. entre François I. & Charles d'Autriche, il n'auoit esté expressement conuenu, *que dans six mois Charles rendroit le Royaume de Navarre à Henry d'Albret, fils pupille, orphelin de Iean d'Albret & de Catherine de Foix decedez celle mesme année.* Ouy, si nous deuons gratifier les ouurages de nos predecesseurs, emologuer leurs fautes par les nostres, & faire vne trainee, & comme vne enfileure de crimes avec crimes; Ouy, si les vices de nos peres se deuoient prouiguer en nous; & si Cain debuoit mettre la main au sang d'Abel, par ce qu'Adam auoit leué le sourcil d'impieté,

& fait le seditieux contre le ciel.

QUEL qui tu sois, docte escriuain, tu loges tresbien la verité avec tes belles paroles: En peu de termes, mais tous pleins d'esprit & de sang tu fais voir au monde l'iniustice de l'Espagnol en la detention de la Nauarre: Il scait dis-tu, qu'il retient iniustement l'heritage de la Royne Catherine; que ce ver à rongé l'esprit de son pere au liét de la mort: De son viuant il se flattoit sur la puissance du Pape Iules, mais l'apprehension d'aller comparoir deuant le grand maistre, deuant le grand iuge, luy a fait dresser les cheueux en la teste: Alors les flatteries de son Inquisition, les flatteries de ses Iesuistes ne l'ont peu garentir contre sa propre conscience; Il a fallu parler, il a fallu tester, & donner soulagement à ceste inquietude, à ce flambeau à ces gehennes.

O VY certes, Philippe son pere, que rous les vices auoient abordé à pleine vague, & duquel on ne peut louer la vie que par paradoxe, & vie plus digne de compassion que d'imitation, au partir de ce monde, en la puantise de ses vlceres, en la fourmilliere de ses poulx, es bourrasques, qui travailloient sa timide conscience, es furieux eslancemens qui



battoient son cœur & sa bouche, tous les nerfs, & les muscles luy deuoient estre comme ces anatomies seiches que les Egyptiens faisoient porter au milieu des festins, comme a dire aux conuies qu'en peu de temps ils seroient tels; son ame seichée d'un chaut brazier de l'indignation du ciel, toute brisée d'une perpetuelle gehenne d'ennuy, & d'une torture de la iustice diuine, ses tristes & douloureuses parolles, toutes trempées en fiel & en amertume, ses souspirs redoublés, ses mouuemens extraordinaires, & qui monstroient qu'il craignoit l'ire du ciel en sa mort, pour n'en auoir craint les menaces en sa vie; Mais sur tout ce bourreau, ce non mourant soucy qui le gesnoit, ces torches, ces furies qui le bourreloient, ces gehennes, ces fleaux, precurseurs de l'Enfer, ceste furieuse apprehension de sa tyrannie sur la Nauarre, la plus mordante tenaille de son ame, le faisoit en son testament souspirer apres son fils, pour en faire la restitution; Tout cela quoy que venant d'un mauuais pere, deuroit seruir au fils d'instruction pour le bien; comme on dit que les Nancratiens se seruoient des os d'un asne, grosse & lour-

de beste , esloignée de toute doucer & harmonie de musique , pour en faire des instruments fort melodieux.

M A R S n'a garde ce jeune Ixion , de quitter prinse. Iamais tyran ne fit pas d'ecreuille , & ne surachepta son repos : Il a tousiours la goutte , quand il faut sortir du throne , ou il est couru à pieds de cerf. La mer qui monte en cinq heures & ne descend qu'en sept, est son grand chemin de Saint Iaques , le quadran de sa route ; & son vsurpation à la mesme friandise que ce fruit delicieux des Lophages , qui faisoit perdre à ceux qui en auoient gousté l'enuie de retourner en leur pays. Autrement pourquoy est-ce que ce Roy Egyptien Mycernice se fust resolu à doubler sa vie en depit de l'oracle & du Destin ? Pourquoy Denis ce tyran de Sytacuse , sur le point d'estre emporté à vne mort honteuse , s'il ne rabatoit quelque chose de ses rigueurs, pour quoy eust-il dit , voyant vn boucher qui d'un seul coup assomma vn bœuf , *Dea ! pour crainte de la mort qui dure si peu , quitteray-ie vne si ample, & belle seigneurie ?*

A l'enfourner se font les pains cornus : Nos premieres actiōs premices & preiu-

gés du reste de nostre vie sont suiettes  
aux ombrages; sur tout celle des Roys,  
disoit Trajan, sont les buttes ordinaires  
de la Calomnie, iusques à vouloir faire  
trouuer que les verrues & les lentilles,  
sont des balafres & des cicatrices au vi-  
sage d'un Prince. Que voudroit on donc-  
ques? Peut estre qu'apres la mort de Phi-  
lippe, la grandeur d'Espagne semblast  
aux corps mourans, d'où quand l'ame en  
est dehors, les parties s'entrelaissent & se  
destachent l'une d'auec l'autre. Qu'elle  
vaguast tantost çà, tantost là, bronchant  
& choppan à tout propos, comme Leo-  
sthenes disoit, qu'apres la mort d'Ale-  
xandre, la puissance errante s'entreheur-  
tant soy mesmes, ressembloit au Cyclope  
Polyphemus, qui apres son aueuglement  
tastoit tout de la main? *ms. O. 6. 28. 95*

Non, non, il faut prendre autre po-  
sture, & marcher d'un autre pied. Ale-  
xandre trouua en Perse la sepulture du  
grand Cyrus, avec ceste inscription, *le*  
*suis Cyrus qui conquist l'Empire des Perses,*  
*qu'on ne porte point d'enuie a ce peu de terre*  
*qui couure mon pauvre corps.* La compas-  
sion, dit l'histoire, luy serra le cœur pour  
l'incertitude des choses humaines: Re-

tourné de voir ce sepulcre, il conuia ses Capitaines & ses amis avec vne couronne de prix de six cens escus pour celuy qui boiroit le mieux; Promachus la gaigna, & peu de iours apres Alexandre espousa Statyra l'vne des filles de Darius:

Qv'a fait l'Espagnol? Il a veu l'hydeuse mort, & mort trois & quatre fois hydeuse de Philippe son pere; Et comme ces domestiques calamités sont tousiours accueillies de pleurs, & lamentations, ceste mort à quelque peu touché sa vie; mais aussi tost les torches nuptiales furent allumées, & petit de corlage il print vne femme plus petite, pour faire la nique & se mocquer des Ephores de Lacedemone qui condamnerent leur Roy Archidamus à l'amende, pour auoir prins vne petite femme, *D'autant*, disoient-ils, *qu'il leur feroit des Roitelets, non pas des Reys.*

IUGEZ par ces premiers termes d'imitation, s'il ourdira grossierement la toile de son honneur, & s'il se monstrea court d'haleines & de courage. Iugez s'il monstrea vn cœur deliuré de ceste loy interne de conscience, qui sert de bourreau aux ames criminelles, & degagé du



sentiment interieur de son iniustice; Iugez si pour l'apprehension d'une guerre, il desmordra & vuidera ses mains de la Nauarre, puis qu'Alexandre son patron & son modele, recherché d'appoinctement par Darius, ne respondit qu'un mot, *Regarde, dit il, ou tu m'as trouué; l'ay desia outrepassé ce que tu me presentes; Il faut parler d'accord ou de combat sur ce qui reste, car tout ce qui est derriere moy ne se peut mettre en compromis.* Non, non, de tout temps l'Espagnol est trop soucieux, & bon mesnager de sa reputation, & rien ne luy est à desir plus singulier que de se tenir au bruiet commun, & à l'opinion du vulgaire, qui comme il admire les foudres & tónerres, sans tenir cõte des doux Zephirs, aussi n'estime il que les Princes qui braues & courageux vont adioignant à leur Estat nouuelles Prouinces, & qui par leurs armes se font estimer & craindre à leurs voisins. Mourir donc, plustost mourir, que de voir le François au portes de Castille, & aussi pres de luy, comme il est pres de la France; L'ombre de l'ennemy porte contagion, & iamais Prince qui laissa muguetter sa frontiere ne tint sa fortune au large ny à franchises coudees.

ENCORE



E N C O R E parfoisl'Eſpagnol pour  
 mieux ſ'eſpanoüir aux beaux iours de ſa  
 proſperité, & faire le plaſant entre ſes  
 courtiſans, il ſ'eſtend en vanitez & en  
 ſornettes, yo, dit-il, yo no ſoy, mas ſon mis  
*Caualleros qui occupan la Nauarra.* Que  
 diſ-tu, Tyran hereditaire? Et ſi l'opinion  
 de probité & de vertu, qui ſont les nerfs  
 de la perſuaſion te mâque, que penſes-tu  
 perſuader? Les Romains armeront ſouz  
 Pompée vne puiffante flotte de vaiſſeaux  
 pour nettoyer la mer de Pyrates; Au-  
 guſte promettra XXV. mil eſcus à ce-  
 luy qui luy portera la teſte de ce voleur  
 inſigne Crocotas; Dragon fera pendre  
 vn homme pour auoir derobé vn chou;  
 Et tu feras gloire comme vn nouveau  
 Crocotas d'eſtre Roy de larrons & de  
 voleurs, ſans ſentiment, ſans cognoiſſan-  
 ce combien cela porte & rabbat ſur ton  
 honneur? Car ſi la Loy punit de meſme  
 peine celuy qui recele le larcin, & celuy  
 qui le fait, quelle diſpenſe, quel priuilege  
 as tu contre la Loy? Ou voudrois-tu  
 point faire comme le dieu du Stoique  
 Planetiades, qui chaffoit le vice par la  
 porte de deuant, & le receuoit par celle  
 de derriere?

**D**E V X mots à l'oreille, Castillan; Il faut de trois choses l'une. Ou que tu par-  
rages avec Pompée le blasme qu'on luy  
dône d'auoir secouru quelques corsaires  
contre Metellus, & presté la sauue-garde  
de son nom à de meschans larrons, qui  
n'auoient ni Dieu ni loy, & de leur auoir  
attaché son autorité, cōme vn preserua-  
tif contre la mort: Ou que pour appre-  
hension de quelque amēde, tu presentes  
tes Caualleros aux rigueurs de la loy,  
ainsi que fit le mesme Pompée, qui appe-  
lé en Iustice comme heritier de son pere,  
accusé de larcin & maluersation es de-  
niers publicqs, descouurit & auera que  
c'estoit vn de ses serfs affranchis, qui en a-  
uoir eu la meilleure part, & le representa  
aux Iuges; Ou bien que ne pouuant don-  
ner sel & faueur à tes sornettes, ny les af-  
faisonner d'aucune grace, tu faces tout  
en despit des Musēs, comme ces Poètes  
Comiques de Megare, qui sans aucun ar-  
tifice, introduisent des boufonneries  
hors de propos, pour donner à rire aux  
spectateurs. Au premier cas tu feras l'au-  
dacieux; au second le chien couchant; au  
troisiesme, le charlatan & le badin.

**I**L ne nous chaud plus, Roy de Ca-

stille, de ceste vaine trainée des tiltres à  
 longue queue, *Don Philippe por la gracia  
 de Dios Rey de Castille, d'Aragon, de las  
 Sicilias de Ierusalem &c.* comme si tu vou-  
 lois accoupler ton honneur à l'honneur  
 de Dieu, queles Grecs appellent Miryo-  
 nimos, qui a noms infinis. Le Roy Fran-  
 çois I. nous donna assés à rire, quand  
 pour se mocquer de la vanité de ton  
 ayeul Charles, il mit en vn sien cartel de  
 deffi, *François par la grace de Dieu Roy de  
 Gentilhy*. Seulement le fiel nous grossit  
 & les esprits nous fument, lors que pour  
 mettre ta grandeur sur les rangs, l'auan-  
 cer & luy donner credit par l'Europe, tu  
 braues & tiens le sourcil haut, comme si  
 les elemens te deuoient faire place, cō-  
 me si frappant du pied en terre, tu en de-  
 uois faire sortir des legions, voire com-  
 me si sans crainte du foudre, tu deuois  
 conduire le chariot du Soleil. Toute pa-  
 tience nous eschape, quand parlant en  
 termes de superieur, paroles pleines de  
 brauades, de desdain & de menaces, tu  
 dis qu'on a beau faire de se courroucer  
 contre la mer & les vagues, mais que  
 tousiours tu demeureras en droit, & en  
 liberté d'offencer vn Roy de France, &

de luy porter des affrons au nés: Et qu'entant qu'ils fait tiltrent aujourdhuy Roys de Nauarre, ce sont comme des chiens d'Esope, qui laissent la chair pour l'ombre; qu'en bon mesnager, tu leur laisses les fueilles des arbres pour les fleurs & les fruiçts; & en loup hardy, le béelement des brebis, pour la laine, la chair & le sang; concluant par vne resolute menace, que malgré tout le monde, Nauarre te demeurera, soit ou pour sa beauté & fertilité, ou soit pour te seruir de parapet contre la France, ainsi qu'on dit que la Belete a enuie de manger la Chauue-souris, ou par ce qu'elle est oyseau, ou par ce qu'elle est rat.

HENRY IIII. mon grand Prince, à qui iamais tonnere de Canons, non gresse d'arquebusades, non le foudre du ciel n'a peu faire baisser la veüe, fermez les yeux, faites l'aveugle; Ostez leur, ostez a vos yeux ce honteux objet des chaisnes de Nauarre attachees aux armoiries de Castille: fermez-les, fermez vos yeux, MON PRINCE, & ne vueillez voir sur les murs de Pampelonne vostre ennemy, l'hereditaire ennemy de la France, porter les bras en arcade, tenir



le sourcil a deux doigts des nuës, vous faire la nique, & fierement vous dire, *Me voicy, qui en veut?* Voyés comme apres vous auoir rendu Ardres, Calais Dourlans, Amiens, &c. sur l'instance que vos Ambassadeurs luy font de rēdre la Nauarre, il ne respond qu'en brocardant, & par raport de chose semblable, *Philippe de Macedone auoit fait plusieurs prisonniers Atheniens en la bataille de Cheronee, & les ayans renuoyez sans rançon, ils se vindrent plaindre qu'on leur retenoit les accoustremens*, Dea dit alors Philippe, *Ces Atheniens pensent que nous les ayons vaincus au jeu des offeletz*: Et n'est-ce pas a nous, dit l'Espagnol, d'auoir tousiours barres sur la France, pour auoir & meilleure haleine & le pied plus viste? Et que peut elle faire de moins que de nous laisser la Nauarre, comme on dit que Demetrius faccordant avec les Rhodiens leur laissa sa grande machine de guerre, que s'appelloit *Heliopolis*, Engin à prendre villes?

ENCORE VNC COUP MON ROY, faites l'aneugle, fermés les yeux, Ostés leur ce triste spectacle de vos pauvres suiets à teste raze pour liurée de leur seruitude, & a yeux contre terre, comme Garde-



feaux de leur honte, & qui peu asseurez  
 dans le retranchement de leur silence  
 peuuent a peine auoir sauf-conduit de  
 leurs yeux a leurs iouës pour leurs lar-  
 mes, a peine libre commerce de l'air a  
 leurs poulmons pour leurs souspirs: En-  
 core l'homme condamné sans ressource  
 d'appel, peut protester de son innocence  
 par ses larmes; les souspirs ne luy sont  
 point deffendus; la bouche luy demeure  
 libre & franche, & s'il ne peut rien sur  
 les hommes, il peut du moins beaucoup  
 sur le ciel. Et non sans cause le Poëte  
*Æschille* condamné en vn ieu de prix,  
 contre certains Poëtes ignorans, en ap-  
 pela au temps & l'Eternité; Et s'il n'y a  
 rien de pl<sup>9</sup> naturel que la parole pour ex-  
 primer nos conceptions, les larmes pour  
 escouler nos douleurs, les souspirs pour  
 esuëter nos afflictions, quel pouuoir, quel  
 effet de la nature en ces pources esclaves  
 contre nature? Parler, Ouy, mais entre-  
 dens de leur misere & calamité, consonâ-  
 tes & voyëles qui forment les mots, &  
 mots qui expriment en trop longues perio-  
 des la grandeur & la Maïesté d'Espagne:  
 Ouy pleurer, mais comme sponges es-  
 praintes de la main, & souspirer com-

me heraults de la puissance du Tyran.

Eux pourtant ces miserables sacrifiez à vne fieuve continuë, & aux effects d'une absolue tyrannie, qui voyent tout leur hōneur rauallé de cours & d'estime, l'honneur l'assaisonnement de toutes les faueurs de fortune, voire iusques à n'en pouuoir esperer qu'un, qui est de desesperer de tous; Eux encore ces bons sujets, protestent qu'en la perte de leurs Roys naturels, ils ont tousiours gardé la clef de leurs cœurs & de leurs volonteiz à la Royauté, le pole & le seul puiot où toutes leurs affections se sont contournées; Que tousiours leurs ames ont esté au large & en pleine liberté, leurs cœurs hors de la prise de la tyrānie, leur fidelité toute entiere sous la presse des afflictions & que tousiours, SIRE, à yeux fermez sur la bonne fortune de vous leur Roy naturel, comme sur vn autel de frāchise, nourris du laiēt d'une douce esperance, & esleuez par l'accroissement de vostre vertu & au bruit de vos victoires; Ils se sont tousiours promis que vous rachep-teriez leurs miseres & accourciriez leurs maux au prix mesme de vostre sang.

MERVEILLE, qu'un peuple qui a

ses volonte<sup>z</sup> suiettes au changement, à  
 fief & à hommage de l'inconstance; Peu-  
 ple qui d'une extremité court à l'autre,  
 troupeau qui suit ceux qui le mènent,  
 la vague & le vuide de l'eau, capable de  
 s'enfler & s'esmouuoir où le premier  
 vent le pousse, qui ne dure gueres en son  
 ardeur, & perd sa force comme vn roseau  
 qui commence par vn tuyau long &  
 droit, & soudain se nouë & se tord, ayant  
 perdu la vigueur qu'il monstroït à sa  
 premiere veuë; Que ce peuple, au chan-  
 gement de fortune ne soit point allé au  
 change de volonté! Que le vent des af-  
 flictions n'ait point remué ny renuersé  
 ses affections! Que la fidelité ait esté gar-  
 dée en son cœur comme la semence au  
 sein de la terre parmy l'hyuer, souz es-  
 perance de s'aider de leur Roy, comme  
 les abeilles des fleurs, qu'elles ne recher-  
 chent pas pour la senteur ni pour la cou-  
 leur, mais pour en tirer du miel!

MERVEILLE, que l'accoustumance  
 & familiarité ait vne merueilleuse force  
 pour conduire la disposition à ce qui luy  
 est familier! Que les semences tirent la  
 qualité de la terre où elles sont transpor-  
 tées, & que les esprits & les mœurs des

hommes se conforment a ceux avec lesquels ils conuersent ordinairement! Merueille, qu'il passe par contagion és choses des vnes aux autres vne grande part de leur nature, & que la vigne qui croist pres de la mandragore en tire par infusion sa force & sa vertu, de sorte que le vin qui en vient endort doucement & gracieusement ceux qui en boient! Merueille, que sans y penser & insensiblement ceux qui cheminent au soleil, se halent, se colerent & changent de teinture; Et cependant que les Nauarrois n'ayent iamais peu prendre le ply ny la teinture d'Espagne, semblables aux poissons qui ont ceste propriété de naistre en la mer sans en tirer la salure.

IL est vray, SIRE, ils laissent faire son cours au mal, car la prouidence de Dieu ne reluit pas moins en l'affliction qu'en la prosperité des hommes, ny en l'esbranlement qu'en la fermeté des Empires; Mais comme le secret & le silence sont l'ame de la conspiration, ils se retranchent encore dans leur silence, & donnent du pain d'hypocrisie pour des pierres de violence.

QUE feroient-ils? Ils ont perdu leur



Tramontane de veüe, & ne voyent qu'e-  
cueils & rochers, abandonnez de leur le-  
gitime pilote; l'Orion de Castille droit a  
plomb sur eux, l'air tout noircy, les vens  
en haleine, les ondes grossies, & nul port  
qu'une tyrannie establie & toute formée  
*Que feroient-ils?* Tendroiët-ils sans discre-  
tion les bras contre un torrent? Feroient  
ils bris contre la force, & mettroient-ils  
la dernière table de leur naufrage à la dis-  
cretion du vent & de la tempeste? Anni-  
bal celuy qui sçauoit cōbien valoit l'aul-  
ne de la fortune, tantost sur le col, tantost  
sous les pieds de ses ennemis; Ores ayāt  
leur dos à la poindte de son espée, ores la  
poindte de leurs pieds sur ses talons  
maintenant battant, maintenant battu,  
rousiours a tours, à viruoltes, eschine en  
haut, eschine en bas, sans iamais se pou-  
voir affermir sur la victoire; Ha! que fait  
il en fin batant des flancs & à la grosse  
haleine? Que fait-il recognoissant qu'en  
la vicissitude du monde & des Empires  
la gloire mesmes des Rois à sa decaden-  
ce, comme les hommes ont leurs ac-  
croissemens, & leurs declinaisons, &  
qu'il faut que ce qu'on a veu en la fleur  
de virilité roule pas a pas de l'eschelle, &



decroisse d'heure en heure iusqu'à sa ruine? Que fait-il, voyant la fortune comme enyurée de son sang, en horreur pour ses playes, mal contenté de sa teste blanche, amoureuse de la ieunesse de Scipion, & qui pour gage d'amour plante ses armes au pied des murs de Carthage; Mais ouy, que fait pour lors ce grâd guerrier? Il se combat soy-mesmes, & fait la guerre à son propre naturel; Il persuade la paix à ses citoyens, & ne veut pas qu'ayant la force & la necessité à leurs portes, ils facent barriere de desespoir. Et bien en print aux Siciliens, ô seuer & incorruptible Caton, de suiure l'aduis que tu leur donnas partant de Syracuse pour aller trouuer Pompée, de faire ioug aux armes victorieuses de Cæsar!

Que feroient-ils? Peut estre comme ce Creon des Poëtes, qui voyant sa fille toute en feu, la courut embrasser, s'embraza & se brusta avec elle. Il faut laisser courir la chance, & peu façonné aux affaires du monde est celuy qui iouë à bander & à racler, quand la fortune gronde, & ne prend point plaisir à ses actions: Il faut, il le faut, affermir son courage sur la iustice de ce grand ouurier du ciel, si

adroit qu'il tire de mesme cause contraires effectz, cōme de mesmes lettres transposées nous cōposōs des mots tous differés. merueilleux ouurier, qui redresse nos affections par nos afflictions, qui de la vipere de nos vices, tire la salutaire theriaque de la vertu, & *qui aime mieux*, dit S. Augustin, *conuertir le mal en bien, que de ne permettre point le mal*. Il faut s'asseurer qu'en ce rencontre alternatif des affaires du monde, les afflictions se transforment en prosperitez, & qu'il y a temps de perdre & temps de gagner, comme Antiphanes disoit, qu'il y auoit vn païs où les paroles geloient en hyuer & au printemps se degeloient. Iamais desespoir ne se peut excuser, non pas quand il auroit la mort en crouppe, Aussi de deux Consuls qui se trouuerēt au carnage de Cannes, Varron qui s'en est fuy fut plus estimé que Paulus Æmylius qui voulut mourir sur le champ de bataille, & graces publiques luy furent renduës par le Senat, de ce qu'il n'auoit point desesperé de la Republique.

Tous iours doncques & tousiours SIRE, la fidelité de vos Natiarrois, s'approfondit en racines, & ne se pouuant

fanir par le temps, elle demeure en verdure sur les ruines de leurs anciens Princes, comme le lierre parmi les vieilles mazures d'un superbe & iadis magnifique bastiment : Toujours & aujour-d'huy plus que tousiours en ce haut période de felicité, en l'Ascendant de vostre fortune, & que les beaux rayons de vos prosperitez font iour au monde, Vostre peuple, ce fidele & bon peuple de Nauarre, tourne les yeux sur vous, Ainsi qu'on dit des cheures de Candie, qu'à l'instant que l'estoille Caniculaire monte sur leur Horizon, elles se tournent toutes deuers l'Orient; comme si l'Aube de son bon-heur commençoit a poindre, & comme si la tyrannie de Castille se mettoit au liect, au leuer de la Royauté Françoisé : Toujours à pied ferme ce bon peuple attend le retour de sa fortune, & au rebours des mechans qui se seruent du temps, il veut seruir au temps, comme volontiers il auient en ces grandes tourmentes, ou les meilleurs pilotes demeurent à bras croisez, attendant le remede que le ciel leur ouurira. Aussi disoit tresbien Sertorius, que le temps est le plus cerrain remede de

ceux qui attendent; Et quand Pandore nous apporta la boëtte des maux en terre, on dit que l'Esperance demeura au fonds de la boëtte.

**D**O V C E & plus que douce **E S P E R A N C E**, en termes trop generaux appellée par Platon, *le songe de ceux qui veillent*, Esperance, l'ordinaire ressource de nos infortunes, & le tresor des plus necessiteux, comme disoit le sage Thales; Esperance la Nicosiane des playes, & le miel des plus ameres douleurs de nos ames; Douce Esperance, ne serois tu donc qu'un fantosme, rien que du vent, rien que fumée? Et vous haute & luisante Maïesté, vous redoutable fortune de mon Prince, seriez vous point un arbre qui porteroit fleurs sans fruit, & comme ces pommes qui croissent pres du Lac de Sodome, pommes qui n'ont rien qu'une vaine apparence de pommes? Qu'en ceste ardente affection de vos suiets, en ces angoisses de l'honneur & du deuoir, en ces crises si euidens, vous ne vous aiderés pas de la guerre à la guise & façon que Galien ordonne d'vsar en ceste sorte de medicamens, qu'il nomme *les mains des dieux* en maladies perilleuses, & en santé total-



lement deploreë : Qu'en vne action si haute, & de tel poids vous ne conceurés point des conceptions fortes, & courageuses? Que vous ne mettrés point la tyrannie a l'estroit? Que vous ne l'engagerés point au saut perilleux; Et qu'en telle occurrence vn grand Roy de la fleur de Lis ne paroistra point, comme vn grand vent, qui se leue en pleine mer, qui ammoncele vagues sur vagues, & bruyant & sifflant emporte ce qu'il treuve?

Q V A N D nous voyons en la ville d'Afgos Aratus qui vieillit plus d'ennuy que d'annees, & qui iour & nuict fait la guerre à son propre repos, ne la pouuant faire au tyran de sa patrie, ne comparissons-nous a son mal, & ne sommes nous pas touchés de douleur, par vne sensible reflexion de la sienne? Mais aussi quand resolu à sa mort, ou a la liberté de son pais, quand avec vne poignée de gens nous le voyons sur les murs de Sicyone, & à la porte du tyran aussi tost que sur les murs, le flambeau en la main pour le nid de la tyrannie, & la liberté en la bouche pour sa chere patrie; Quel cœur ne s'espanouit d'ayse, & quelle ame ne s'ouure pour accueillir & bien



veigner la memoire? Courage, MON PRINCE, & que l'exemple d'Aratus soit comme vne douce pluye, qui faiët germer en vous de braues & genereux desseins: Permettez qu'il trouue vostre ame toute desoulphre & de bitume, pour au feu de son imitation l'embrazer & en faire vn grand flambeau qui reluisse par tout l'Vniuers: Permettez qu'il tire de vous comme le fuzil du caillou, ceste estincelle de feu diuin que vous auez au cœur, afin qu'il semble que vous ayés iadis chassé la tyrannie de la ville de Sicyone, & qu'auourd'huy Aratus l'espée au poing marche droit, & vous appelle en Nauarre; O que sa voix vous doit bien estre plus agreable que celle de la trompette, qui appelloit pour entrer en lice ceux qui se presentoient aux ieux Olympiques!

ET de tant plus volonriers, SIRE deuriés vous a perte d'haleine courirà vn dessein si glorieux, vo<sup>e</sup> encore tout verd & d'ans & de courage, que vous voyés en moindre occasion, & en occurence moins necessaire vn vieillard ia tout estainct se r'allumer & resusciter vn grand Roy en l'aage de quatre vingts ans, le

corps tout decouppé de blesseures, secoué de vieillesse, & tout panchant sur son tombeau. Agesilaus qui ne deuoit plus estre en appetit de gloire, si tousiours l'ambition n'est affamée d'honneur quand vous le voyez aller mettre sa personne à loüage, & se rendre mercenaire d'un Roy d'Égypte, afin que par ses seruices il en peust tirer secours pour le recouremēt de la ville de Messine, que les Thebains luy auoient ostée à coups d'espée. O MON PRINCE, que l'exemple des hommes vertueux est vne bonne pierre affilloire, pour donner le tranchant à la vertu, & vne grande dresfiere pour nous mener à l'honneur! O la belle chose de bien faire apres les autres, afin que d'autres facent mieux apres nous! Et ô la chose vtile & profitable, selon le precepte du sage de *hanter avec les morts*, & de retirer de leurs effigies, voire de leurs tombeaux, tous les traits de leur vie plus naïfs & mieux agencez à l'honneur, & par les charmes de l'amour de leur vertu, euoquer à nous ces grands & puissans Genies, qui ont heureusement & glorieusement conduit leurs esprits iusqu'au solstice de l'honneur!

MERVEILLEUSE deuoit estre la force du Soleil sur l'image de Memnon, quand elle l'auiuoit & la rédoit parlante; Mais plus & bien plus encore est celle de l'honneur, sur les ames façonnées au tour de la vertu. Car que sont-ce les belles actions, que comme ceste fleuste de Sparte, qu'on sonnoit au lieu de trôpette aux ames genereuses? Que sont-ce qu'autant de herauts qui nous appellent à la gloire, autant de charbons ardans, autant de mesches allumées, qui tombent dans le salpestre & dans le soulfhre de nos cœurs? Non certes non, les rayons de l'honneur ne paroissent iamais, qu'ils ne mettent les plus beaux esprits en sueur: Iettez les yeux, MON PRINCE, sur les yeux de Cæsar; Ce n'est que pluye, ce ne sont que larmes, que luy tombent au seul discours des armes d'Alexandre: Approchez le liêt de Themistocles, ha! que d'épines au cheuet & au coëssin! que peu de repos au lieu de son repos, & que de souspirs de son cœur où à peine sa bouche deuoit respirer! Et d'où cela, sinon que le trophée de Miltiades, comme vn tabour de guerre luy fraploit tousiours à l'oreille, & que les beaux traits & les

grands coups de ce foudre de guerre, luy restoient encore vifs en la pensée, & comme fergeans de l'honneur, luy mettoient la main sur la conscience honteuse & criminelle de n'auoir rien fait digne du trophée de Miltiades?

Le mesme rapport, la mesme relation qu'il y a du pere au fils, & du maistre au seruiteur, la mesme est celle d'un Roy à son Royaume; sans fils, sans seruiteur, il ny a point de pere, point de maistre: Et que vous ferez Roy de Nauarre sans le Royaume? Ouy, da, pourueu que vous portiez vne courone peincte en l'air en forme de Chimere avec ceste deuise, *Je n'ose, ie ne puis*. Dieu, grand Dieu, vn Roy qui n'a iamais veu la peur que sur le talon de ses ennemis, vn foudre, vn tonnerre, *N'oser*? Non pas s'il ne peut; Vn Roy de France, vn inuincible Roy *ne pou- uoir*? Non pas s'il ne le veut: Vn Roy la fine fleur des meilleurs Roys, vn bõ Roy *Ne vouloir*? Las, hélas! qu'est ce que faire amende honorable, non pas en vn par- quet, teste nue, genouils à terre & la tor- che ardente au poing, mais la faire sur le grand theatre de la Chrestienté, voire de l'Europe, voire de tout l'Vniuers, la teste



couuerte de honte, l'eclatant flambeau de sa reputation estaint & trainant ignominieusement sa renommée par terre! Et toutesfois la hauteſſe de l'Eſtat des Roys n'a rien de meilleur que deuoloir, ny de plus grand que de pouuoir bien faire a vne multitude innombrable d'hommes.

BELLE eſtoit ceſte couſtume des Perſes qui chaſcun matin auant le leuer du Roy luy enuoyoiēt dire par l'vn de ſes Chambellans, *Leuez-vous, Sire, & pouruoyez aux affaires, que Meſoromaſdes, le grand Dieu vous a mis en main*; Auſſi la royauté perd ſa grace, ſi elle n'a ſoing de ſes ſuiets. Et non ſans myſtere les Egyptiens figuroient leur Prince par vn œil, & par vn ſceptre, & le nommoient *ofiris*, pour luy monſtrer qu'il deuoit eſtre comme vn Argus à pluſieurs yeux touſiours à cheual & au guet pour le biē de ſon peuple, voire au temps plus ſerain & aux plus beaux iours de ſa proſperité; comme Epaminondas luy ſeul alloit reuiſitant les armes, & les murailles, lors que les Thebains eſtoient à faire bonne chere, diſant qu'il veilleoit & ieusnoit, afin que les autres peuſſent à ſeureté boire & dormir. Auſſi le Roy d'Epire auoit accouſtumé



apres vn solemnel sacrifice fait a Iupiter martial, de promettre aux Epirotes toute aide & protection; Coustume du depuis prise en type, & en patron par tous les Roys de la terre, qui ont plustost le serment en la bouche & l'espée au poing pour la protection de leurs suiets, que non point la couronne sur la teste, ny le sceptre à la main.

VNE verité m'eschappe, vne humeur de Bearnois me prend; Pourquoy tiendray-ie la voix de mon Prince pour Oracle, & sa volonté pour loy? Pourquoy etoufferay-ie en moy toutes mes volontez, & feray litiere de mon ame à ses affections? Pourquoy perdray-ie mon libre arbitre pour me conformer à son intention? Pourquoy tous mes desirs ressortiront-ils à sa volonté, & pourquoy en feray-ie vne entiere & absolue resignation entre ses mains? Pourquoy l'aborderay-ie avec ce saint respect qu'on approche les autels des Dieux, si aux approches d'un tyran, il prend son chemin à gauche, s'il me laisse à discretion, & s'il expose mes enfans, ma vie & mes moyes en butin à ses ennemis? Où sont ces correlatifs, Roy & Peuple, amour & obeis-

sance, protection & hommage?

LE fils de Crœsus toute sa vie muet ne commença point a parler, que quand il vit l'espée a nuë pour bleffer son pere; Alors nature rompit les obstacles de la nature; *Ne faites point mal au Roy*, s'escria le muet; Si l'enfant pour le pere, & pourquoy non le pere pour l'enfant? Et puis que les peuples sont les enfans des Princes, qui sinon les Princes, doiuent essuyer leurs larmes? Qui auoir le cœur percé de douleurs, & qui blessé en leurs playes sinon les Prince? Leur amour doit estre esgal, & en semblables affectiōs reciproque doit estre leur deuoir; N'auoir qu'un iour pour la posterité, qu'une nuit pour les afflictions, & ne viure que par vne ame, ny mourir que par vn hoquet comme ces deux tant celebres iumeaux nez en vn iour & morts en vn autre, sains en même réps & en mesme réps malades; ou cōme Pline escrit du Nil & du fleuve Inope, qui croisēt & de croisēt en même iour, en mesme heure, en mesme instant.

Et quoy? La prouidence de Dieu descēdra iusques aux petites fleurs ecloses au matin & au soir seichées! Le cœur enuoyera le sang aux veines,

les veines aux arteres, les arteres aux petits rameaux, qui se dilatent sur toute la personne, & par ce moyen la vi-  
uifient ! L'ame donnera sentiment iuf-  
ques aux ongles, & aux cheueux qui ne  
font qu'excremens de nostre corps, &  
non point parties ! Vn petit pepin, vne  
petite plante s'espandra depuis la racine  
iufqu'aux extremittez des branches,  
qu'elle distribuera fa nourriture au tronc,  
& à la moüelle, à l'efcorce aux fleurs, aux  
fueilles, au fruiçt ! Les animaux auront  
vn defir d'allaitter leurs petits, vn soin  
merueilleux de les conseruer ! Et qu'un  
grand Roy laiffant la tyrannie au large,  
fes fuiets à l'abandon, & mettant son re-  
pos deuant leur liberté, qu'il ne leur ier-  
tera point vn feul rayon de fa felicité, vne  
feule œillade de fa bonne fortune ? Qu'il  
ne les mettra point à l'abri de la pluye,  
qu'il ne les gardera point des eclats du  
foudre, & ne s'esmouuera non plus de  
leurs larmes & de leurs fouspirs que des  
anciènes cruautez de Tibere & de Nerō ?  
Ainsi, peut estre, fais tu Pelican, qui trou-  
ues tō sang fertile & plusieurs berceaux  
en ton fepulchre ; Ainsi fis tu, genereufe  
Thebe, qui tuas ton propre mary pour

estre tyran; Ainsi voulus tu mourir, Moysse, afin qu'Israël vescu; Ainsi t'eslanças-tu dans l'abyfme, O Curtius: en cela non moins digne de Rome que Rome de Curtius. Heureuses larmes, playes heureuses qui essuyez, qui guerissez les larmes & les playes de tout vn peuple! Heureuse mort qui luy donne la vie!

S Ç A V E Z-VOUS, SIRE, à quoy il faut accomparer vn bon Roy, A certains animaux de la Syrie, qui au rapport de Pline, gardēt ceux du païs, & en tirent les estrangers; A vn bon chien, comme aussi les Egyptiens representoient Mercure par la figure de cet animal, d'autant que sa nature est de garder, estre diligent, sage à discerner & iuger l'amy & l'ennemi; A vn nauire, qui n'est point appellé bon, pour estre peint de belles couleurs, ny pour estre chargé de tresors & richesses royales, mais pour auoir les ioincts des plâches bien serrez, afin de ne faire point eau; & pour estre solide cōtre les ondes, souple au gouuernail & agile à la voile. Les belles actions qui dependent de la Royauté, estre tousiours au guet & en sentinelle pour son peuple, le tenir au couuert de sa protection, parer aux coups

coups de l'inuasion & de la tyrannie, eslargir sa frontiere autant que la iustice luy permet, auancer la fortune des bons, faire escart des meschans, & deposer ses propres affections, pour espouser celles de son peuple: Cela, c'est cela, ce sont ces belles actions Royales qui le font recognoistre pour Roy, ce sont elles qui le mettent au rang des Anges, & le rendent comme vn Dieu en terre; Elles qui impriment son nom sur le front de la renommee, qui aussi loin qu'elle espanse ses ailes, espanche la bonne odeur de ses faits, voire les celebre, voire les canonize.

PHILIPPE de Macedone estant vn iour prest de se camper en vn beau lieu, Il fut auerti qu'il n'y auoit point de fourrage, *O Hercules*, dit-il, *quelle doncques est nostre vie, puis qu'il nous faut mesmes auoir soin des asnes!* De vos asnes, Roy genereux, auoir soin de vos asnes! Et quel doncques doit estre le soucy des autres Roys sur leurs peuples, sur leur chere patrie, à qui nous deuons trestous nos plus viues affections, nos plus ardens & plus ordinaires souhaits, iusques à presenter nos vies en oblation & en sacrifice.



à l'auantage & pour le salut du public ? Les Roys sur tout qui ne doiuent pas plus viure, que faire vn rapport de leur vie, & contribuer toutes leurs actions au bien de leurs suiets, comme la terre nourrit les plantes, & les plantes les animaux, & les animaux seruent à l'homme, cōme le soleil luit & eschauffe, nō pour soy; comme la terre porte & n'en a que faire; comme les vens soufflent & ne nauigent point.

Les passions de nos ames se communiquent à nous par la parole, & vont de celuy qui parle, à celuy qui entend, par vn ie ne sçay quel commerce naturel; A plus forte raison, SIRE, les souspirs de vos suiets de Nauarre, les larmes qu'ils iettent sur les tombeaux funestes de leur liberté, leurs tristes douleurs, qui se représentent à vos yeux, qui se font toucher à vos mains, vous doiuent bien faire sensiblement cognoistre que veritablement ce sont des souspirs, des larmes, des douleurs : Et quand ils vous représentent Crassus, qui pleure vn poisson, vne Murene; Quand ils vous font voir vn cruel tyran de Pheres, Alexandre, qui fond tout en larmes, lors qu'il oit en Tragœdie reciter les miseres d'Hecube & de Poly-

xene: C'est a vous GRAND ROY, de iuger si au syncope de leurs maux, & en la foule de leurs afflictions, vous en de-ués auoir aucun sentiment, ny vous piquer d'indignation contre celuy qui ayât etouffé la liberté de vos suiets, vous voudroit avec eux engager a mesmes fers & a mesme cadene, puis mesme que ia. dis vn citoyē romain fut executé à mort pour auoir imposé noms d'hommes libres à des esclaves. Et si ce genereux Romain Rutilius estant r'appelé d'exil par Sylla, ne voulut pas reuenir, aimant mieux perdre la veüe de sa patrie, que supporter celle du tyran, qui en auoit opprimé la liberté; Comment GRAND ROY, vous legitime Roy de Nauarre, comment en supporterés vous le tyran & l'exil?

Et s'il est vray, cōme tous les sages le disent, que la simmetrie est telle entre le tout & les parties, que la moindre interressée, la principale s'en ressent; Si vn Roy qui n'a cōpassion des miseres de son peuple, viole la pieté naturelle, & la maïesté de ce grād dieu, l'esprit duquel cōuerse parmy nous cōme garde & patron de la societé humaine; si ne peut employer

trop de parfû pour le sacrifice des dieux, ny trop de sang pour sa patrie ; fil faut qu'il veste le premier les passions de son peuple, & qu'il recoime les coups en soy, afin que, comme Brasidas, qui tira de sa propre playe le dard dont il tua son enemy, il touche au vif ceux qui l'ont offensé en son peuple ; M O N R O Y, espar-gnerés vous quelque goutte de sang aux riuieres du sang de vos suiets de Nauarre? Ne souffrirés vous point vne es-gratigneure en leurs profondes playes? N'aurez vous point mouuement en l'o-rage de leurs souspirs?

R O M E ne peut tomber, tant que Scipion sera debout, ny Scipion viure, quãd Rome sera abbatus: Que voulois tu dire B R A V E S C I P I O N? sinon que tout Prince genereux se doit planter droit sur les pas de son deuoir, presenter hardiment l'estomac, se laisser fendre & brescher la poitrine pour la defense de son Estat, & couvrir de son corps celuy de sa patrie? qu'il doit, & certes qu'il doit courageusement exposer sa personne au milieu des flots, comme la derniere ancre pour garder le naufrage de ses suiets? Que si le vent & l'orage les emporte, si

la vague les accable, roy & patrie, mere & fils meurent, comme si deux corps n'auoient qu'une vie; Ils meurent bras à bras, & luy tousiours le gouuernail à la main, en faisant ceste genereuse exclamation, que faisoit iadis vn bon pilote, *O Neptune, arrive ce qui pourra, ie periray tenant mon gouuernail droit.* Et qui viuroit souz les cendres de sa patrie sans mourir mille fois le iour? si comme on dit, l'image d'Apollon, portée de la Grece à Cumes plora visiblement, & en grand flux de larmes, lors que les Romains destruisoient la ville d'où elle auoit esté tirée comme si en tel cas le sentiment de la douleur passoit mesmes iusqu'aux choses insensibles? Encore plus, qui voudroit donner la main, qui viure en communion de cœur & de volonté avec celuy qui auroit suffoqué tous les esprits vitaux de nostre patrie, tres-chere, tres-douce patrie? si Sylla ayant prins Preneste, & condamné tous les habitans à mourir, son hoste seul reserué, ce genereux, ce bon patriote se iettant dans la troupe de ses citoyens, que l'on massacroit. *Ia à Dieu ne plaise, dit-il, que ie doine ma vie au meurtrier de mon pais?*

S O L O N tout cassé de vieillesse ayant  
 descouuert que Pisistratus tendoit à la  
 tyrannie sans que personne luy osast fai-  
 re teste, luy seul tirant ses armes dehors,  
 & les mettant en la rue deuât la porte de  
 sa maison, crioit a ses citoiens, *Secourés  
 moy, mes amis, secourés vostre patrie, mourons  
 libres ou faisons mourir le tyran*; Et qu'aux  
 yeux de toutel'Europe, l'Espagnol de ses  
 sanglâtes escourgées tracera la captiuité  
 sur les ames esclaués de vos pources suiets  
 de Nauarre, qu'il menera leur liberté en  
 triomphe par le monde, Et qu'une rou-  
 gissante honte ne vous naistra point sur  
 le visage? Que Dieu ne vous lancera  
 point de bōs mouuemens au cœur, pour  
 recourir vostre peuple, pour recouurer  
 cet ancien siege de vos predecesseurs?  
 Qu'on ne verra point, ainsi que la ieune  
 aigle, oyseau celeste, vostre maiesté pouf-  
 fée de la vigueur & generosité de ses an-  
 cestres porter le foudre du haut Dieu sur  
 le front de la tyrannie? Que vous ne fē-  
 drés point les Pyrenées? Que vous n'irés  
 point chercher le tyran iusques dans l'Es-  
 curial?

I' A Y veu en songe deux grands roys,  
 comme deux Athletes en camp clos, à



pied leué & à bras tendus sur le point de se prendre & se porter par terre : Dieu qui a exercé toute l'Europe souz les passions de leurs predecesseurs, veut encore monstrier quel de ces deux a plus de force de corps & d'esprit, l'un pour conseruer, l'autre pour ruiner ; Quel de ces deux se tient au deuoir & à l'equite, comme aux sacrées colonnes de la societé humaine, & quel obstinement estriue contre la raison, fait effort à la iustice, & veut demeurer victorieux sur la loy, qui est vne victoire de malencontre, dont le laurier est bien tost sec & fané : Quel se veut tenir à ces termes generaux, tuteurs & protecteurs de la societé ciuile, *Tien & Mien* ? Et quel a ceste brauade de Lysander qui ne pouuant souffrir la raison des Argiens, saqua la main à son espée, *Et ceux*, dit-il, *qui seront les plus vaillans avec ceste-cy plaideront le mieux.*

LE François creu au milieu des alarmes, armé d'un million de glorieux exploits, qui ayant meuri son iugement par tant de pratiques, semble auoir plus combattu la fortune contre les hommes, que les hommes contre la fortune : Et à qui de quel costé qu'on l'attaque, on

trouue vn front d'airain, inuincible, qui terrasse tout; Tousiours tousiours couru d'un million d'ennemis, & tousiours resolu sur les dangers, tousiours sur pieds cōtre la violence, vray cube, vray tetragone, solide rocher contre les ondes, & qui ayant tué plus d'hōmes que son ennemy n'en a veu, semble estre assis sur le throsne royal, comme ces anciennes statues de Mercure, dont parle Suidas, tetragones & de figure cubique & quarrée, pour monstrier leur solidité:

L'ESPAGNOL ieune Prince, eclos auant que formé, qui a le goüestre & le col tout enflé des prosperitez de ses maieurs, mouté sur le throsne Royal de Philippe son pere, sans iamais auoir esuenté son espée au milieu des piques, sans coup frapper, sans sang espandre, & comme par vn hennissement de cheual, ainsi qu'on dit de Darius; encore à l'Alphabet des armes, tout neuf au mestier des coups, & qui auroit à faire la poterie sur le pot, comme Platon disoit des nouices:

L'VN, qui tiēt à la main ce tāt glorieux & renommé sceptre de la France, qui releuée du liēt de ses afflictions, a veu parmy ses espines espanouir la belle rose de

sa prosperité, semblable a ce vieillard Iolaiüs des Poëtes que les dieux firent raieunir pour sa deuotion; Et France qu'on diroit n'auoir receu du ciel qu'une leçon pour luy apprendre, que nostre plus grãde misere est de n'estre point misera-  
bles, & cõme vn arc en ciel qui l'asseure que souz ce regne ses afflictions seront comme les eaux de Noé, qui ne retournent point.

L'AUTRE, Roy des Espagnes, qui de long temps en ça dem eurenta l'abri du vent, semblables a certaine prouince des montz Hyperborées, où la discorde ne mettoit iamais le pied, & où la mort sembloit auoir la goutte, & n'y pouuoir arriuer qu'on ne luy allast au deuant.

FRANCE toute guerriere, & où Lycurgus semble auoir rapporté toutes ses loix a la science militaire, comme la plus genereuse entre toutes les autres, & la plus noble en sa cause & sa fin: France le Temple & l'eschaffaut de Mars, comme par tiltre d'hõneur Epaminõdas en appe-  
loit la pleine de Bœoce; France la boutique de la guerre, cõme Xenophon disoit de la ville d'Ephese; Et France encore ou Cadmée sema ses dents, formiliere de

foldats, qui bouillent, qui bruslent d'ardeur de combattre, comme Achille en Homere, quand sa mere luy apporte les armes, qu'elle luy auoit fait faire à Vulcain; Et sur tout France la mere de ceste genereuse noblesse, qui bien souuent a passé l'une & l'autre mer, pour faire reluire ses armes iusqu'au plus profond des Empires estrangers; Noblesse au prix de laquelle le reste du monde est roturier: Noblesse qui tousiours coupe, tousiours trache, tousiours passe auât, sans vouloir autres bornes à la reputation de sa valeur que celles que le Soleil prend a faire le tour de la terre.

ESPAIGNE toute eneruée & amollie de repos, nourrice d'hommes pour la pluspart fêmes barbues, semblables aux Casserons, qui ont bien des espees, non pas du cœur, comme Themistocles disoit des Eretriens, Espagne encore, ou la paix comme ceste forcierre Circé transforme les hommes en bestes & en pourceaux, seconde Babylone, ou Xerxes de fend de porter armes, & commande de danser, chanter, paillarder, tauerner, & porter des sayes a long fonds.

FRANCE, qui a ses iustes propor-

tions du corps aux membres, & des membres aux corps, toute entiere & saine, toutes arteres & tendons, où rien ne bouge, que tout n'aille en bransle, toute recueillie en foy, cōme s'il n'y auoit rien hors de foy, riche en biens, fleurissante en armes, renommée en valeur, & où vn Prince courageux qui voudroit s'eslargir, trouueroit vne mine d'hommes & de moyens, comme on dit que d'vne mesme puissance, & d'vn mesme Empire Semiramis qui n'estoit qu'vne femme, equippoit de grosses flottes de vaisseaux, armoit & foudoioit de puisās exercites, bastissoit des Babylones, conqueroit tous les enuirs de la mer rouge, assuiettissant à soy les Arabes & les Ethiopiens.

ESPAIGNE toute deschirée & faite à lambeaux; La teste en Castille toute nue & pelée de places fortes, & qui doit sa ruine au moindre rencontre de nos armes; Le nez de cire en Portugal, tout prest à fondre au premier feu d'esmotiō; Les yeux réplis d'humeur en Arragon, & tous chassieux pour la perte de leurs libertez; Les bras gangrenez en Nauarre, & qui n'ont esperance de guerison, qu'en la chirurgie de la France; Le ventre au



Peru fuiet à la dyssenterie & au flux de sang d'Angleterre ; Les cuisses de verre en Italie, qui se casseront au mesme coup que la teste ; Les iambes toutes pourries en Fládres, & sur qui les desseins du Prince BVRIGORRI ne marchent qu'avec la goutte , & tous tremblans souz la pesanteur des armes du Duc Maurice, ce tant braue & fortuné guerrier : Espaigne qui heurtée de ses voisins, auroit par nécessité à s'aider de secours estranger , cōme les anciens Payens ne se seruoient en leurs augures des oyseaux niais & domestiques, mais des Aigles, vautours, & autres oyseaux de país estrange ; Espaigne toutesfois qui comme vn éclair, donne plus d'esblouissement que de lumiere, & semblable au nauire d'Aretas Roy de Phenicie, admirable sur le port à cause de sa desmesurée grandeur, mais du tout inutile en pleine mer.

FRANCE, l'ame, le cœur & les delices de ses voisins; nouïée d'une fort estroite alliance & cōfederation à l'Angleterre & l'Ecosse ; En festin, & qui boit dans le gobeau philotesien, au verre d'amitié avec ses freres Germains, francs genereux, qui n'ont iamais heurté leurs armes aux

nostres que par les artifices de l'Espagnol;  
 En bon mesnage, au pain & au cousteau  
 avec ces prudens & sages Venitiens, &  
 qui maintenant communique ses plus se-  
 crettes affections aux Florentins & aux  
 Lorrains par vne mutuelle infusion &  
 distillation d'ames & de volonte, vnies  
 & nourries en vnion par ces deux belles  
 & precieuses perles du monde, *Marie de*  
*Medecis & Catherine de Navarre.* France  
 de qui le voisinage a tousiours semblé  
 plus agreable à ces braues & guerriers  
 Suisses, que toutes les mines du Peru, jus-  
 ques à faire part à ses Roys de l'honneur  
 de leur bourgeoisie, comme les Athe-  
 niennois firent aux Roys d'Asie Antigonus &  
 Demetrius, & les Corinthiens à Alexan-  
 dre le grand, disans qu'ils n'auoient ia-  
 mais fait cet honneur qu'à Hercules; Et  
 France, qui avec ses alliances sera com-  
 me vn feu allumé, qui rencontrant vn au-  
 tre corps l'allume & l'enflamme pour  
 loin qu'il soit, comme la Napthé qui fait  
 feu à la seule veüe du feu, & comme la  
 pierre Pantaura, qui par vne secrette puis-  
 sance attire à soy ce qui en approche,  
 France encore, qui avec l'amitié de ses  
 voisins sera comme la mer, où lors qu'elle

est calme, on ne recognoit pas vne onde, vn petit boüillon auancer l'vn sur l'autre: Mais si les vens l'agitent & la tourmentent, vn flot en sousleue cent, & cent en font rouler mille, mille & non plus mille, mais flots sur flots à millions iusques à menacer la nue.

ESPAIGNE montée sur la fourcil-  
leuse grandeur, & sur l'orgueil insupportable de sa nation, orgueil qui fera l'estrieu par où en fin tout le monde luy montera sur la teste, & qui frayera le chemin à sa ruine; Espagne le leuain qui a enaigri tout l'Europe, & la butte de l'indignation des peuples Chrestiens, & sur qui vn amas de vapeurs noires s'esleue peu à peu, & où desia bourdonnent de sourdes esclats de tonnerres, qu'on verra en fin creuasser sur la Castille: Espagne contre la tyrannie de laquelle les hommes & les elemens sollicitent la vengeance du ciel, outre ce que de long temps les Alemans grondent, les Siciliens murmurent & les Neapolitains souspirent contre ses vsurpations; Elle sur tout qui ayant regardé l'Angleterre d'un œil de boucher, pour auoir pleine liberté en la mer, & par ce moyen brider les commer-

ces de l'Europe, sy est mise en mesme contrariété & antithese que l'eau & le feu & qui tenant tous les Princes d'Italie, comme de petites Isles flottantes & peu affermies au milieu de l'abisme de sa grandeur, les iette d'une jeune ialousie en une violente apprehension, & de l'apprehension en necessité de faire, comme Mithridates Roy d'Amasie, qui voyant l'empire Romain toucher au ciel de sa grandeur, traitta ligue avec les Roys de Parthe, Armenie, Egypte & plusieurs seigneuries de la Grece.

FRANCE en fin, qu'on diroit auoir trop d'hommes pour manger plusieurs mondes, & qu'il faudroit plusieurs mondes pour manger la France; Elle ceste fille aînée de nature, semblable a ce grand & admirable sophiste Hippias Elœus, d'ont Platon parle si souuent, qui se trouuant aux assëblées celebres des Grecs s'habilloit depuis la teste iusqu'aux pieds d'habititz qu'il auoit faits de sa propre main. Elle qui toute remplie d'esprits ressemble a ces fabuleux instrumens de Vulcain, qui d'eux-mesmes sonnoient leurs ouurages: disons encore, la France que le tousiours victorieux Cæsar a iugé inuincible.



ESPAIGNE en fin, quia des prouisions, comme vne armée a force de viandiers, peuplée & remplie de Mores, & de pauures estrangers, cōme on remplit vn meschant pourpoint de paille pour faire peur aux petits oyseaux, ou comme vne sentine où fescoulent toutes les ordures du nauire: Disons encore, Espagne, où Caton dit auoir prins autant de villes qu'il y seiourna de iours.

ET qu'avec tous ces auātages; O R O Y DE LA FLEVR DE LIS, vous permettrés qu'un ieune Prince vous face chercher les pieds, à faute de trouuer vos mains? Qu'à l'ombre des Oliuiers il vous fera tout doucement dire le *da pacem domine*? Qu'il rendra vostre Royauté borgne? Qu'il dira tout haut à la veüe de la Chrestienté, que vous deués mesurer vostre temps, le temps de vos victoires, que l'heure du flus de vostre accroissement est passé, qu'elle est sur son retour, & au tēps de sa déclinaison? Qu'il vous fera chanter la chāson de la caille Bearnoise, *quoad ion ey blat, ion non ey sac, quoad ion ey sac, ion non ey blat*? Et toutesfois Sylla ne receut iamais plus rude atteinte en son hōneur, que lors que ne pouuant empescher le



triomphe de Pompée, encore ieune hō-  
me & n'ayant esté que Proconsul en Es-  
paigne, il fut contraint de s'escrier, *qu'il*  
*triomphe, qu'il triomphe donc de par Dieu.*

TERRE & ciel ! Que donc le corbeau  
fera le braue des plumes arrachées à l'Ai-  
gle ! Que la caille couuera ses œufs au  
nid de l'Esparuier ! qu'aux yeux de mon  
Roy ; d'un Roy de France & de Nauarre  
adextré & habilité à tous affaires, touf-  
iours en pied sur sa force & sur son quar-  
ré contre le heurt des afflictions, Qu'à la  
pointe de sa lance, de luy non moins  
coustumier à vaincre qu'à combattre, &  
plus empesché à faire enseuelir ses enne-  
mis qu'à les tuer ! Qu'à l'ombre de vos  
lauriers, MAGNANIME ALEXAN-  
DRE, plus heureux en armes & plus li-  
beral en action de graces que les Lace-  
demoniens, qui voyans leurs victoires se  
tenir main à main n'en sacrifioyent aux  
Dieux qu'un Coq blanc, Qu'à vos yeux,  
GVERRIER INVINCIBLE, un ieu-  
ne Roy d'Espagne à peine sevré pour les  
affaires du monde, qui n'a iamais veu  
champ de bataille qu'en peinture, combat  
que par l'oreille, & qui couure ses imper-  
fections comme un boiteux qui est à che-

ual, que tousiours hors du vent & de l'onde, il vous fera secoïer à l'orage de ses passîos! Que tousiours à pied sec il se baignera en la sueur de vos armes, & s'esleuant ambitieusement sur son deuoir, qu'il retiendra par forme de bien seance vostre bien, le bien de vos maieurs, le bien de vos enfans! Qu'il tiendra toute la Chrestienté en eschec, & en fera comme le boulanger de sa paste, comme l'imager de sa cire! Qu'il y feral'Empereur absolu, sans retour, sans vicissitude, sans superieur, sans esgal! Qu'il y fera comme l'ame au corps, qui se trouue sans bouger en mille lieux, qui trauese les mers, qui penetre les cieux, qui perce iusqu'aux abysses de la terre! Qu'au rebours des animaux qui se racourcissent & se ramassent pour estre plus forts, Cestuy-cy estendra son ambition, & ses armes partout pour se rendre maistre de tout! Ou plustost qu'il attaindra toutes choses sans s'estêdre, & remuëra tout sans se bouger, sans sortir de Madril, son vray poinct, & comme ce petit point hors du monde, tant souhaitté par Archimede pour enleuer tout le monde..

IL est vray, SIRE, que le mal-heur

de ce ciecle , l'auantage sur vous de trois choses, qui portent fort en matiere d'Estat; La premiere, qu'on enfante vos entreprises au iour mesme de leur conception, & qu'elles sont aussi tost sur la langue, que dans l'oreille, au rebours de l'Espagnol qui ne dit iamais ce qu'il fait, & ne fait iamais ce qu'il dit: Le cœur ne se deuroit iamais communiquer à la bouche, que sur le poinct qu'on leue le bras pour l'execution; Le secret, l'amour, & le vin ne valent rien quand ils sont esuentés & veritable est ce beau dire de Chabrias, *que la langue qui fait effor, rend les coups de la main mal asseurés*: Mais bon remede a ce mal; Auoir aussi tost l'espée au poing que l'entreprise en l'esprit, ou s'il y faut du conseil & du temps, s'aider de l'anneau qu'Alexandre mit sur les leures d'Ephestion.

LA seconde, Qu'on ne donne pas isfés des yeux sur le bordeau de quelques puritains françoises, qui ont abandonné leurs pudicitez à l'Espagnol, & pour vne Obole luy ont quitté vn tresor inestimable d'honneur; Ames escroïellees & infaites de puantes apostumes, Ames estalées à Madril cōme boutiques de mercerie,

ou l'amour de la France, & la fidelité deuë à leur Roy se trouue à vendre, pour faire trouuer vaine la plainte de Momus contre Nature, de n'auoir fait l'hōme a poitrine & estomac ouuert, afin que son cœur fust à nos yeux, comme vn liure canonique escrit en gros caractere; Sepulchres blanchis, hypocrites & faux masques de seruiteurs, qui depositaires des plus profondes pensées, & comme reservoirs des hautes & plus secrettes deliberations de leur Roy, esuentent tous ses secrets, & en font vn ie ne sçay quel cōmerce, semblables a l'oyseau Sippé dont parle Aristote, aisé a appriuoiser, & duquel on se sert à la sorcelerie pour sçauoir les choses secrettes & cachées: En cela il n'y a rien que bon œil de sentinelle, sanglante main de bourreau, & ne faire espargne que de ceux qui se iettent à la protection de leurs pieds, & qui ayans tourné le cœur, tournent le dos à la France; Et encore à ceux la, mettre leurs maisons en cendre, comme effigies de leur corps, en estouffer la posterité, comme on disoit de l'Empereur maximin, *que d'une meschante race; il ne falloit pas laisser le moindre chien, les crier, les huer; leur*

publier a toute voix, ce triste, ce malencontreux ban de Iustice, Loin, loin de nostre Prince, ames pourries & rongées de chancres, qui en vos puantises voudriés faire trouuer la fleur de Lis puante & de mauuaise odeur, semblables a ces lieres, qui ne demandent que la cheute de la muraille qui les entretient; Loin, loin de nostre bon pere, enfans denaturez, qui ne parlés que trop bon Castillan, & de la desloyauté desquels on se sert comme d'un morceau de Lombard contre le corps de la France; Allés, courés a Cesar; A mesme temps qu'il ouurira la porte aux trahisons, il en donnera sur le nez aux traistres: Nouuelles grenouilles qui vous ensuyuant de vostre Roy paisible, eslisez la Cigongne qui vous donnera toutes en suite; Allés, santé, ne faillés pas au partage des honneurs de l'Espaigne, vous estes entre les pensionnaires & les valets de ses passions, vous aués baloté entre ses mains la mort de vostre patrie; Allés, santé, vous y trouuerés la mesme courtoisie que dans Homere le Cyclope presente a Vlyssés en recompense du bon vin qu'il luy auoit donné: Le te mangeray dit-il, le dernier de tes compagnons.

Voicy le troisieme, & en effet le plus grand auantage de l'Espagnol: Ce trouue-il en France, yne ame breschee de



pauvreté? Aussi tost sur elle vn Iesuiste  
 avec vne bourse du Peru, qui d'ordinaire  
 tiēt pl<sup>9</sup> de l'air que de la terre, plus du le-  
 uant que du couchant; Suis-ie eschauffé  
 d'ambition, veux-je mettre ma reputa-  
 tion à droit ou a gauche en lumiere? Voi-  
 cy vn Iesuiste, qui me monstre l'Espagne,  
 comme la meilleure imprimerie, & ou  
 le moindre caractere de mon nom ren-  
 dra la grandeur du Soleil petite; Les  
 lieutenances generales de la France, &  
 les plus hautes alliâces d'Espagne ne sont  
 qu'auant-coureurs de fortune: Suis-ie  
 gaucher au deuoir d'un homme de bien,  
 la Iustice fronce-elle le sourcil sur moy,  
 les sergeâs me sont-ils en croupe? Ainsi  
 tost vn Iesuiste me donne la main de pro-  
 tection, l'Espagne est mon Asyle, & rien  
 ne me peut faillir, non pour le moins le  
 vent, si ie ne faux a redoubler mes mes-  
 chancetés: Se rencontre-il vn esprit beau  
 & deslié, & sur qui les Graces & la vertu  
 semblent entrer en escot pour l'amener  
 a perfection? Hala-ha, vn Iesuiste sur  
 luy, cōme vne Chantharide sur vne belle  
 fleur, pour luy donner le goust & la fri-  
 andise d'Espagne. Auons-nous quelque  
 ame moulle & rabattuë, mais pour ses

foibleſſes agitée des eſlans de la ſuperſtition? Quād & quād vn Ieſuiſte cōme vne mordante tenaille, la pince, la mord, la ſerre, iuſqu'à ce que ſur l'eſperance de la transformer en Ange, il luy a mis le couſteau à la main, & la reſolution au courage de ſe faire vn Ahod: La fortune parmy les bonnes villes de la France a-elle ietté les fondemens de quelque maiſon bourgeoiſe, & fait-elle mine d'y tenir pied ferme? Auſſi toſt y voila vn Ieſuiſte pour œconome & pour deſpenſier; Tout y eſt bon ſinon les berceaux: car ſans enfans la conquête generale en eſt aſſeuree pour Ieſus, & en nom plurier pour les Ieſuiſtes: Le ſoleil & la ſemence ſ'y rencontrent-ils, & le mariage boutonne-il en enfans? Il faut à tord ou à trauers, en auoir les premices, & par ceſte belle doctrine de Concomitance, attirer les biens de l'aiſné à Ieſus, & en nom plurier à ſes Ieſuiſtes: La maiſon reſſemble-elle à vn nid de Phœnix? C'eſt le haut poinct du trauail, Toute la ſocieté eſt en hazard de ſ'auorter, ſi elle ne rend ce Phœnix ſociable; Il rētte, il croiſt, il vient en aage de cognoiſſance. Enfant de Ieſus, bien-heureux enfant, Organe à l'aduenir de la grandeur

d'Espagne, & la vipere de vostre patrie, souz quelle fatale planete, souz quel Ascendant fortuné estes vous arriué ! Estre Ange, c'est beaucoup ; mais quel Ange fut iamais Iesuite, & quel s'osa iamais dire Sauueur ? Iesuite soyez-vous donc, Bien-heureux enfant, pour estre au parfus des Anges, & parsonnier de la sainte Trinité comme Iesuite Sauueur :

V O I L A comment ceste vermine vient à groüiller parmy nous, & comme insensiblement la France est en danger de deuenir Espagnole. Infectes Harpies qui fouillez & polluez tout ce qui entre de bon en l'esprit des François ; nouueaux Tyrteés qui nous cornez le meurtre, le sang & la desobeissance ; Iesuites les retraits & les pots de chambre des infections de cet estourdy *Ynigo Loiola*, qui soldat de fortune contre la France, perdit la iambe en Pampelonne, & religieux en masque fit naufrage de conscience sur le Tibre ; Societé insociable, ordure de religieux, merciers d'impostures & de calomnies, & forgerons de toutes nos combustions ciuiles, qu'avez-vous tant a furetter parmy nous ? Quelle seureté de viure entre les aigreurs de tant de gens de bien ?

de bien? Et n'aués-vous iamais ietté les yeux sur l'histoire de Timezias Clazomenien ( de bien contraire humeur a la vostre ) qui ayant recogneu au propos de quelques petits enfans qui iouoient aux osselets , combien la haine estoit imprimée au cœur du peuple contre luy, soudain qu'il fut à sa maison , raconta le tout a sa femme, & quand & quand sortit de la ville avec toute sa famille ?

CES deux lumieres du Palais, les delices des Muses, qui comme vn certain vieillard *Ægyptien*, dans *Plutarque*, parfument l'air d'odeur merueilleusement suauue, si tost qu'ils ouurent la bouche pour parler, Iesuites dites moy, ces deux riuieres d'or, de qui on peut dire comme de *Pericles*, que la deesse *Persuasion* à basti son temple sur leurs leures, avec quel ton, & quel accent, ont-ils animé les genereuses contentions de nos sacrés Prestres, de nos souuerains Pontifes de *Iustice*, liens qui noüent l'obeissance des suiets avec le commandement de leur Prince, esquierres qui ne sont pas seulement droittes, mais qui seruent à redresser les autres, & semblables a ce bon *Minos*, qu'*Homere* appelle *Oanistes* de



Iupiter, c'est à dire familier & disciple; Iesuites dites-le moy, Ces deux Lyres d'Amphion, des Arnauds, & Dolé, ces deux Caducées de Mercure, qui par leurs viues persuasions semblent tirer hommage du ciel, de la terre, & des enfers, de quelle langue, sinon qu'acerée, de quelle voix, sinon que dorée, de quelle grace, si non que diuine, de quelles raisons, sinon que nerueuses & pressantes, ont-ils fait tirer contre vous ce grand anatheme de Iustice en l'an 1594, & vous ont fait mettre au ban, comme corrupteurs de la ieunesse Françoise, ennemis du Roy & de l'Estat, fuzils, allumettes & risons de nos fureurs ciuiles? Et tout cela dans ce celebre & glorieux tēple de vertu, en ce sacré sanctuaire de demidieux, en ce noble & tant renommé Parlement de Paris autrefois choisi comme balance de l'honneur des plus grands Princes de la Chrestienté; Eux qui comme deux gentils oyseaux de l'air, esprits de haute humeur, ont crié apres vous comme apres de hybous, pour vous faire regagner les tenebres: Eux ces bons patriotes, semblables à ces anciens Pontifes de Rome, qui donnoient auis au senat des prodiges



qui se rencontroient, afin de les expier.

M A I S sur tout, meurtriers de la France, Assassins de nostre repos, quels frôts de suif & tous vuides de sang, quels yeux pleins de putains, comme Demosthene disoit des effrontez, quelles ames enragées deuéés-vous auoir, quand encore sans frissonner vous voulez faire ferme parmy nous, apres que le 27. de Decembre 1594. sur l'exécrable coup auancé par Iean Chastel, furie esclancée del'Enfer de vostre société, sur le sacré visage du Roy, quoy qu'environné des Princes de son sang, & des principaux seigneurs de la Cour, sa Maiesté fut contrainte de s'escrier à bouche toute pleine de sang, *Helas, faut-il doncques, que les Iesuistes soient condamnéz par ma bouche?*

T O V T E S F O I S, S I R E, comme ceste vermine n'est pas digne de vous faire enfler le cœur, il ne faudroit qu'une œillade grosse d'indignation, vne parole de Roy, ie le veux, que ceste canaille sorte, qu'ils facent place vuide aux gens de bien: Ce ne sont que malandres, que bosses, que pestes de mon Estat: Et l'Espagnol ne leur fit iamais passer les Pyrenees qu'à dessein d'empuantir & infecter ma France de leurs ordures. Aussi tost

vostre maiesté verra comme l'espouuante  
faisira ceste belistraille, & comme la peur  
leur fera monstrier les talons, & frappera  
de lethargie tant de fauces langues Fran-  
çoises, langues de viperes & de serpens,  
qui d'heure en heure iettent leur poison  
sur l'oreille de vostre Maiesté, pour en  
ouurir le cœur & la volonté au restablis-  
sement de ceste race venimeuse de ser-  
pens Loyoliques:

CAR pour le Pape, SIRE, Il se sou-  
uiendra que de tout temps la France a  
esté cōme les Oyes sacrées du Capitole,  
& que ses Roys ont tousiours eu l'espée  
au vent pour oster l'Eglise de la presse de  
ses ennemis, comme si les Pontifes de  
Rome estoient en leur garde, ainsi qu'on  
dit qu'Anubis gardoit les dieux. Il ne l'a  
traittera point à l'ordinaire, de foudres,  
d'excommunications, d'anathemes, & à  
la façon de ce mal-heureux asne de Lu-  
cian, qu'on renuoyoit à coups de baston  
en l'estable, apres auoir porté en solem-  
nelle procession l'image de la Deesse Isis.  
Il la regardera de mesme œil que l'Es-  
paigne; Il tiendra ses affections à l'esgal  
& en æquilibre, & ne voudra pas qu'on  
die, comme d'aucuns de ses predeces-

seurs, que son Consistoire est vne colonie de Castellans, vn regiment à la solde du Peru, ses Cardinaux banquiers profez de l'ambition d'Espagne, ou à mieux dire, esclaves attachez à sa cadene, & qui plie selon ses desirs, comme on dit du cheual Pegafus en Euripide, qu'il plie l'eschine autant qu'on veut: Il passera l'Espagnol par les chaleurs & par les mouuemens de ses viues remonstrances, comme ceux qui amolissent le fer au feu auant que le tremper en l'eau; Il luy représentera comme les tyrannies n'ont iamais le pied ferme, comme leur carriere est de glace, & le bout de leur course vn precipice; Bref, comme ces anciens & venerables organes du ciel, ambassadeurs de sa volonté, il luy denoncera que Dieu viendra d'Edom, avec ses habillemens teints en rouge, en la grandeur de sa vertu, qu'il se couurira de iustice comme d'un haubergeon; qu'il mettra le heaume d'indignation sur son chef, qu'il se vestira des vestemens de vengeance, & s'habillera de zele, comme d'un manteau contre la tyrannie. Mais en tout cas, SIRE, souue-  
nez-vous que rien ne fait ombre aux fleurons de vostre couronne, & que vous ne

deuez hommage, qu'à celuy qui a fait le ciel & la terre; faites distinction de l'ame & du corps, & de ce qui est temporel d'avec le spirituel : Et ne permettez pas que sur l'un des plus beaux theatres de l'Univers vn Roy de Castille face le Roy de Nauarre, vostre sceptre en sa main, vostre couronne sur sa teste ; que la tyrannie y paroisse somptueuse & magnifique en vos habits Royaux ; qu'elles y mette en gésine pour y eclorre ses cruautéz, & y achue ses tragédies par le Catastrophe de la gloire de ses ancestres , & non tant leur que sienne, & par la honte des vostres, & non tant leur que vostre.

IE le veux, que le passage de prospérité en affliction soit chose ordinaire; Que ce ne soit qu'argille & terre, rien que balances, d'honneur & de honte, qu'images d'inconstance, & en fin despoüilles du temps, que les Empires; qu'ils n'ayent qu'une matiere, mais formes diuerses, comme aux heures adioustez les iours, aux iours les mois, aux mois les ans; Tout cela n'est qu'un temps, & en ce temps diuerses mutations de temps, l'un qui a esté, cestuy-cy qui est, & l'autre qui sera : Mais pour cela en tous heurts de



fortune, & contre ces coups qui sans rai-  
 son nous sont ruez par nos voisins, qui  
 les endureroit, non pas la lethargie mes-  
 me? Qui ne feroient rempart de courage  
 & qui non repart de vengeance? Qui es-  
 pargneroit la bouche & le poulmō pour  
 la plainte, & qui le bras & l'espée pour  
 tenir son honneur au couuert & en fran-  
 chise? Et quel Prince, s'il est braue, sil  
 est courageux, ne portera profondement  
 en l'ame le regret d'auoir esté vaincu?  
 Qu'il ne sera point iour & nuict piqué &  
 sollicité d'un desir incroyable de se van-  
 ger d'un soing cōtinuel de remedier aux  
 defauts de son Estat, & d'auoir à son tour  
 le dessus sur son ennemy, afin que les sie-  
 cles aduenir entendent aussi tost sa re-  
 uenche que son defastre? Voire tant plus  
 que le cœur est haut, tant plus le ressen-  
 timent doit estre grand, lors que l'hon-  
 neur est prins à partie, & qu'on langage  
 à vne necessité de se deffendre; L'honneur  
 l'enseigne & le marreau de la vertu; Le  
 parfum des Dieux, le baume du monde,  
 de mesme poids & de mesme prix que la  
 vie; l'honneur qui esleue à la vertu les  
 cœurs genereux, & comme vn poignant  
 aiguillon les y haste & sollicite, tout ain-



si qu'on dit que les mouelles des lions dōt Chiron nourrissoit Achille, luy esleuoient le couraige, & le rendoient vraiment Lion. Sur tout vn grand Roy doit tousiours auoir le visage tourné vers l'ennemy, & paroistre sur sa frōtiere vn pied en l'air & l'espée en la main, posture que dans Seneque l'vn des Capitaines de Cæsar fait tenir à la vertu.

C'EST bien dit, Pour quatre arpens de terre; pour vne grange & vne metairie de la France, pour vn petit Marquisat, que nous aurons ouuert le grand portail de Ianus, & crié aux armes veu toute la France en rumeur, nos legionnaires sous les enseignes, nostre noblesse à cheval, & a la teste de ces enfans de Mars, vn Mars, foudroyant, qui bruyant, qui grondant menaçoit du haut des Alpes le Piedmōt & le Milan, & ne les menaçoit pas moins que de gresle, d'orage & de tempeste; Et que pour l'vn des plus precieux diamans del'Europe, pour vn Roiaume fleurissant on mettra, par maniere de dire, son cœur en sequestre & en tierce main? Qu'on portera le bras en escharpe, & qu'on s'enfeuelira tout entier dans vn profond repos?

Il falloit bien, il falloit donner des verges à cet audacieux; Il falloit luy mōstrer qu'il n'y auoit que trop de lions en France pour vn renard, trop de dogues pour vn briquet, trop de chats pour vne souris: Petit ignorant, qui ne reconnoissois pas qu'il ne falloit à vn Roy de France indigné que des cheuaux de poste pour courir la Sauoye & le Piedmont; Petit brōuillon, qui ne sçauois pas que les vistes auancemens sont fuiuis de ruine, & d'vne roulante dissipation, & qu'vn Estat accru avec gourmandise & ambition, & vn trop soudain esleuement à honneur, a les pieds de cire, suijs à se fondre aux premiers rayons de la Iustice du ciel: Petit audacieux, trop ouuert d'oreilles pour esueiller son ambition au triste son des sanglots de la France, lors qu'vn mal furieux courant toutes ses veines, elle demeueroit estendue de son long, couuerte de sang & de playes, & frappée d'vn grand coup au cœur; ne cognoissant pas que les grands Estats ne peuuent estre secouez que par les fieux cachez & mystereux de la Prouidence; Temeraire, de vouloir des premiers mettre les mains au partage de cet Estat sur vne folle ap-

prehension de sa cheute, sans cognoistre  
 que franchir le precipice de toutes mesu-  
 res, espandre ses ailes au delà de l'air &  
 de la raison, & mettre ses cupiditez au de-  
 bord; C'est obliger sa vanité aux vents &  
 aux tempestes, exposer ses esperances &  
 ses Empires imaginaires aux foudres de  
 celuy qui n'aime que les Royaumes ba-  
 ptis & cimentez de sa main: Peu iudicieux  
 ne cognoissant pas q̄ Dieu pour nous voir  
 trop bouillans à la sedition, nous en vou-  
 loit à bon escient faire sentir les cuissons  
 & les aigreur, pour nous faire auoir en  
 horreur les fureurs ciuiles, comme vn  
 bon pere laisse brusler à la chandelle le  
 doigt à son enfant, afin qu'il craigne le feu  
 & que la petite bruslure du doigt, luy  
 garde de brusler tout le visage: Je dis en-  
 core vn coup peu iudicieux, de penser  
 que quoy que ce tyran de Madril, qui  
 faisoit profession de secouër l'Europe du  
 seul vent de ses passions, Philippe son  
 beau-pere, ayant rauy l'honneur de la fi-  
 delité, à vn bon nombre de François, leur  
 eust attaché le tison de discorde, & les vi-  
 peres dans le sein, de penser que ce Roy-  
 aume s'en deust aller à morceaux, & que  
 la France, fille aînée de l'Europe, fust

honteusement trainée par les cheueux à vn bordeau de Sarasins, a vëue de ses enfans, courageux enfans, qui ne semblent viure que pour combattre, ni combattre que pour vaincre: Et encore ce bāquier d'Italie venir en Frāce pour caualer les esprits, & avec l'hameçō de ses largesses, leur vouloir faire aualler la trahison & la perfidie; Venir en Frāce, & accoster les meilleurs seruiteurs avec paroles toutes luisantes de doublons, promesses de grādeur, & les ceindre d'un nuage d'or, comme Iupiter pour depuceler la belle Danaë! Il falloit bien, il falloit donner des verges a cet audacieux. L'impunité aiguise les cousteaux des meschans, la longue souffrance forme l'imitation, & l'exemple de l'un qui demeure impuni emporte l'autre a faire le mesme; Et qui ne vous attaquera sans danger, si non vous donne le coup sans punition?

M A I S qu'en personne vn Roy de France monté a cheual contre vn Duc de Sauoye. C'est raualler sō autorité, & mettre sa grandeur a pied & au decours; Ce chef oinct & sacré a infinies palmes & lauriers deubs à la bonne fortune de la France, ne se doit pas exposer à toute for

te de dangers ; Les Roys sont sans pair,  
 & hors de combat sans autres Roys;  
 l'honneur ne s'en prend qu'à son esgal, &  
 Alexandre qui eust bien voulu gagner le  
 prix de la course à la feste des ieux ; O-  
 lympiques, ne faisoit que demander, *ya  
 il des Roys qui courent ?*

SIRE, on n'a iamais estimé, que la  
 mort de Pyrrhus, qu'une femme tua d'un  
 coup de tuille, fust honorable ; si faut  
 dit un Demosthene François, qu'un Roy  
 meure à la guerre ; Il faut que ce soit en  
 Roy, au milieu d'une fiere & sanglante  
 bataille, environné de tout ce qu'il a de  
 braue, de genereux & de vaillant en son  
 Estat ; il faut qu'il soit noyé dans une mer  
 du sang de ses ennemys, meslé avec celui  
 des ses gendarmes. Croyés moy, SIRE  
 vos coups ruez sur la Sauoye ne fût point  
 retentir au loin vostre reputation ; Il  
 falloit, ainsi qu'Alexandre qui quita les  
 Thebains cōme suiet indigne de sa vail-  
 lance pour se tourner à la cōqueste du mō-  
 de ; Il falloit laisser ce Pygmée pour les  
 grues qui passēt en Septembre ; Il falloit  
 n'en tenir compte, pour ruer & viuement  
 ruer ces braues coups de Roy, ces grāds  
 coups de foudre sur le dos de l'Espagne.



COMMENT donc, Laisser mon marquisat entre les mains d'un petit Duc? Laisser l'occasion de vengeance contre celui qui detenoit iniustement mon heritage, & laisser l'arcenal de la France à un seruiteur de la Couronne, qui l'a temerairement ravi a mon predecesseur? Non SIRE, pardonnez moy : Je ne me suis pas bien expliqué : L'exemple nous enseigne que comme les patrons des galeres ont leurs Comites, qui font entendre par tout leurs commandemens, que par le sēblable un sage Prince en matiere de gouvernement, fait entrer ses amis en partage du maniment de ses affaires, rendant par ceste communication les choses mieux & plus aisement faites, ne plus ne moins que la diuision de la main en cinq doigtz le rend plus propre à l'usage de tout artifice, L'histoire d'ailleurs nous dit, qu'un iour Cassander ayant esté menacé d'Alexandre s'imprima au cœur vne telle frayeur, qui y penetra si auant, que long temps apres, luy Roy de Macedone, & maniant les Grecs à baguette, se pourmenāt par la ville de Delphes, & y regardant des images, il en aperceut vne d'Alexandre desia mort &

pourri au tombeau, dont il fut si effroyé  
 que les cheueux luy dresserent en la teste  
 & ne se peut de long temps r'asseurer. Je  
 m'explique, MON GRAND ROY, Je  
 voulois dire que vous demeurant en vo-  
 stre ville-monde de Paris, comme au cen-  
 tre où toutes les extremités de vostre  
 Royaume respondent, y prenant vn bon  
 peintre, vous y faisant tirer au vif, tenant  
 vn foudre à la main ainsi qu'Appelles  
 peignit Alexandre : Il ne falloit qu'en  
 faire porter le tableau en Sauoye & en  
 Piedmont, pour mettre autant de glace  
 sur le cœur de vos ennemis, comme il y  
 auoit de neige sur leurs montagnes.

IEVNES Lions, germes bien-heureux  
 de saint Loys, braues Princes de Con-  
 dé, de Conty, & de Soissons, encore  
 n'estoit-ce pas le lieu où i'eusse désiré vo-  
 voir ruer ces grands coups d'espée, ces  
 grands coups de Bourbon : Enfant de  
 Mars, genereux Montpensier, il n'estoit  
 pas encore temps de porter la main à  
 l'espée ; Vostre ennemy, l'ennemy de la  
 Frâce paroistra bien mieux en autre lieu ;  
 Vous sage Nestor, Connestable vieilli  
 dans les armes, vos anciens seruices me-  
 ritent bien qu'on ne vous employe point

à tous seruices, & qu'on vous garde comme vne ancre sacrée pour vne grande & violente tempeste. Alexandre le grand pour espargner son cheual Bucephale, qui l'auoit tant serui en plusieurs batailles, montoit sur d'autres pour reuisciter son armée, & apres qu'il l'auoit rangée en ordonnance de combatre, & donné le mot, il remontoit dessus, & aussi tost faisoit marcher droit vers les ennemis.

SIRE, ce sçauant pædagogue du Dolphiné, qui tant de fois a donné des verges à ce petit Duc, & l'a fouietté iusques au sang, n'eust esté que trop capable pour cer Ambassade, qui deuoit faire ses salutations à coups de canon, & ses harangues à coups d'espée: Et croy que son obligation n'en eust pas esté moindre vers vostre Maiesté, que celle d'Agésilas vers Lyfander, auquel il se tenoit plus attenu de luy auoir procuré la charge d'aller faire la guerre au Roy de Perse, que pour l'auoir fait paruenir à la Royauté.

MAIS tousiours, SIRE, le principal demeure; On se moque de Sabaque Roy de Perse, qui faisant foïetter la robbe, pardonnoit aux espaules du criminel, & punissoit le chapeau pour la teste: C'est

au peintre, & non point au pinceau, a qui on attribue la peinture; & l'ouurage est plustost de celuy pour qui il est fait que pour celuy qui le fait: Il est vray, le Sauoyard a couru sur la France en ses afflictions, & a pretendu droit de bris en son naufrage; sa hardiesse n'a point esté sans censure, & son crime s'est fort approché de la punition & du dernier supplice; Mais estoit-ce qu'une branche du tronc de la haine d'Espagne, qui donnoit l'esprit & le mouuement à ceste guerre? Et quelle apparence qu'un petit Prince de Piedmont s'osast mettre à la luitte contre un Roy le plus puissant, le plus guerrier, le plus courageux de la terre habitable?

Voici le mot du guet; Comme l'Espagnol scauoit que l'ambition qui ne recognoist ny bride ny fangle, qui ne parle du deuoir qu'entredents, & ne voudroit iamais que nos affections se courbassent & se missent au pli de la raison; Qu'elle ceste violente passio ressemble à certain miel qu'on trouuoit iadis és environs de Trapezonde, d'une odeur si estrange qu'il tournoit les esprits à ceux qui en vsoient; Qu'elle nous fait bastir

des tours de Babel sur le cœur, nous tient hauts en bride, & nous rend insolens pour le moindre sous-ris de fortune; Cōme il sçauoit que le bouillant desir de regner ne recognoist ny foy ny nature, & qu'il arme les cœurs plus timides de braves resolutions, & les bras plus foibles d'un fer tranchant; Il se craignoit si la teste rouge de Flādres n'a la queue verte & fertile, que le Sauoyard d'un naturel ambitieux a double rebat, n'armast ciel & terre pour faire repasser la loy Salique en France, & la chasser de Castille comme estrangere; Cela l'obligeoit à mettre son beau-frere en ialousie de vostre grandeur, & en appetit de s'aggrandir aux despens de la France: Il luy importoit de l'affriander à la violence & a la rapine, & en faire un oyseau de proye, pour vous donner occasion de repartir sur sa temerité, & tascher de le remettre au leurre. Et ainsi en homme d'Estat, il a pensé faire d'une pierre deux coups; Affoiblir le Sauoyard, & affermir sa paix au milieu des mouuemens de la France, suivant ceste regle de Mathematique, *que tout ce qui fait mouuoir autrui, est necessairement en repos.*



HERCVLES doncques ne verra goutte parmy la fumée que Cacus, ce voleur infigne, exhale pour se sauuer? L'arbre nous menera aux branches, les branches à la racine, & la racine au pepin? De la vie, du sentiment & de l'esprit nous irons aux veines, aux nerfs & aux arteres, & de celles cy au foye, au cerueau & au cœur? Et icy que nous nous arresterons à l'effect sans aller à la cause? Que nous n'irons point de la guerre au Sauoyard, & du Sauoyard à l'Espaigne? Adam est conuaincu de reuolte, & q̃ nous les punirons sans Eue, & Eue sans le serpent? Que comme ce Roy de Perse, nous fouëtterons le pourpoint pour le dos, & que nous punirons le chapeau pour la teste du criminel C'est l'Espagnol, SIRE, c'est luy seul sans autre, qui repassant les leçons de son pere, a fait herisser le Sauoyard contre vous, afin qu'en la conception de vos traux, il vist l'enfantement de son repos.

NOIRE & espaisse fumée de Castille, qui iamais ne creuas sans quelque tonnerre de tyrannie, pendras-tu tousiours à plomb, & tousiours bruiras-tu sur la tranquillité de la France? Iusques a quand? vent d'Autan, contagieux vent, tousiours

& tousiours raualleras-tu nos forces, tousiours en voudras-tu à nos esprits vitaux? Iusques à quand? Cependant on s'en prendra aux sergeans de tes passions, non pas à toy; On foüettera ton pourpoint pour ton dos; On punira ton chapeau pour ta teste criminelle.

MON ROY, MON BRAVE ROY, frapper le chien deuant le Lion; Mettre vn bouclier à sept doubles contre la pincture d'un fresson, & n'oser porter le poignard aux fendans, qui tant portent sur vostre honneur; Et que dira le monde, sinon que n'osant regarder le maistre, vous auez battu le seruiteur? Vn grand Roy comme vous, quand mesme le ciel crouleroit, il le doit regarder d'un œil ferme & assésuré; Si l'orage gronde, si la nue mugit, si les vents tempestent, si les ondes abboient, il luy faut tousiours tenir le gouuernail droit, & iamais ce honteux mouuement de trepidation ne le doit emporter; La crainte, ceste peste de nos ames, qui les transforme en giroüettes, & les fait bransler au gré des passions d'autrui; La crainte, qui traine nostre honneur par terre, & en laisse faire fumier & litiere; Ceste honteuse crainte doit faire

qu'un Roy ne craigne iamais rien, faire que sa Maiesté soit comme vn inexpugnable bouleuart contre la peur, vne muraille sans bresche, & hors d'escalade contre les audaces de ses ennemis; Ou s'il faut qu'il craigne, il faut dit Plutarque, que ce soit de celle crainte benigne & genereuse, propre & peculiere à vn bon Prince; Craindre que ses suiets ne soient offensez ny foulez: Ha! que celuy vous piqueroit iusqu'au sang, qui pensant que ce masle courage, la terreur de vos ennemis, se fust changé en vne mollesse femelle, toute tappie souz la faueur de la paix, & branslante d'apprehension d'attaquer l'Espagnol, vous diroit ce que le Preuost des ieux Olympiques auoit coustume de dire à ceux qui se venoient esprouuer, *Si vous n'avez le cœur & l'adresse d'entrer en si brave combat, retirez-vous, ne venez point gaster la feste.*

**A L L E Z** donc, **MON PRINCE**, & restraignez-en vostre courage comme dans vne ecluse vostre iuste indignation, qui vous redoublera la force, & vous animera de passions & de mouuemens, qui comme poinctes aiguës vous pousseront au deuoir & à vne iuste vengeance.

Et où aller ? Non tant aux coups qu'à la gloire, & non plus à la gloire qu'au de-  
 uoir. Les iustes armes sont necessaires, si  
 on ne pense que la iustice ne face rien par  
 armes ; Et l'honneur ne doit iamais plier  
 sous la force, sinon quand toute force luy  
 faut: voire qu'ad la force nous feroit plier  
 les reins, l'honneur nous commande de  
 tenir le courage debout & sur pied, & ne  
 laisser rien à l'espargne, non pas mesme  
 les dens, comme Alcibiades encore ieune  
 garçon ayant mordu quelcun pour luy  
 faire quitter prinse: *Comment Alcibiades, tu*  
*mords comme vne femme : non pas comme vne*  
*femme*, respondit-il, *mais bien comme vn*  
*Lion.*

Et où aller ? Non à trauers les desers  
 de Lybie, pour aller trouuer les Parthes  
 comme Crassus ; Non à ce long voyage  
 que le Turc fait d'ordinaire pour attaquer  
 les Perses, & non à trauerser les mers,  
 comme autrefois vos predecesseurs ont  
 fait pour chasser les mescreans de la terre  
 Sainte: A vn pied, non pas encore vn pied  
 des Pyrenées; Chés vous, en la maison de  
 vos maieurs ; En la Nauarre, vostre Na-  
 uarre, si vos yeux sont à vous ; En vostre  
 terre où il ne vous reste pas seulement



autant de terre, qu'il en faudroit pour l'ombre de vostre corps, pour vostre sepulture, & où l'on voudroit condamner vostre honneur à vne oubliance perpetuelle. C'est là vrayement le Louure, c'est le Fontainebleau, & le S. Germain basti des propres mains de la nature, qui par testament vous en a laissé heritier.

M A I S encore, où aller ? A course, à toute course chercher l'autre couronne, la couronne de Nauarre, l'autre, l'autre couronne. L'antiquité nous rapporte force merueilles, & qui vôt au parfus de tout ordre de nature: Les images des Dieux, les muëts y parlent, les rochers mesmes y expriment de viues passions par vne voix articulée: Et Pyrrhus ce grand Roy des Epirotes estant encore enfant de mamelle, & son pere tué, fut porré comme à vn temple de franchise, vers Glaucias Roy d'Esclauonie, où mis en terre deuant le Roy, le pource enfant se traine à quatre pieds vers l'Autel des dieux domestiques, au long duquel il se leua, & l'embrassa de ses deux bras: Miracles certes, & non plus miracles que precursseurs de l'estrange accident qui arriué en ce siecle, passera fort auant sur l'auenir, & la posterité l'en-



tendra. On dit, SIRE, qu'en vostre cabinet, quelques iours apres que Dieu tuteur & protecteur des Empires, vous eut donné vn fils, & a nous vn Prince, vous faisi d'une idolatre humeur de Pere, le teniés & le berciés entre vos bras, baisers à centaines, baisers sans nombre, baisers dessus baisers, mignardes caresses, tendres & doux embrassemens: Alors la perle plus precieuse & le diamant sans prix du cabinet se recognoissoit bien à la mignardise de vos souftris, à la douceur de vos baisers; & eut-on dit que l'ame & le cœur de vostre majesté estoient arriüés entre vos bras pour y faire vn festin nuptial avec vos yeux & vos leures. Trois & quatre fois heureux enfant, bié-heureux Prince, d'auoir la bouche d'un si grand Roy comme hommagere, & tant de ses baisers comme courtisans! Rien pourtant ne l'esmeut, Ses yeux seulement comme l'aiguille du cadran qui regarde son Pole, entre vn million de raretés exquisés, se tienneut fixes sur la couronne qui honorablemēt pour vous & heureusement pour nous, vous fut mise sur la teste au iour de vostre Sacre: Iour le tombeau de nos miseres, & le berceau de no-

stre prospérité; on eust iugé qu'il n'auoit rien que des yeux; ny ses yeux autre obiect que la Couronne; Et pour lors vos baisers se tournerent en œillades, & a voir vostre majesté elle sembloit n'auoir que des yeux comme son enfant. Ce fut vne lōgue exctase de l'enfant sur la Couronne, & du pere sur l'enfant: Merueilles sur merueilles! En fin prenant la couronne doucement, tout bellemēt, vous fistes comme qui luy portoit sur la teste: Il en tressaillit de ioye, & vous d'admiration; Puis tout a coup l'enfant, ou plustot vn Ange du ciel sous la figure de l'enfant, tournant droit les yeux sur vous, fescria, *Pa-pere, où est l'autre?*

IEVNE AIGLON, desia porté dans les nuës, haut-haut en l'air sur nos coups de canon, & dans le ciel par nos feux de ioye, s'il est ainsi qu'en la naissance des homes il se forme vne suite de mœurs, & que la semence de la generosité des peres coule & passe sur les enfans, Ieune Aiglon, que vous pourra-on moins preseter pour le coup d'essay de vostre courage, qu'un Milā, & les Corbeaux de Castille, a vous qui desia si a propos criés, *Pa-pere, où est l'autre?*

DAUPHIN

DAUPHIN Roy de la mer, comme si la terre estoit desia estroitte pour vous, que puisse vostre bonne fortune s'allonger sur les ennemis de la France, & doubler le courage de vostre pere, redoubler ses victoires, & mettre au loing les bornes de son Empire, & que ne puisse vostre renommée se limiter que des bornes du monde & de l'eternité; De vous qui desia si à propos criez, *Pa-pere, où est l'autre ? Où est la couronne de mon bis-ayeul Dom Iean de Navarre ? Où son sceptre, où ses suiets ?* Dauphin les delices de la nature, & le plus beau fleuron du lis Royal: Dauphin, ne craignez pas que ses conquestes ne vous laissent quelque chose à conquerir; Et n'entrez point en ceste ambitieuse ialousie d'Alexandre, qui voiant l'heureux progres des affaires de son pere, & comme victorieux il alloit ioignant villes aux villes, & prouinces aux prouinces, *Dea, dit-il, mon pere prendra tout, Enfants, & ne me laissera rien de beau ny de magnifique à conquerir avec vous.* Le monde en cela a de quoy contenter les ames plus affamées, & le courage pour braue qu'il fust, battroit des flancs, & perdrait haleine en si longue estenduë de chemin;

L'oracle mesme de Iuppiter Ammon se trouua menteur, quand il promit à ce grand Roy la monarchie de tout le monde. Encore icy n'est-il pas question de disputer le bien d'autrui, ny de pousser nos victoires au dela des bornes de la Iustice; Laissons faire ceste brauade à Agésilas, qui sur la demande que quelcun luy faisoit, iusques où s'estendoyent les confins de Lacedemone, branlant vne iaueline qu'il tenoit à la main, *Iusques là où ceste-cy peut arriuer*, respondit-il. Le nostre maintenant, demandons seulement le nostre, si nous ne voulons que la patience nous accuse de lascheté, & que la lascheté nous noircisse tous d'infamie; Et vous cependant **LE VNE PRINCE**, doublez & redoublez ceste voix enfantine, & qu'elle esclatte par tous les quatre coings du monde, *Pa-pere, où est l'autre?*

**IL** est vray, **SIRE**, toutes choses doivent auoir leurs reigles & leur proportion; Bornez donc vostre grandeur, il est raisonnable; Mais bornez-la de maximes pleines de iustice, d'honneur & de gloire: soyez Roy par tout où la Nature vous a fait naistre Roy. Souuent la violence fait la maistresse & l'imperieuse, mais en fin

la iustice se represantant sur le theatre, elle y joue le principal rolle; Le ciel luy est tousiours à faueur, les Anges accourent a son aide, & si rien luy defaut, ce n'est que faute de courage: Et quoy que proprement la volonté ne soit pas action, si est-elle mouuement à l'action, voire criminelle, voire preuostable si elle se montre plus courte que le pouuoir.

V N Ancien disoit que le monde estoit plustost en Estre que non pas en nature, voulant dire que l'Esprit de Dieu l'auoit plustost conceu, qu'enfanté, & qu'il n'auoit rien apres son septiesme iour, qui ne fust en Dieu auant le premier; Et croy sie, SIRE, que vous fustes plustost oinct & sacré e vostre entendemēt, qu'a nostre Dame de Chartres, & que vous ne le vistes pas si tost que vous le voulustes. Nauarre est vostre par nature, & a d'autres par vsurpation, & iamais vous n'en serés Roy, que vous ne le soyés plustost en volonté qu'en effect; Car tout entendement qui opere, commence sō operation par la fin. Vous estes grand; Ouy certes, & plus encore de merite que d'estendue de pais: si content, vous n'estes pas hōme: si homme, qu'aués-vous que vous



ne puiffiés auoir d'auantage? Vuellés donc, SIRE, puis que la volonté est le prologue & le commencement de nos actions; Et vueillez, puis que pour estre Roy de Nauarre, il faut necessairement vouloir l'estre: Et pour le vouloir, quelle plus violente persuation qu'une iuste priere?

LES Egyptiens disoient que les Astres en faisant leurs reuolutions ordinaires, font vne fois haut, & vne autre bas, & que selon leur hauteur & bassesse, ils deuiennent pires & meilleurs qu'ils n'estoient: Ainsi, SIRE, si és diuers periodes de vostre fortune on y peut remarquer plus ou moins de puissance, il faudroit au surhaussement d'icelle auoir les bras & les nerfs tous tendus a tenir au couuert la liberté, la vie & les biens de ceux que nature vous a donné en protection: Autrement si iadis a Rome les Censeurs notoient d'ignominie, & si la loy des XII. Tables tenoit pour execrables ceux qui auoient quitté leurs adherans; Si le pere n'est pas plus tenu de la nourriture de ses enfans, la nourrice de la mammelle, que le Prince de la protection de ses suiets, que deuiendra la reputatiō d'un Monarque qui

laisse les siens à la discretion de ses ennemis, & comme le iouët, le balon, & la pelote de leur tyrannie?

SUR tout il n'y a que tenir, & toutes excuses ont les palles couleurs, quand la volonté boitè & cloche, la ou le pouuoir se monstre fort & vigoureux. Et si au dire des Philosophes la perfection de la forme se tire de la puissance de la matiere; SIRE, que deuez-vous esperer de ce grand cheual de Troye, de ceste grande boutique de mars, (ie veux dire de vostre France) sinon victoires, couronnes, triôphes, & le pied tousiours à la gorge de vos ennemis?

CHARLES VIII en l'an 1496. tout glorieux d'auoir le premier des Roys de France apres plusieurs siecles renouuelé la memoire des armes Françoises en Italie, & tout porté à vn second voyage de Naples, ne laissa pas pour cela d'envoyer en la Conté de Roussillon le Cheualier d'Albon ayeul du feu Mareschal saint André, comme par boutade, & pour sçauoir si la langue, le cœur & les forces de l'Espagnol reuiennent à mesme compte & se peuuent mesurer a mesme pied. Il y entra, il y emporta d'affaut la ville de

Sauies, il ioua le diable François a quatre parties à la barbe de l'armee Espagnolle, tellement qu'il renferma, dit l'histoire, *les limaçons en leur coquille, qui sous couleur de vouloir continuer leurs conquestes sur les Maures qu'ils auoient nagueres chassé de Grenade, firent ouuerture au Roy d'Vne trefue*: Ruse ordinaire aux Espagnols, battans de flancs, & sur leur grosse ha-leine, de venir ventre à terre, & comme chiens couchans deuant les moindres trophées de leurs ennemis. Aussi, SIRE vos predecesseurs ont si peu fait estat de ceste quanaille que Loys XII. fort auant engagé en la guerre de Naples voulut en l'an 1503 comme de gayeté de cœur leur taster le poulx avec quatre cens lances & cinq mil hommes de pied sous la charge du seigneur d'Albret & du Marechal de Gié du costé de Fōtarabie, & avec huiët cens hommes d'armes & huiët mille Gascons menés par Gaston de Foix duc de Nemours, & le Marechal de Rieux vers la Contrée de Rouffillon; Et quoy que pour l'iniure du temps nos armes firēt alors plus de bruit que de fruit si est-ce que depuis le Roy François. I. monstra bien que la France peut tenir le

repos & la tranquillité de l'Es-paigne en compromis, & luy porter des affronts sur le nez quand la moindre humeur gail-larde la prend. Car en l'an 1521. à la simple sèmonce, & sur le secret conseil du Pape Leon, il eslança vne armée en Na-uarre souz la conduitte du sieur de l'Es-parre, qui en moins de quinze iours la remit en l'obeissance de son legitime Roy Henry d'Albret; puis poussant l'heur de ses armes print Fontarabie, & courut ius-qu'à la Grongne, avec telle espouuante de ces Marranes, que l'on eust plus che-rement vendu à Madril dix pieds de cerf que cent cœurs de lion : Mais comme l'auarice, eschelle & le montoir à plu-sieurs maux, eust conquesté le cœur de l'Esparre, au mesme instant qu'il conque-stoit ces belles prouinces, il licencia la meilleure partie de son armée pour espar-gner la solde, & se restraingnit à si peu de gens, que les Espagnols n'eurent que trop d'occasion de remettre leurs cœurs à place; trop de temps pour reuenir de pasmoison, & en nous faisant de mesme pain soubpe, r'affermir leurs affaires sur nostre imprudence, tellement que l'Es-parre eut à sortir en lieure d'où il estoit



entré en Lion.

MAIS comme la France ne peut mourir que de sa main, ny estre vaincuë que par soy-mesme, voyez s'il vous plaist, SIRE, comme le cœur de ce grand Roy, & la puissance de son Estat se mirent main à main, & comme toutes les forces de la Chrestienté ne pouuant faire sortir vne goutte de sueur du front de l'un, ny mettre au moindre branle la fermeté de l'autre, on remit encore le cœur-tremble en Nauarre & en Castille. Charles V. Empereur & Roy des Espagnes, Henry VIII. d'Angleterre, puissant de moyens, d'hommes & de courage, les principaux Potentats d'Italie, le Pape mesme; quoy que cousteau a deux fils, & semblable au brodequin de Theramenes qui seruoit à l'un & à l'autre pied; En somme ce qu'il y auoit de plus roide & de plus nerueux en toute la Chrestienté s'estoit mis en luitte contre la seule France: Tout alloit à tours & vireuoltes, secousse pour secousse, saut pour saut de Bretõ, & iamais, MA GVERRIERE, iamais, MA COURAGEUSE, on ne te vit battre du flanc, que tes ennemis ne fussent à perte d'haleine; iamais plier les reins, que lors



qu'ils dōnoient du nez à terre; toute sang  
 toute nerfs, toute esprit, & qui comme  
 l'ame de la Chrestienté n'en pouuois for-  
 air qu'avec la perte de tout le corps. En-  
 core, **M A B R A V E**, au plus fort de la luit-  
 te, comme si tu n'auois que l'un bras em-  
 pesché, tu estandis l'autre sur Nauarrel &  
 Biscaye, & les lis portés par l'Admiral  
 Bonniuet furent aussi tost plantés sur les  
 murs de Fontarabie: & en l'an 1542, si  
 on eust trouué que Mōtpefat n'eust esté  
 court d'intelligences qu'il disoit auoir  
 dans le Conté de Roussillon, & que l'hy-  
 uer n'eust doublé ses iniures, Henry fils  
 aîné du Roy & Dauphin de Viennois, as-  
 sisté du Mareschal d'Annebault, eust bié  
 tost mis Perpignan en eschec, & toute  
 l'Espagne en necessité de se defendre; tāt  
 est veritable ce q̄ souloit ordinairement  
 dire ce grand homme d'Estat Laurens de  
 Medicis, *que si la France cognoissoit ses forces,*  
*elle mettroit toute la Chrestienté en tressueur.*

Et aujourd'huy que l'esprit des Estars  
 politiques qui guide leur secret ressort, a  
 cōuertil la cheute de ce Royaume en vne  
 splendeur plus remarquable, & que pour  
 cent ennemis nous n'en auons pas dix, &  
 que pour dix hommes nous en auons

cent ; & hommes qui au nombre semblent soldats , & aux effectz Capitaines. Auioird'huy quel'Espagnol semble solliciter le ciel & la terre à sa ruine, coniuurer toute l'Europe à l'appeler à comte de ses brigandages publics, pour en faire vne Corneille d'Eslope, & qu'il n'y a Prince qui ne soit ou lethargique , ou ialoux de voir ce tyran, qui comme hors d'obligation des loix, de l'equité & de la iustice gourmande ou muguette tous les Estats de la Chrestienté . Et sur tout auioird'huy qu'en particulier ce grand, ce puissant, ce docte, ce sage Monarque Iaques Roy d'Angleterre, d'Escoce & Irlande a le marché fait de luy demander l'espée au poing, pourquoy il se met desia à la sappe & à sa mine pour mettre son Estat & sa couronne à la renuerse ; Pourquoy en mettant en œuvre la perfidie du Cōte d'Aramberg Ambassadeur du Prestre-Iean de Flandres son beau-frere, il a tracé de si longues trainées de trahisons sur les cœurs de ses nouueaux Anglois , & mis en desbauche ses Milors Coban & Crey, voire iusques à destruire la foy de Ralé Capitaine des gardes de la deffuncte Roynes, pour l'obliger à ce mal-heur de

commencer son regne par sang, & en rendre l'entrée hideuse & de mauuais augure. Auioird'huy doncques qu'on fera le sourd, & qu'on s'endormira sur ses audaces, comme si son inimitié estoit autant redoutable que son amitié est mal-assurée! Que l'exemple de vos predecesseurs ne vous fera point comme la chason de Minerue que le musicien Timotheus chantoit deuant Alexandre, qui faisoit leuer ce grand Prince en sursaut, & s'armant de pied en teste, dansoit vne danse armée, & s'animoit luy-mesmes à la vertu! Sur tout puis que le ciel eslargissant ses faueurs sur vostre regne vous fait heureusement reprendre haleine des troubles & confusions qui si longuement ont heurté vostre Estat, & que par la suite d'un bon nombre d'années, il vous a donné les moyens de faire des Perus, & des montagnes d'or & d'argent en vostre Bastille, pour vous preparer aux efforts d'une grande & glorieuse entreprise; Ainsi qu'on dit que les Sybarites conuioient les Dames vn an deuant, afin qu'elles eussent tout loisir de se parer de vestemens & de ioyaux pour venir au festin.

Et quand bien, SIR, vous seriez à

mains vuides & à tresors espuisez, crain-  
 driez-vous que pour mettre la France &  
 l'Espagne aux prinſes, pour monſtrer au  
 monde d'où vient l'iniure & l'offenſe, &  
 d'où le repart & la vengeance, pour luy  
 faire recognoiſtre le tyran qui ſ'emanci-  
 pant des loix & de la iuſtice, auance ſon  
 ambition ſur le bien de ſes voiſins; Et le  
 bon Prince qui faiſant ferme ſur ſon de-  
 uoir, taſche de tenir ſes pauures ſuiets  
 ſous le couuert de ſa protection, religieux  
 obſervateur de ce beau precepte de Plu-  
 tarque, *que iamais ſage Prince ne ſera cauſe*  
*de mouuoir les tourmentes, ny de pouſſer ſon*  
*Eſtat en danger; Mais que le voyant en*  
*branſle & ſes ennemis opiniaſtres apres ſon*  
*naufſage, qu'il roidira tous ſes nerfs à ſa con-*  
*ſervation iuſques à ietter au hazard ſa propre*  
*vie & la derniere ancre ſacrée de ſoy-mesme.*  
 Craindriez-vous, MON PRINCE, que  
 pour ſecouër vn tyran, & faire fonds à  
 vne iuſte guerre il vous falluſt mettre im-  
 poſition ſur les vrines, comme Flauius,  
 tirer gaing des puantes ordures, comme  
 Veſpaſian, & aller vers vos ſuiets accom-  
 pagné de deux diuinitez *ſuaſion & Vio-*  
*lence*, comme Themistoſcles vouloit aller  
 vers les Andriens? L'extreme neceſſité



vous obligeroit-elle ceste contrainte de  
 leuer la dixiesme partie de toute sorte de  
 marchandises, comme à l'Espagnol vostre  
 ennemy ? Vous feroit-elle doubler les  
 Douanes, comme il fait en Portugal &  
 en Castille, & prendre en chaque paroisse  
 la disme de deux maisons ? Vous rendroit-elle  
 fermier des Bulles de la Croisade ; Imprimeur de  
 nouueaux Breuiaries & d'Alphabets, comme à luy ?  
 SIRE, croyez moy, vos peuples vous doiuent  
 l'hommage de leur conseruation, ils marquent  
 l'Espagnol pour le facteur & l'Agent de leurs  
 calamitez passées ; ils le regardent comme vne  
 nuée qui ne veut qu'eclater sur eux tonnerres &  
 tempestes, de sorte que l'Espagne ne sera pas si  
 tost aux encheres & en butte de vos armes,  
 qu'ils ne vous tesmoignent qu'en eux s'est  
 prouignée la bõne nature, qu'en eux est resté  
 le sang, en eux l'ame & l'honesteté de leurs  
 predecesseurs, qui ont toujours contribué &  
 mis en despence tous leurs biens, voire leurs  
 propres vies en sacrifice & holocauste pour le  
 seruice de leur Prince : chaque particulier se  
 saignera pour guerir la fièvre bruslante, que  
 depuis tant de temps vostre ennemy, l'en-



nemy catholique de la France a nourri dans ses os, dans ses moüelles, dans ses entrailles.

ET vous, Perles de religion, soleils qui conduisez ceste vie à vne plus longue vie, benoïstes ames, qui iettans le fondement doré de vos actions comme d'un saint temple ou d'un palais royal, vivez en ce monde, non pas pour viure au monde, mais pour mourir en ces choses mortes; Vous saints & sacrez religieux, vous les fils aînez du ciel, vo<sup>r</sup> les herauts, vous les truchemens de Dieu, qui faites estat de ne faire aucun estat des richesses du monde, qui quittez la terre pour acquerir le ciel, en ce crise, en ce grand iour qu'il faudroit iuger des forces de la France & de l'Espagne, demeureriez-vous à main & bourse fermées? Seriez-vous semblables à ces figuiers dont parle Crates, qui sont sur les precipices des rochers, dont on ne peut recueillir aucun frui<sup>t</sup>? Auriez vous la charité en la bouche & l'avarice au cœur, la langue liberale & la main chiche, l'exterieur agreable & le dedans tout laid, tout difforme, tout hideux? Ains plustost au conspect de Dieu & de ses Anges bien-heureux, tesmoings & con-

treroollles de vos actions, n'iriés-vous point à bras estendu & à pleine main offrir à vostre Roy ce que les necessitez de son Royaume vous demandent ? Ne favoriseriés-vous celuy qui dés le berceau a l'Ange de Dieu à ses costés, & ne coopereriers-vous avec le ciel à mettre vn tyran en chemise pour reuestir vn Roy legitime de ses ornemens Royaux, & luy affermer son sceptre à la main ?

CAR ce sont coups de vieille escrime de dire que la guerre estrangere se nourrit d'elle-mesme, & que les Royaumes facquierent par leur propre sang, comme dit dans Tacite vn seigneur des Barbares nommé Ciuilis: Et quoy qu'on trouue braue ce repart d'Agatocles sur ceux qui luy crioient des murailles d'une ville qu'il tenoit assiegée, *O potier, de quoy payeras-tu la solde de tes soldats ? Du sac de ceste ville*, respondit il ; si est-ce que c'est mesme chose qu'un navire sans voile & sans rame, & une armée sans moyens. Et c'est pourquoy, *Combatterez avec des armes d'argent*, respōdit l'oracle à Philippe Roy de Macedone.

IL est vray, Alexandre fut le Monarque du monde qui moins employa d'ar-

gent à faire la guerre, & qui plus auant fit aller ses victoires ; car en son voyage des Indes il n'auoit que quarante & deux mil escus, & avec cela il fosa bien promettre les Royaumes de Babylone & de Suse, voire & l'Empire de tout le monde : Et dit-on qu'ayant donné charge à Abulytés de faire prouision de viures, & qu'au lieu de viures il luy eust fait porter trois mil talens qui sont dix-huit cens mil esus, Alexandre fit mettre l'argent deuant ses cheuaux qui n'en peurent manger, & lors, dit-il, *que me sert donc maintenant ta prouision?*

EXEMPLE grand, & d'un grand Prince, fil n'estoit irregulier & anomal, & qu'on en peult tirer vne vraye maxime d'Estat. Mais sa fortune ne cōsistoit qu'à ietter le dé, & l'abandonner au sort & au hazard, comme si toutes ses batailles luy deuoient estre victoires, & la destinée receuoir loy de ses armes. Aussi ne s'estoit il reserué que l'Esperance, & le iour deuant qu'il donnast la bataille de Granique, il exhorta les Macedoniens à faire bonne chere, & despandre tous leurs viures, pource que le lendemain ils disneroient aux despens de leurs ennemis.

M A I S vn Prince qui ne iouë point sa fortune à vn coup de dé, & qui pour l'a-uancer de periode en periode, y amaine tout l'equipage d'une puissance bien reiglée & conduite, il fait marcher ses mullets chargez d'or, à la mode de Philippe de Macedone, qui trouuēt les sentinelles des ennemis sans yeux, leurs corps de garde sans feu, & toutes leurs plus fortes places à porte ouuerte & à pont leuis baillé. Autrement vne armée sans argent, seroit tousiours à ventre vuide, tousiours à mains crochuës, & qui s'emanciperoit à la rapine; Elle auroit bien des pieds & des mains, mais non point de ventre, comme disoit Quintus Flaminius se raillant de l'armée de Philopœmen. Aussi quand Scipion voulut passer en Afrique, & que plusieurs de ses enuieux pour rōpre le cours de sa fortune, eussent fait empeschement, qu'on ne luy deliurast point de l'argent du tresor public, *Ny pour cela,* dit-il: *ma bourse s'espuisera, & celles de mes amis contribueront à la ruine de Carthage.*

B R A V E Scipion, si nous n'estions trop ouuers d'oreilles à ceux qui nous veulent eneruer par les voluptez, & nous conduire aux delices comme à l'engrais;



Si la friandise du repos ne nous destrem-  
 poit le cœur & ne nous amolissoit ; Si à  
 bras croisez nous ne marchandions point  
 avec le temps & la fortune vne venteuse  
 Chimere de plaisir & de feureté ; Si ceste  
 femelle affection de mourir d'une mort  
 seiche & naturelle, n'abaissoit point & ne  
 raualloit nos ames de crainte ; O que bien  
 tost nos tresors seroient en mise & en des-  
 pense, & qu'à pieds de cerf nous franchi-  
 riōs les Pyrenées pour mettre l'Espaigne  
 au branle de sa ruine ; comme tu fis, cou-  
 rageux Scipion, quand tu allas droit à  
 Carthage pour y estindre les flambeaux  
 qu'Annibal auoit allumez en Italie ; Com-  
 me Agatocles, qui se ietta en l'Asie pour  
 guerir le mal qu'elle auoit apporté en son  
 païs ; Comme Annibal qui disoit au Roy  
 Antiochus que le seul moyen de mener  
 la guerre contre les Romains, estoit d'en  
 ietter tout l'effort sur leur Estat, & vaincre  
 l'Italie par l'Italie.

LES Princes voyent leurs affaires en  
 ceux de leurs voisins, comme nous vo-  
 yons nos yeux reluire dans les prunelles  
 de ceux que nous regardons. L'Espaigne  
 par vne longue trainée d'ans, a esté au  
 couuert des orages & de la tempeste, à



l'abry des vens, sans que la courante de nos afflictions ait approché son aise & son repos; Et pourquoy? sinon que Philippes de Castille, l'argument de nos tragœdies & l'instrument fatal ds nos miseres a tousiours repeu ce Royaume de ses venins d'Afrique, de ses d'esloyautez & de ses trahisons? Que tousiours il s'est ietté a la trauersé de nos confusions, & qu'à toute reste il a fait faire à nos seditionieux vn continuel tintamarre comme a des Lutins, pour prendre toute sorte d'auantages sur cet estat, y resserrer les mauuaisés humeurs, & l'entretenir tellemēt en foiblesse & en bransle que le sien en fust plus robuste & plus asséuré? L'Espagne doncques n'ayant demeuré paisible qu'en iettant la guerre en France, comment pourra la France iouir de repos sans le trauail d'Espagne?

ET certes, SIRE, il semble que la Nature vous y guide cōme par la main, & que par ses œuures elle vous appelle a son imitation. Nos corps sont poussés à leur estre & perfection par trois sortes d'esprits, animaux, vitaux & raisonnables, qui d'un cours continu nous sont departis par le cœur, le foye & le cerueau

Voulez-vous donc bien tost esteindre le corps, & reduire en charongne & pourriture vn ouurage si rare & si excellent, qu'on l'appelle Microcosme, & petit monde? faites cesser ceste feue & ces esprits donnés, non sur les parties qui se meuuent, mais sur celles qui les font mouuoir. Aussi pour tirer le dernier hocket à l'Espagnol, & mettre ce grand corps de pieds contremont, il ne faut point se heriffer ny monstrier les dens & les ongles à la Sauoye & au Piedmont (trop maigre desieuner pour vn grand Monarque affamé d'honneur & de gloire;) Non, ce n'est pas assés de tenir la Flandres en tressueur, & luy faire battre le poulx d'un mouuement sieureux & alteré; Ce ne sont que bras & iambes du Geât de Madril; Le sang des coups qu'on leur donne, luy reiaillit bien au visage, mais il ne luy touche point les parties nobles; Pour bien luy faire donner du néz à terre, & oster le poulx & tout mouuement à ses membres, il luy faut porter le coup au cœur, il faut oster l'ame du corps, il en faut arracher tous les esprits: Ainsi auendroit-il de l'Espagne, comme d'un grand arbre, qui estant sur pied &

nourri d'une vigoureuse racine, fait verdoyer ses branches & frissonner toutes ses feuilles ; mais aussi tost qu'il est abatu par le tronc, & que la chaleur donne viuement dessus, l'arbre meurt, ses feuilles fiesstrissent, sans espoir ny de viure ny de refleurir, & ceux qui demouroient à l'ombre se trouuent à descouuert. Il est vray que tandis qu'un estat demeure en son entier, on craint de l'assailir, mais au premier reuers chascun en veut tirer ou cuisse ou aille.

SUR tout, SIRE, quand vous voyés que vostre ennemy vit en renard, & que sous le couuert d'une paix plastrée à l'Espagnolle, il trame mille & mille desseings dans les entrailles de vostre Royaume, dans vostre Louure ; & que vous n'aués pas si tost retrâché vne des testes de l'hydre, qu'elle n'é produise plusieurs autres. Quand apres auoir basti ses trophées sur le col esclau de vos Nauarrois, il veut ressembler à ces vlceres malins qui s'enueniment par les medicamens, & aux chats qui se troublét de l'odeur des parfums, sans iamais prédre le pli ny la teinctute de la raison, n'auoir autre loy que la force, ny autoriser ses actions que par

la violence ; a quoy vous en deués-vous tenir qu'à ce beau dire du peinctre Nicias , *que le suiet est la plus grande partie de l'œuvre* ? Et quel plus beau suiet, commēt scauroit-on mieux fonder vne guerre, qu'en faisant voir à tout le mōde qu'elle est de ces guerres iustes dont parloit Auguste, commandée des dieux , & iustificée par les Philosophes ?

L'ARSENAL mieux muni , l'armée plus vigoureuse d'un Prince , & son plus riche Peru pour la solde , c'est de mettre le droit de sō costé, puis commettre tout a Dieu , & dire avec Cæsar , *Le dé en est ietté*. Et si les repesailles sont recognues par toutes les nations pour vn iuste tiltre de seigneurie ; si le droit de la guerre est vn autre tiltre auoué par tout le monde, qui ne trouuera bon le repart d'un Prince cōtre le Tyrā, & la recouffe de son bien contre le voleur ? Caton reduit dans Vtique à telle extremité que ses amis luy conseilloyent de faire appoinctement avec Cæsar , *C'est a faire*, dit-il , *a ceux qui ont failli de demander pardon , & a ceux qui sont vaincus de prier : quant a moy ie me reputeray inuincible tant que ie seray plus puissant en droit que Cæsar*.

ESCOLIER & nouice est celuy qui ne sçait que tout peuple brusque, guerrier, & qui ne peut temperer ses boüillons qu'aux efforts des combats, s'il ne peut faire mal à autrui, s'occupe en ses propres maux; Occasion qui fit crier à Scipion Nasica, *qu'on ne ruinaist point Carthage, qu'on ne la ruinaist point.* Et de faict quatre ans apres que Scipion l'Africain en eut passé la derniere main, & rompu ce puissant Estat à platte cousture, les Romains vindrent à tel débord que pour euitier les coups au dedans, le Senat iugea expedient de les porter au dehors contre Philippe de Macedone. Tant & tant ces grands hommes d'Estat iugeoient pernicieuses les attaintes, & l'entre-heurt de leurs citoyens ! tant les guerres ciuiles les mettoient en apprehension de leurs tombeaux & de leur entiere ruine ! Aussi ne font-elles que coupe gorges d'un Estat; & pour le voir bien tost en cendre, il ne faut qu'y nourrir le feu & la flamme; Comme au rebours l'ennemy estrange n'est qu'une pierre affiloir pour aiguïser nostre vaillance, & comme vn memorial qu'un grand Empire ne peut estre sans ennemy. Guerre & tousiours guer-



re, mais guerre paisible, pourueu qu'à peines les tabours & les trompettes se puissent ouir de nostre frontiere. Aussi Agesilaus tenoit à gloire de ce que iamais femme Laconienne n'auoit veu fumée de camp ennemy; Et la grandeur de ceste Monarchie qui ne vient point d'humeurs tiedes & molles, a tousiours tenu les guerres estrangeres en auantage, & comme vn necessaire exercice à sa principale profession, & vn honorable theatre à sa gloire; au lieu que les ciuiles & intestines l'ont fait souuent approcher de sa ruine.

HISTOIRE, le vray contreroolle & le registre de nos actions, fidele gardienne de la foy publique, que ie t'admire, quand messagere du passé, tu nous sers de guide pour l'aduenir! *Sous Iean cinquante-vniesme Roy de France, dis-tu, on n'oyoit que guerre, desolation, pleurs, cris, clameurs, desespoir, & par tout la triste image de la mort au pauvre peuple plus mort que vis apres vne si longue & insupportable calamité; Mais la prudence de Charles son fils ramenant les choses à leurs principes, faisoit avec fort heureuse dexterité que la France prenoit vn nouveau visage de iour à autre, comme vn homme apres*  
vne

*Une longue & mortelle maladie ; Encore il restoit ceste innombrable troupe d'hommes accoustumés de viure à l'abandon par la licence de la guerre, ausquels s'il n'eust pourueu par quelque bon ordre, il y eust eu quelque remuement de mesnage en l'Estat, selon l'humieur bouillante & incompatible du François, qui ne manque de brouiller chez soy, s'il ne brouille ailleurs. Pour Dieu, SIRE, quelle image plus naïfue de nos dernières confusions, & de ce que vous aués fait pour nostre retablissement, & de ce que vous deués faire pour nostre conseruation?*

*Si ie leue les yeux, ie ne voy pas plus la Frâce au monde, qu'vn monde de soldats en la France ; La guerre les y a enfantez, il faut que la guerre les nourrisse: autrement on ne les peut loger qu'es bois & des bois aux prisons & aux fourches. Et ainsi la France, volera la France, & par vn iuste repart la France fouëtera & pendra la France. Pauures soldats, & de pire condition que la mule de Pallas en Athenes qu'on nourrissoit aux despens du public ! Que si en nos fureurs publics ils ont licentieusement vescu de proye, s'ils n'ont rien appris qu'à tuer, si ceste profession leur est vne vocatiō perpetuelle,*

n'est-ce pas vne necessité de les ieter hors de la France au profit de la France? Si les mauuais humeurs qui restēt de nos dissensions ciuiles, ont besoing d'estre purgées, ne faut-il pas les y contraindre par art, afin qu'elles n'engendrent vne nouvelle maladie; & faire cōme les medecins qui tirent à la superficie du corps les maladies qu'ils ne peuuent oster du dedans? Si outre la iustice de nostre cause, la necessité nous oblige à la guerre, ne serons-nous pas cōme les Planettes, qui outre leur cours naturel sont entraînés & emportés par vn autre plus rapide mouuement? A dieu France. A dieu Gaulois. En vne grande necessité de viures à Rome, Pompée s'en alla en Sardaigne & en Sicile pour faire prouision de bled; sa diligence faite, sur le poinct de s'en retourner vistement à Rome, vne si grosse tourmente se leua que les pilotes craignoient de se mettre en la mer, mais luy s'embarquant le premier, commanda de leuer l'anchre, & dit tout haut, *Il est necessaire d'aller, & non pas necessaire de viure.*

A L L E Z donc, M O N P R I N C E, faites battre aux chāps, faites ouurir les portes de la France à ceste fourmilie, à

ceste drue abondance de soldats; Qu'on mette l'Oriflâ au iour, & quel'Espagnol voye le plus grand Roy qui iamais porta sceptre, à la teste de sa noblesse, qui vous seruira de rempart & de murailles, ne plus ne moins que les abeilles, qui par aiguillon d'amour naturelle s'approchent tousiours & s'attachent à leur Roy: Autremēt ne craindroit-on pas que la Paix ceste grande forcierre, qui ne fait que par trop trafiquer l'ame avec le corps, n'eust par ses charmes gaigné quelque auantage sur les ardeurs de vostre courage guerrier & martial ? Paix bien souuent plus cruelle que la plus sanglante guerre, & qui chatoüillant le corps & les sens, tue & ruine la reputation d'un Prince: Paix qui ne fit iamais vn bon soldat: Elle a le cœur femelle, le teint trop damoyseau, les yeux de putain, qui n'eslancēt qu'amour, la langue courtoisane, les bras de cire, la complexion foible & delicate; Oysiuete l'habille, Volupté la peigne, Prosperité la coëffe, les Delices la fardent, Abondance luy sert de prouoyeur, Prodigalité de maistre d'hostel, Friandise d'escuyer tréchant, Yurögnerie d'eschanfon; La pousfriere & le soleil luy sont importuns; Elle



a trop de trauail à voir trauailler; Le seul nom de guerre luy fait la guerre, l'ombre des enseignes luy donne l'alarme, le tabour foiblesse de cœur, la trompette des terreurs Paniques; Victoire mesmes, ce beau nom de victoire luy sonne mal aux oreilles; Elle ne vit iamais triomphe ny laurier.

ALLEZ GRAND ROY, allongez le cours de vos victoires iusqu'au bord de vostre sepulchre, & par vne continuelle reuolution de vos labeurs, par vne suite non rompue de vos guerrieres actions, tesmoignez au monde que vostre vie est en oblation & en sacrifice ordinaire sur l'autel de l'honneur: Tesmoignez luy, que vostre vertu n'eut iamais l'haleine courte, ny la iambe lasse, que sa carriere n'a point de bout, & qu'il n'en va pas d'elle, comme des bœufs de Suse, ordonnez à tirer del'eau pour les iardins du Roy avec de grandes rouës, & à certain compte de tours, qu'il n'estoit possible de leur faire passer, ny de gré ny de force. Autrement SIRE, que sera-ce de vostre repos, que comme du bon vin, qui du commencement par vngoust friand & delicieux inuite les persones a en vser, puis se mes-



lant parmy leur sang les assopit, & se rend maistre d'eux? Que fera-ce de tout ce que vous avez fait, qu'une maigre imitation des ioueurs d'escrime, qui pour monstrier leur dexterité deuant que d'entrer en leurs vrayz combats, donnent quelques tours, & font aller leurs bras en l'air? Et si l'issue de vos actions n'est semblable & de mesme parure que l'entrée, si la fin ne se rapporte au commencement, qui ne parlera de vous comme d'un nommé Mandrabulus dans Lucian, qui ayant trouué un tresor, fit le premier an une offrande à Iunon d'une brebis d'or, le second d'une d'argent, le tiers d'une d'airain; En fin le temps morfondant sa deuotion, il n'en fit point du tout?

ALLEZ donc, & tousiours l'espée au poing, & à plein pied sur vos conquestes, tousiours verd de courage & de volonté, faictes qu'on compte vos victoires, non par les monceaux des morts ou des despoüilles, mais par des Royaumes subiuguez, & par des nations assuietties; faites que l'ambition & le desir d'enfiler honneur avec honneur n'ait iamais la goutte aux mains, & que vostre menton blanc ne flestrisse point la verdeur de vostre cou-

rage. Autrement qui ne dira que Pompée auoit biē le cœur d'autre trempe que le vostre, plus roide, plus nerueux, & qui ne desiroit finir ses conquestes que sur le bord du tombeau ? Qui en tous lieux d'honneur ne luy dōneroit la main droite, & qui non le haut bout sur vous ? Car quoy que sur le couchant de ses iours ayant eu commission du peuple Romain à la requeste du Tribun Manilius, pour faire la guerre aux Roys Tigranes & Mithridates, il fronçast les sourcils, & frapast sur sa cuisse, comme ennuyé de tant de charges les vnes sur les autres, & qu'il se fust escrié en la presence de ses amis, *O Dieux ne seray-ie iamais au bout de tant d'trauaux ? N'eust-il pas mieux valu pour moy que i'eusse esté quelque petite personne basse & incognue, que d'estre ainsi continuellement à la guerre le harnois sur le dos ? Ne verray-ie iamais le temps que ie puisse viure avec ma femme & mes enfans aux champs en ma maison ?* Toutesfois, dit l'histoire, l'aïse du cœur luy sautoit sur le visage, & le treper de ses yeux monstroït bien qu'une si honorable charge luy arriuoit à grand contentement.

**A L L E Z,** mettez vous à la teste d'une

puissante armée, qui comme vn rocher qui braue les ondes & les flots, comme vn grand fleuve qu sort de son riuage pour maistriser la campagne, assiege villes, gaigne les barailles, emporte tout triomphe par tout: Afin que le monde sçache que vous scaués bien redoubler ces grands coups d'Agésilas, qui pour ietter la guerre hors de la Grece alla attaquer le Roy mesme de Perse, & luy mit en compromis ses richesses & ses delices, dont il iouissoit trop a son aise en ses hauts palais d'Ecbatane & de Suse, & l'empescha de mouuoir plus la guerre contre les Grecs sans se bouger de sa chaire.

ALLEZ, & continuant la vogue courante du progrès de vos affaires, iusques icy conduits, non par les mains ny par le conseil des hommes, ains par vne guide & escorte diuine, & par vn vent en poupe du ciel, erigés trophées sur trophées, continuez d'vn tenant vos triomphes à d'autres triomphes & que le premier sang de vos armes, encores tout chaud soit laué par vn autre second. Autrement qui ne vous dira trop haut d'oreille à ceste voix raisonâte du ciel, qui vous appel-

le en Nauare; à ce grand oracle nague-  
res reuelé en Seuille; a ceste parole du  
Tout-puissant escrite de la main de ses  
Anges en Espagne & contre l'Espaigne?  
*En l'an 1604, iusques en l'an 1605, dit*  
*la Prophetie, & en la Biscaye, vn grand feu*  
*de guerre s'allumera entre les fleurs de Lis, &*  
*le Lion: Le carnage y sera grand, mais les Lis*  
*demeureront victorieux, & les membres du*  
*Lion se lairront a pieces: La guerre acheuée*  
*le Roy de Nauarre sera assis au throsne de ses*  
*predecesseurs, & chascun pourra librement dor-*  
*mir sous sa vigne & sous son figuier:*

QUE doncques on vous voye sur la  
Nauarre, effroyable comme vn feu de la  
foudre qui sort avec impetuosité de la  
nue, & emporté par le vent vient fondre  
en terre, ne plus ne moins qu'vn fantos-  
me reluisant d'armures flambrantes; Que  
la terre ne soit pl<sup>r</sup> terre a vostre ennemy  
qu'vne terre a clavier, & a terre pour lie-  
ures deuât vos chiens courás: Quel'E-  
urope cognoisse qu'vn Roy de France  
couroucé peut tirer dvn coup la morue  
& le nez à vn roy d'Espagne, le sacrifier  
aux pieds de son indignation, le mettre à  
son tour de participer aux afflictions, &  
estcindre dans son sang le flambeau de la



guerre. Il le cognoist, ce Ninon, il se craint que vos armes ne luy mettent le dos en hachis, & son Estat à pieces & à lambeaux: Et quoy que braue aux yeux du monde, & comme au dessus du vent & de la tourmente, si est-ce que pour addoucir ses peuples aigris d'une insupportable tyrannie, il rebatit aujourdhuy la maison de la Justice d'Arragon à ses despens, declare innocens les principaux seigneurs de son Estat cruellement esgorgez par son pere, donne l'estendart & la banderolle à la liberté, nagueres mise souz les pieds pour litiere & fumier; Ouy, iusques là que pour r'habiller l'iniuste usurpation de son Bis-ayeul, & la malheureuse vie du tyran dernier-mis aux gehennes del'enfer, il donne pension à ses esclaves de Nauarre, & de dix ou douze Gentils-hommes quel'an passé Dom-Ian de Cardonne son Viceroy au Royaume, luy mena en l'armée nauale, qui deuoit faire coup sur la Prouence, si la mine n'eust prins vent, il en fait autant de mignons pour s'en aider, comme de trompettes & herauts de sa clemence, & comme boutiques ouuertes de ses faueurs. Mais pour cela vos suiets de Nauarre,



vous attendent à cœurs ouuerts, & font desia pour vostre arriuée comme les laboureurs d'Egypte, qui lors que l'inondation du Nil approche, tirent de grandes fosses & tranchées pour faire plus auant penetrer l'eau dans leurs heritages : Tous resolués à receuoir la guerre, & comme les abeilles qui trouuent naturellement es plus aigres fleurs, & parmy les espines le plus parfait miel & le plus vtile, trestous prests à mettre à la bouche ceste amere pomme d'aduersité, au suc de larmes, au goust d'ennuis, au manger de douleurs, poignantes douleurs, l'absynthe de nostre vie & le poison de nos actions. Et que la volonté de vos suiets ne vous fera point cōme vn grand chemin battu, & leurs courages comme autant de pas ouuerts pour aller de plein pied en Nauarre?

ALLEZ-y, donnez des pieds & des ongles sur vostre ennemy, & arrachez, s'il faut ainsi dire, la reigle & le compas des mains de la Prouidence, pour faire entrechoquer la France & l'Espagne : Et, Ô MON PRINCE, comme vous estes en vos actions également admirable, & redoutable, ne luy ferez vous pas voir en

vn senl iour les quatre saisons de l'an? Le  
 Primptemps en la verdeur de vos forces;  
 l'Este en l'ardeur de vostre courage;  
 l'Automne és fruiçts de vos labeurs;  
 l'Hyuer en la glace & en la froide crainte  
 que vous luy lancerés sur le cœur?

ALLEZ, SIRE, & faisant vn brasier  
 de vostre iuste courroux, frappez & touf-  
 iours frappez, iusqu'à tant que la con-  
 ionction de l'esprit & du corps d'espagne  
 soit entierement dissoute afin que la ter-  
 reur & l'exemple s'estende parmy les na-  
 tions, qui en ce faisant seront toutes viui-  
 fices, toutes animeés à la iustice, & a ne  
 desirer le bien d'autrui. Et afin encore  
 que le monde sçache, que si les moulins  
 des dieux sou tardifs a moudre, comme  
 disoit Epicure, que la farine en est amere  
 & de mauuaise digestion, Et si la Ven-  
 geance diuine a la goutte aux pieds,  
 comme disoit Euripide, qu'en fin le mal  
 des pieds se guerit par la pesanteur des  
 mains.

Et alors, ô qu'alors le sang & les  
 sueurs que vous aurez espendues à la re-  
 couffe de vos suiets serót de viues & non  
 tarissables fontaines, d'où couleront en  
 l'ame de ceux qui viuront au siecle d'au-

dessous vn genereux desir de vous ressembler ! O qu'alors vous sentirez combien les vertus actiues apportent de grandes voluptés, & non pas de celles qui flattēt comme ces doux & gracieux mouuēmēs de la chair, qui en fin se terminent en vne desmangeaison impatiente, en vn charrouillement incōstant & meslé d'vne inflammation sieureuse ; mais voluptés filles legitimes de la vertu, qui esleue l'ame en vne grandeur & hauteſſe de courage, & qui apres la bataille de Leuctres dresse vn trophée eternal à Epaminōdas, & fait retentir par le monde le nom d'Aratus, pour auoir chassé les tyrans de Sicyone ! O que vostre cœur s'espanouira d'aïse & de contentement quand venant de conioindre par alliance de cœurs & de volonte, deux puissantes nations, vous verrés François & Nauarrois à mesme festin, à mesme table, vous-mesme y estant courōné d'vn chapeau de fleurs, & entonnant vn cantique d'amitié, comme vn chant nuptial d'Hymenée ! O que nous trestous, vous voyant assis sur l'ancien throne de vos predeſſeurs, mettrōs nos ames au large, & en entiere liberté de se resiouir ! O que ceste douce rosée, qui

nous distille des yeux à l'arriuée de quelque grande prosperité, nous roulera itédremēt par les iouës, comme elle fit aux Macedoniens, lors qu'ils virent le sceptre de Darius en la main d'Alexandre! & comme a Demaratus le Corinthien, qui voyant Alexandre en la ville de Suse, fescria les yeux tous coulans de larmes, *que les Grecs desia morts estoient priuez d'un singulier contentement de voir Alexandre assis sur le throsne Royal de Darius!*

HE LAS, mais hélas! si tousiours la honte & le des-hōneur deriuant sur nous par la foiblesse de nos peres, & de nous a nos enfans par nostre lascheté, l'Espaigne se doit rēdre propre & particulier ce nom illustre & beau, iadis donné a la ville de Sparte, *Damafimbrotos*, qui dompte les hōmes; Si ce tyrā de Madril doit auoir la fortune à poste & à discretiō pour fourbir & riuier la tyranne de ses ancestres; Si la Castille tousiours doit estre ce petit poinct, d'oū paisible & à pied ferme on peut embrasser la circonferance du monde, & comme si on auoit pactisé avec le ciel, minuter à sō aise les despouilles des autres Royaumes; Tousiours, & si tousiours l'Espagnol peut dire qu'il est en



droit & possession de dōner loy aux Roys de la fleur de Lis, tailler leurs morceaux legitimer & appanager leur fortune.

S'IL faut qu'à iamais la maiesté reluisante de ce grand Empire se ternisse, & que nous ne soyons que le iouet, les tarots & les cartes de ceux, qui d'autrefois n'en oyoient parler qu'avec fieure & tremblement; Si nous craignons qu'en la iustice de nostre cause nous ne puissions estre assiste de moyens & d'amis, comme on dit que le Leopard attire la plupart des autres animaux pour le plaisir qu'ils prennent à sentir son odeur; Si nostre aueuglement ne nous laisse donner la main à cent mil Mores, à trente mil Gascons, que diuerses fortunes ont ietté en Espagne, & qui sont au guet & en sentinelle pour a nostre arriuée tourner les armes, & faire ieu sur nos ennemis;

S'IL est beau que l'on voye la Navarre gemissante sous le ioug de la tyrannie, & qu'on puisse dire, *Voila vn trophée de l'impuissance ou de la scheté des Roys de France*, comme le Philosophe Crates voyant au temple d'Apollo Pythique l'image de la courtisane Phryné, s'escria tout haut, *O le beau trophée de la luxure des*



*Grecs ! S'il est beau que les suiets demeurent à bras & poitrine ouuertes vers leur Roy, le Roy leur tourne l'eschine ; ou qu'il face presque comme les scorpiōs de la montagne de Latmos en Carie, qui tuent les hommes du pais, & gardent les estrangers ; S'il est beau de ne semer point pour crainte des oyseaux ; & pour apprehension du mal à venir, ne remedier point au present, comme celuy qui interrogué par Alexandre, s'il vouloit qu'on rebatist Thebes ville de sa naissance, Qu'en est-il besoing, respondit-il, Il viendra peut estre un autre Alexandre qui la destruira & apres.*

Si nous ne trouuons point que ce soit chose Royale de subuenir aux prieres de nos pauures suiets affligez, secourir leur calamité, les affranchir de danger, procurer & prouigner leur salut, estre comme leur commun asyle, & de ce beau naturel de l'oyseau descrit par Homere, qui porte tout ce qu'il trouue à ses petits, & qui meurt de faim luy-mesmes, ne prenant rien pour soy de tout ce qu'il prend.

S'IL nous faut tousiours tapir souz vne paix honteuse, & nous rendre fermes pour crainte des hommes ; Si nous ren-

dons ame & cœur liez à la peur & à la crainte, passions les plus ordinaires pour faire trespucher la viuacité de nostre entendement ; Et si ces belles inscriptions que les Anciens mettoient sur les images de ceux qui auoient fait quelque grand coup pour leur patrie [ *Au protecteur du païs, au meurtrier des tyrans* ] nous semblent hors de mise & de peu de fin entre gens d'honneur ; Je t'appelle icy, O EPAMINONDAS, qui t'en voulois aller tout ioyeux à la mort, pourueu qu'on mist sur la colonne de ta sepulture, *que tu auois faict brusler le païs de Laconie, repeuplé la ville de Messine, mis en vn corps & en vne ligue tous les peuples d'Arcadie*. Et toy France, ma douce nourrice, qui m'as donné le tetin quoy qu'estranger & Bearnois, & qui obliges tous mes vœus & mes souhaits à ta prosperité, mon sang & ma vie au sacrifice pour ton salut ; Tu sembles me conuier aux larmes & aux sonspirs pour le conuoy & pour les funerailles de ton honneur : Honneur le parfun des Dieux, Honneur le baume du monde, Honneur de la France serois-tu donc mort & trespasé ?

SEROIS-tu donc mort au temps d'un

Roy, qui lors que les François attachez aux flancs de leur mere, cōme pour n'en desmordre, qu'ils n'eussent succé la vie avec le sang, & assaillis de la violence de leurs passions, comme vn arbre contre-soufflé de contraires vens, n'auoiēt autre vie que la miserable mort de leur repos: Et lors que l'Espagnol s'estant serui du dos du Roy deffunct, cōme d'vn tablier pour luy faire iouer sa couronne, & ietté ses ongles dās les playes de la France, l'a affranchie de ses afflictions, & fait resoudre en sang tous les desseins de son ennemy, les efforts en air battu, si que les ombres qu'il auoit poursuiuies luy estant eschapées, il fut contraint de dire, ce que ceux de Numance coustumiers à battre les Romains, disoient apres auoir esté battus par Scipion, *Les moutons sont bien les mesmes, mais ils ont vn autre berger.*

SEROIS-tu donc mort au temps d'vn Roy que l'affliction a tousiours tenu en halaine, qui a exercé non seulement iusqu'à la sueur, mais mesme iusqu'au sang; Roy deuenu pilote entre les tempestes, courageux entre les aduersitez, Capitaine entre les armes, & qui semble n'auoir l'espée au poing que pour laisser ses enne

mis au dos de ses conquestes! Serois-tu donc mort, apres que le feu de nos dissensions ciuiles a ouuert les pores, au trauers desquels tu as ietté dehors les humeurs qui fomentoient ta maladie au dedans! Apres auoir luitté avec tant de maux, retourné de maladie, reprins ta santé, vis, brusq & gaillard, ta fortune chauffée à neuf, les effects de tes desseins allas en poste, & tes sourcils à deux doigts de nues; O Honneur de la France serois-tu donc mort & trespaslé!

I O V E T S de fortune, Quintaines des Roys de Castille, gibbier de leur auarice, le blanc & la butte de leurs iniustices, *Pauvres Navarrois*, que donc vos iustes doléances ne trancheront point iusqu'au vis du cœur, qu'elles ne reueilleront point la generosité endormie de vostre Roy? Terre & cieux, secouréz ces pauvres captifs, si celuy qui en la commission ne le veut ou ne l'ose faire? Anges tuteurs ordinaires des Empires, demadés à ce roi où il a son peuple, où la maison de ses ancestres, où le Royaume dont il porte le nom? S'il rougit, fil n'a point de parole, criéz & tempestez apres luy, Où est donc ce cœur de lion, qui ne deuroit auoir autre crainte, que



de n'auoir point d'ennemis ? Où ces Princes de  
la fleur de Lis ? Où ce Connestable , & ces  
Mareschaux ? Où ce ciel couuert d'estoilles ?  
Ceste France qui fourmille en soldats ? On les  
appelle en Nauarre , l'Espagnol les y attend, où  
sont-ils ? S'il a honte, & s'il baïsse les yeux,  
donnez luy haleine, Esprits biē-heureux,  
peut estre la compassion de ses suiets luy  
attendrir le cœur ; Peut estre l'honneur  
le fera sortir , comme vn torrent , qui  
bruyant , qui courant rompt chaudières,  
defracine arbres, emporte ponts, abbat  
edifices, heurte, fracasse, dissipe & ren-  
uerse tout ce qu'il trouue.

O v blanc ou noir ; Soit que la France  
roidisse le bras, & reparte sur les iniures,  
soit qu'abbatue de courage elle se rende  
à discretion & à la mercy de ses ennemis ;  
O MON ROY, tout verdoyant de lau-  
riers, tout rayonnant d'honneur & de  
gloire, Roy victorieux , & qui mourant  
doucelement au liēt, & hors de tout cōbat  
semblerez mesme mourir en combattāt ;  
Du moins quoy qu'esloigné de la portée  
de vos faueurs par ie ne sçay quelle ma-  
ligne constellation, n'attesterez vous pas  
cōme pour vous obliger au deuoir, escar-  
ter le repos, & faire de vostre vie vne vie



sans feste & sans sabath, ie vous ay voulu mener de la France aux Pyrenées, des Pyrenées en Nauarre, & de la Nauarre vous faire voir ce grand guerrier des Epirotes Pyrrhus, qui sur le bord de la Sicile crioit à ses soldats, *O la belle carriere à luit-ter!* SIRE, n'attesterez vous pas comme ie vous ay representé ce braue partisan l'Empereur Othon, qui monstrant à ses compagnons le champ de bataille, *Voila dit-il, Voila le lieu où il faut effacer la tache de nostre premiere honte, & recouurer l'honneur perdu.*

ET VOUS, FLEVRONS DV LIS, colonnes tres-fermes de cet Estat, qui ayāt demeuré sur la pouppe de la nauire Francoise, & combattu les vagues & les vens, n'estimez auoir autre forme propre & essentielle que tenir l'honneur de la Frâce en verdeur: Vous autres Princes, Vous Mareschaux, Vous & vous tous les fideles Officiers de ceste Couronne, qui auez si auant au cœur le saint germe de fidelité, que toutes vos actions ne sont qu'autant de fleurs & autant de fruiçts d'une si bonne plante: Braue Noblesse qui parmy nos confusions ciuiles auez souffert vne touche semblable à celle des enfans nou-

ueaux nez de Sparte, qu'on trempoit d'as  
 du vin, & s'ils pouuoient endurer ceste  
 trempe, ils estoient soigneusement nour-  
 ris en esperance de deuenir vn iour les  
 membres excellens d'un si noble Estat. Et  
 vous soldats, vous trestous qui auez mis  
 vostre sang à vil prix pour le salut de vo-  
 stre patrie, & qui ne voulez pour tōbeau  
 qu'un champ de bataille, n'attesterez  
 vous pas à un pauvre soldat son innocēce,  
 son courage & son affection, pour tenir  
 l'honneur de la France debout, & faire ac-  
 crocher ses mains sur ses ennemis ? n'at-  
 testerez vous pas comme tousiours en  
 sentinelle pour sa patrie, l'harquebuzé  
 sur l'espaule, & l'espée au costé, il vous  
 sollicite à la vengeance, & crie contre l'Es-  
 pagnol, comme ce gentil Hellanicus, qui  
 ayant conspiré la mort d'Aristotimus ty-  
 ran des Eliens, voyant le poinct de l'occa-  
 sion venu, à haute voix estendant ses deux  
 mains, s'escria, *qu'attendez vous gens de bien ?  
 sçauriez vous desirer un plus beau theatre à  
 combattre pour la defense de la liberté que le mi-  
 lieu de vostre païs ?*

Q V E si quelque ame basse & reptile,  
 si quelque cœur apoltroni & rauulé de  
 crainte, trouue ma hardiesse criminelle,

Si le son des tabours & des trompettes luy semble hors de temps & de saison; qu'il sçache (indigne de me faire froncer le sourcil) que les lauriers & les trophées de mon Prince me sont plus à gré que ses chasses & ses bastimens; son honneur plus precieux que son repos: vne guerre honorable d'autre mise qu'une paix honteuse, & que soldat de fortune, plus prest à porter la main sur mon espée que sur ma plume, & à employer mon sang que mon ancre pour le service de mon Roy, J'ay tousiours trouué braue & courageuse ceste responce de Crobylus à ceux qui luy disoient, s'il vouloit mettre toute la Grece en armes & aux prises avec le Roy de Macedone, *Ouy, dit-il, & aux robes de deuil, & au conuoy des funerailles publiques, & aux harangues funebres, si nous voulons demeurer libres, & non pas nous assuiettir aux Macedoniens.*

## VICTORIA.

The first of these is the fact that the  
 world is not a uniform whole, but a  
 collection of many different parts, each  
 with its own characteristics and laws.  
 This is the principle of diversity, and it is  
 the basis of all knowledge. Without it, we  
 could not understand the world, for we  
 could not see the differences between  
 things, and we could not learn from  
 our experiences. The second principle is  
 that of unity. Although the world is  
 made of many different parts, they are  
 all connected together in a single whole.  
 This is the principle of unity, and it is  
 the basis of all knowledge. Without it, we  
 could not understand the world, for we  
 could not see the connections between  
 things, and we could not learn from  
 our experiences. The third principle is  
 that of order. The world is not a chaotic  
 mass of confusion, but a system of  
 things arranged in a certain way. This is  
 the principle of order, and it is the basis  
 of all knowledge. Without it, we could  
 not understand the world, for we could  
 not see the patterns and regularities in  
 nature. The fourth principle is that of  
 change. The world is not a static, un-  
 changing thing, but a constantly moving  
 and changing one. This is the principle  
 of change, and it is the basis of all  
 knowledge. Without it, we could not  
 understand the world, for we could not  
 see the progress and development of  
 things. The fifth principle is that of  
 purpose. The world is not a random  
 collection of things, but a system of  
 things that exist for a certain purpose.  
 This is the principle of purpose, and it is  
 the basis of all knowledge. Without it, we  
 could not understand the world, for we  
 could not see the meaning and value of  
 things.

The first of these is the fact that the  
 world is not a uniform whole, but a  
 collection of many different parts, each  
 with its own characteristics and laws.







